

၁ ကောရိန္သု ကောရိန္သု သင်းတော်ဟို့ ပေါလုရဲ့ ပထမပေးစာ နိဒါန်း

ကောရိန္သု သင်းတော်ဟို့ ပေါလုရဲ့ ပထမပေးစာ ဟာ ခရစ်တော် မွီးဘီးန ၅၅ ခုနှစ်လော့-က်ဟု တမန်တော် ပေါလုဟု ရေးဟူးလေဟယ် (၁.၁)။ အယ်စဟာ ကောရိန္သု မာရ်ဟို့ သင်းတော်ဟို့ ပေါလုရေးဟို့ ပေးစာနဲ့စောန်ထဲ ဟု ပထမစောန် ဖြစ်ဟယ်။ သူဟာ မာကဒေါနီပြည်ဟို့ ဖြတ်ဘီး ကောရိန္သုဟို့ ရော့-က်လာခန် ဖောက်မြို့မာ နေနေဒူး အယ်စဟို့ ရေးဟူးဇာ ဖြစ်နိုင်ဟယ် (၁၆.၅-၉)။

အယ်စဟာ သင်းတော်ထဲမာ ကွဲပြားမှုလေ၊ တရားဘဲ ဟူ မေထုန်မှုလေန ကောန်းဘဲဟူ ကျင့်လေဘောန်းဇာ င်ကြောင်းဟို့ ရေးဟူးဟူစာဟို့ သင်းဝမ်သူ တချို့နားဟု နေ ပေါလုဟု လတ်ခံရရှိဟူကြောန့် ပုလန်ဘီးဖြေရှင်းဟူးဇာ ဖြစ်လေဟယ်။ ကောရိန္သုဟာ တရားဘဲဟူ မေထုန်န ပတ်သက်ဘီး နာမယ်ကီးဟူကြောန့် အယ်သင်းတော်မာ အယ်မျိုးပြဿနာန ရင်ဆိုင်နေရဇာဟာ အံ့ဩဇာ မွေဟု။ ကောရိန္သု သင်းတော်ဟို့ ပေါလုရဲ့ ပထမပေးစာမာ လည်း မြစ်တာန ပတ်သက်ဘီး ထန်ရှားဟူ ခန်းလေ ပါဝမ်လေဟယ် (၁၃)။

ကြောင်းရာ ကျဉ်းချောက်

၁။ ပေါလုဟာ ကောရိန္တသို့ သင်းတော်ကို နှောက်ဆစ် ဘီးနု သူနီတွင် ဘုရားသခင်ကို ချီးမွမ်းဟောကြားကြောင်း (၁.၁-၉)

၂။ သူဟာ ကောရိန္တသို့ သင်းတော်ထဲမှာ ကွဲပြားမှုလေးနု ပတ်သက်၍ စာကို လတ်ခံရရှိကြောင်း ပုလန်ဘီး ဖြေရှင်းဟောကြားကြောင်း (၁.၁၀-၄.၂၁)

၃။ သူဟာ တရားဘဲဟူ မေထုန်ပြဿနာနု တရားစီရင်တို့တွင် ပုလန်ဘီး ရှင်းပြဟောကြားကြောင်း (၅.၁-၆.၂၀)

၄။ အယ်ဘီးမှ သူဟာ လတ်ထတ်ရှင်းကြောင်း၊ ရောက်ထုတို့ ပူဇော်ပသရှင်းကြောင်း၊ ဝတ်ပြုကိုးကွယ်ရှင်းကြောင်း၊ ဝိညာဉ်ဆုကျေးဇူးနု ထမြော့-က်ရှင်းကြောင်းနု ပတ်သက်ဘီး ညွှန်ကြားဟောကြားကြောင်း (၇.၁-၁၅.၅၈)

၅။ နှော့-က်ဆောင်းမှာ သူဟာ လူပေါက်ကိုနု ဆိုင်ဟူဇာလေ၊ လတ်တို့ လောက်ဆောင်ရဟူဇာလေနု နိဂေါင်းချောက်ဟောကြားကြောင်း (၁၆.၁-၂၄)

¹ ဘုရားသခင်ရဲ့ လိုတော်တိုင်း ယေရှုခရစ်တော်ရဲ့ တမန်တော်ဖြစ်နု ခန့်အပ်ဟူ ကျေးဇူးတို့ ခံရဟူ ငါပေါလုနု ငါ့ညီသုဿင်ဟာ —

² ကောရိန္တမြို့မှာရှိဟူ ဘုရားသခင်ရဲ့ သင်းဝမ်ဟူ

သူလေန နေရာတိုင်းမှာရှိဟူ နို့လေန သူးနို့လေရဲ့ သခင် ယေရှုခရစ်တော်ရဲ့ နာမတော်ဟို့ ကိုးကွယ်ဟူ သူ ယေရှုခရစ်တော်နှိုက် တလောင်းတဝဒဲ ဖြစ်ရှင်း အားဖြင့် ဘုရားသခင်ရဲ့ သန်ရှင်းပြောန့်မတ်ဟူ သူဖြစ် ဝီးကော့-က်ခံရဟူ လူတိုင်းနားဟို့ စာရေးလိုက်ပါဟု ယ်။

³ နို့လေရဲ့ သခင် ယေရှုခရစ်တော်န နို့လေရဲ့ ဖ ဘုရားသခင်နားဟုနေဘီး ကျေးဇူးတော်န ငြိသတ်ရှင်း ဟာ နန်းနို့ ဂူလောင်းမာ ရှိပါစေ။

ဆုကျေးဇူးတော်လေကြောန်း

⁴ ယေရှုခရစ်တော်အားဖြင့် နန်းနို့လေဟို့ ပေးသနား တော်မူဟူ ဘုရားသခင်ရဲ့ ကျေးဇူးတော်ကြောန့် ငါဟာ နန်းနို့လေတွပ် နို့လေရဲ့ဘုရားသခင်ကျေးဇူးတော်ဟို့ မြဲဒ် မ်း ချီးမွမ်းပါဟုယ်။

⁵ ပြားဖြစ်ကြောန့်နူးဆိုဟာ နန်းနို့လေဟာ နောက်သတ္တိ၊ ဉာဏ်သတ္တိန စစရာရာမာ ခရစ်တော်အားဖြင့် ကြွယ်ဝပု လဲဇောင်ဂေဟူကြောန့်၊

⁶ ယေရှုခရစ်တော်နဆိုင်ဟူ သတ်သေခံချစ်ဟာ နန်းနို့ လေမာ တည်ပြုဟူဇာဟို့ ခံရလေဟုယ်။

⁷ အယ်ကြောန့် နို့လေရဲ့သခင် ယေရှုခရစ်တော် ပေါ်ထွပ် လာဟူဇာဟို့ မျှော်လင့်နေဟူ ခီမာ ဆုကျေးဇူး တဇောင်တ ခုလည်း လျှော့ဘဲန စောင်လင်ဂေဟုယ်။

၈ နို့လေရဲ့သခင် ယေရှုခရစ်တော် ပေါ်ထွပ်လာဟူနေရစ်မာ ပြစ်တန်ခွမ်နု လွတ်ကင်းဟို့တွပ်၊ ကိုယ်တော်ဟာ ဆောင်းထိအောက်ဘဲ နန်းနို့ဟို့ ခိုင်ခံ့စေလေ့မယ်။

၉ သူ့ရဲ့ သားတော် ဖြစ်ဟူ နို့လေရဲ့ သခင် ယေရှုခရစ်တော်ရဲ့ မိတ်သဟာယဖွဲ့ရှင်း ထဲဟို့ နန်းနို့လေဟို့ ခေါ်တော်မူဟူ ဘုရားသခင်ဟာ သစ်စာနု ပုလဲဇောင်တော်မူလေဟယ်။

သင်းတော်ထဲမာ စိဝန်းကွဲဟူကြောင်း

၁၀ ညီကို မောန်နှမလေ၊ နန်းနို့လေရှင်းရှင်း စိဝန်းကွဲရှင်း မှော့ဘဲနု စည်းစည်းလောင်းလောင်း ညီးညီညွတ်ညွတ်နေဘီး စိတူကိုယ်တူဖြစ်ဟို့တွပ် သခင် ယေရှုခရစ်တော်ရဲ့ နာမတော်ဟို့မှီပြုဘီးဟာ နန်းနို့လေဟို့ ငါတောင်းဗန်ပါဟယ်။

၁၁ ဖြားဖြစ်ကြောန့်နူးဆိုဟာ ညီကို မောန်နှမလေ နန်းနို့လေ ရှင်းရှင်း ရန်များဂေဟယ် ဆိုဇာဟို့ ကလောက္က အီသူအီသားလေ ပြောပြဟူကြောန့် ငါကြားသိရဟယ်။

၁၂ နန်းနို့လေဟာ ရှင်းရှင်း စိဝန်းကွဲဟူ စကားလေဟို့ ပြောဂေဟယ်။ တယော့-က်ဟု “ငါဟာ ပေါလုရဲ့တမဲ့၊” တယော့-က်ဟုလည်း “ငါဟာ အာပေါလုရဲ့ တမဲ့၊” နှော့-က် တယော့-က်ဟုလည်း “ငါဟာ ကေဖရဲ့တမဲ့၊” “ငါဟာ ခရစ်တော်တမဲ့” ဖြစ်ဟယ် ဆိုဘီး နန်းနို့ရှင်းရှင်း ပြောနေဂေဟူကြောန့် ငါပြောရဟူ ဇာဖြစ်ဟယ်။

၁၃ ခရစ်တော်ဟာ ကွဲပြားဟူကြောင့်*လော။ ပေါလုဟု နန်းနို့လေတွပ် လတ်ဝါးကပ်တိုင်မာ သေခံဟူဇာလော။ အယ်မျိုးမှုဘဲနေဟာ ပေါလုရဲ့ နာမန ဗတုတိဇံခံဂေဟို ကြောင့်လော။

၁၄ ငါဟာ ကရိပုပုန ဂါယုဟုလွဲဘီး နန်းနို့လေထဲဟု ဖယ်သူဟိုမှလည်း ဗတုတိဇံပေးဘဲကြောင့် ဘုရားသခင် ရဲ့ကျေးဇူးတော်ဟို ချီးမွမ်းပါဟယ်။

၁၅ အယ်ကြောင့် နန်းနို့လေဟာ ငါ့နာမန ဗတုတိဇံဟို ခံ ဟယ် ဆိုဘီး ဖယ်သူလည်း ပြောဇာကြောန်း မှေ့ဟု။

၁၆ (ငါဟာ သတေဖန်ရဲ့ အီသူအီသားလေဟို ဗတုတိဇံ ပေးဟယ်။ နှော-က်ထပ် ဖယ်သူလေဟို ဗတုတိဇံပေးဟု ယ် ဆိုဇာ ငါမှတ်မိဟွမ်း။)

၁၇ ခရစ်တော်ဟာ ဗတုတိဇံပေးဟို့တွပ် ငါ့ဟို စေလွှတ် ဟူဇာ မှဟု။ အယ်ဘောမဲ့လည်း ခရစ်တော်ရဲ့ လတ်ဝါးကပ် တိုင် တရားဟို ချည်းနှီးသတ်သတ် ဖြစ်ဘဲနေအောန် လူ လေရဲ့ ဉာဏ်ပညာန ယှဉ်ဟူ စကားဟို သုံးပြုဘဲ ဒန်းကော န်းဟို ပြောဟို့တွပ် ငါ့ဟို စေလွှတ်ဇာဖြစ်ဟယ်။

ဘုရားသခင်ရဲ့ တဂိုးတော်န ဉာဏ်ပညာ ဖြစ်တော်မူ ဟူ ခရစ်တော်

* ၁:၁၃ ၁.၁၃ ခရစ်တော်ဟာ ကွဲပြားဟူကြောင့်၊ တချို့ မူရင်းလတ်ရေးမူလေမာ ခရစ်တော်ဟာ ကွဲပြားနိုင်ဟု၊ ဆိုဘီး ပါရှိဟယ်။

၁:၁၄ ၁.၁၄ က တ ၁၈.၈: ၁ တ ၁၉.၂၉: ရော ၁၆.၂၃ ၁:၁၆ ၁ ကော ၁၆.၁၅

18 ဖြားဖြစ်ကြောန့်နူးဆိုဟာ လတ်ဝါးကပ်တိုင်တော်န ဆိုင်ဟူ တရားစကားဟာ ပျစ်စီးရှင်းဟို့ ရော့-က်ဟူ သူ လေတွပ် မိုက်မဲဟူရာ ဖြစ်ဟူလည်းဘဲ ကယ်တန်ရှင်းခံ ရဟူ နို့လေတွပ်ဟု ဘုရားသခင်ရဲ့ တဂိုးတော်ဖြစ်လေဟု ယ်။

19 ဖြားဖြစ်ကြောန့်နူးဆိုဟာ ကျမ်းစာလာဟူဇာဟု၊
“ပညာရှိလေရဲ့ ပညာဟို့ ငါဖျစ်ဆီးမယ်။
ဉာဏ်ကောန်းဟူသူလေရဲ့ ဉာဏ်ဟို့လည်း ငါဖယ်ရှား
မယ်” ဆိုဘီး လာလေဟယ်။

20 အယ်မျိုးဖြစ်ဟယ် ဆိုဟာ၊ ပညာရှိဟူသူဟု ဖယ်မာ ရှိနူး။ ကျမ်းပြုဆရာဟု ဖယ်မာရှိနူး။ လောကီရေးရာ မာ ကျမ်းကျင်သူလေဟာ ဖယ်မာရှိနူး၊ ဘုရားသခင်ဟာ လောကီပညာလေဟို့ မိုက်မဲစေတော်မူဟယ် မူဟုလော။

21 ဖြားဖြစ်ကြောန့်နူးဆိုဟာ ဘုရားသခင်ဟာ သူ့ ရဲ့ ဉာဏ်ပညာ တော်အားဖြင့် စီရင်ဟူးဟူ ကြောန့်၊ လောကသားလေဟာ သူးနို့ရဲ့ပညာအားဖြင့် ဘုရားသခင်ဟို့ သိဘဲနနေဟူ ခီမာ ဘုရားသခင်ဟာ ယောင်ကြည်ဟူ သူလေဟို့ မိုက်မဲဟူဒေသနာ ဟောပြောရှင်းအားဖြင့် ကယ် တန်ဟို့တွပ် စေတနာတော်ရှိလေဟယ်။

22 ယုဒလူမျိုးလေဟု နိမိတ်လတ်ခဏာဟို့ တောန်းခံတတ်ဂေဟယ်။ လူမျိုးခြားလေဟု ဉာဏ်ပညာဟို့ ရှာဂေလေဟယ်။

23 နို့လေဟု လတ်ဝါးကပ်တိုင်မာ သေခံတော်မူဟူ

ခရစ်တော်ရဲ့ ကြောန်းဟို့ ဟောပြောလေဟယ်။ အယ်မူ
ကြောန်းရာဟာ ယုဒလူမျိုးလေတွပ် မှားယွင်းဟူကြောန်း
ဖြစ်ဘီး၊ လူမျိုးခြားလေတွပ်ဟု မိုက်မဲဟူကြောန်း ဖြစ်ဟု
ယ်။

24 အယ်ဘေမဲလည်း ယုဒလူမျိုးဘဲဖြစ်ဖြစ်၊ လူမျိုးခြား
လေဘဲဖြစ်ဖြစ် ဝီးကော့-က်ရှင်းဟို့ ခံရဟူသူလေတွပ်ဟု
ဘုရားသခင်ရဲ့ တဂိုးတော်န ဘုရားသခင်ရဲ့ ပညာတော်ဖြ
စ်ဟူ ခရစ်တော်ရဲ့ တရားဖြစ်လေဟယ်။

25 ဘုရားသခင် ရဲ့ မိုက် မဲ ဟူ ဇာ ဟာ လူ လေ ရဲ့
ဉာဏ်ပညာထတ် ပိုဘီး ပညာရှိလေဟယ်။ ဘုရားသခင်
ရဲ့ အားနဲချစ်ဟာ လူလေရဲ့ စွမ်းထတ် ပိုဘီး စွမ်းအားကီး
ဟယ်။

26 ညီကို မောန်နှမလေ၊ နန်းနို့ဟို့ ဝီးကော့-က်ဟူ ကြော
န်းရာဟို့ ပုလန်ဘီး ဆင်ခြင်ကေ့ဂေ့ပါ။ လူ့အမြင်အားဖြင့်
ပြောရမယ် ဆိုဟာ နန်းနို့လေဟို့ ခေါ်ဟူဇာဟာ ပညာရှိ
ဟူသူလေ၊ အသရေရှိဟူသူလေ၊ မန်းမျိုးမန်းနွယ်လေ
လော့-က်ဘီးပါဟယ်။

27 အယ်ဘေမဲ ဘုရားသခင်ဟာ သူ့ရဲ့ ကြံစည် ရည်ရွယ်
ချစ်အားဖြင့် ပညာရှိလေဟို့ ယှစ်ရစေဟို့တွပ် လောကမာ
မိုက်မဲဟူသူလေဟို့ ဝီးကော့-က်တော်မူဟယ်။ စွမ်းသတ္တိ
ရှိဟူ လူလေဟို့ ယှစ်ရစေဟို့တွပ် လောကမာ အားနဲဟူ သူ
လေဟို့ ဝီးကော့-က်တော်မူဟယ်။

28 နော့-က်ဘီး မြတ် ဟူသူလေဟို့ ဖယ်ရှားဟို့တွပ်

လောကမာ ဆင်းရဲဟူသူ၊ ရေရာဘဲဟူသူ၊ ယုတ်ညံ့ဟူသူ
လေဟို့ ဘုရားသခင် ဝီကော့-က်တော်မူဟယ်။

29 အယ်မျိုးဖြစ်ကြောန့် ဘုရားသခင်ရဲ့ ရှေ့တော်မာ
ဖယ်လူလည်း ဝါကြွားဟို့ကြောန့် မှေ့ဟူ။

30 နန်းနို့လေဟာ ဘုရားသခင်အားဖြင့် ယေရှုခရစ်တော်
နှိုက် တည်နေဂေ့ဟယ်။ အယ်သခင်ဟာ နို့လေတွပ်
ဘုရားသခင်နားဟုလာဟူ ဉာဏ်ပညာ ဖြစ်တော်မူဘီး
ဖြောန့်မတ်ရှင်း၊ သန်ရှင်းရှင်းန ဝီနှုကယ်တန်ရှင်း ဖြစ်
တော်မူလေဟယ်။

31 အယ်ကြောန့် ကျမ်းစာဟု “ဝါကြွားဟူသူဟာ
ဘုရားသခင်အားဖြင့်ဘဲ ဝါကြွားပါစေ” ဆိုဘီး ပြောဟွား
ဟယ်။

2

ခရစ်တော် သေခံတော်မူဟူကြောန့်ဖြစ်ဟူ တရား
တော်

1 ညီကို မောန်နှမလေ၊ ငါဟာ နန်းနို့လေနားဟို့ ရော့-က်
လာဟူ ခီမာ ထူးမြတ်ဟူစကားန ထူးမြတ်ဟူပညာအားဖြင့်
ဘုရားသခင်ရဲ့ နတ်နဲဟူ သမ္မာတရားဟို့* နန်းနို့လေဟို့
ဟောပြောဇာ မူဟူ။

2 ဖြားဖြစ်ကြောန့်နဲ့ဆိုဟာ ငါဟာ နန်းနို့လေနတူးဒူ ရှိနေ
ခီဟု ယေရှုခရစ်တော်ရဲ့ကြောန့် ထူးသဖြင့် လတ်ဝါးကပ်

* 2:1 ဂ.၁ ဘုရားသခင်ရဲ့ နတ်နဲဟူ သမ္မာတရားဟို့၊ တချို့
မူရင်းလတ်ရေးမူလေမာ ဘုရားသခင်ရဲ့ သတ်သေလေ၊ ဆိုဘီး ပါရှိဟယ်။

တိုင်မာ သေခံဟူ ကြောန်းရာဟုလွဲဘီး တခြားဖယ်ဇာလေ
ဟူမှ သိမှတ်ဘဲနေဟို့တွပ် ဆောင်းဖြတ်ဟူးပါဟယ်။

^၃ အယ်ကြောန့် နန်းနို့လေန ငါတူးဒုဂ်ဟူခီဟု အားနဲဘီး
ကြော့-က်ရွံ့ တူလောက်မှုန နေရဟယ်။

^၄ ငါဟောပြောဟူ တရားစကားဟာ လူလေရဲ့ ပညာ
အားဖြင့် တည်ဘီးပြော ဟူဇာ မှုဟု။ ဘုရားသခင်ရဲ့
ဝိညာဉ်တော် တဂိုးပါဟူ စကားလေဟို့ဘဲ ငါဟောပြော
ဟယ်။

^၅ အယ်ကြောန့် နန်းနို့လေရဲ့ ယောင်ကြည်ရှင်းဟာ လူ
လေရဲ့ ဉာဏ်ပညာထတ်မာ တည်ဟူဇာမူဘဲန ဘုရားသခင်
ရဲ့ တဂိုးထတ်မာဘဲ တည်ဟူဇာဖြစ်ဟယ်။

ဘုရားသခင်ရဲ့ ဉာဏ်ပညာတော်ကြောန်း

^၆ အယ်ဘေမဲ့လည်း နို့လေဟာ စောင်လင်ဟူသူလေထဲ
မာ ပညာစကားဟို့ပြောဆိုဟယ်။ အယ်ဘေမဲ့ အယ်ပညာ
ဟာ လောကီပညာဟို့ ပြောရှင်ဇာ မှုဟု။ ပယ်ဖျစ်ခံရမယ့်
လောကီမန်းလေရဲ့ ဉာဏ်ပညာလည်း မှုဟု။

^၇ အယ်လောက တည်ခန်ကဒဲဟု နို့လေရဲ့ ဖောင်းသရေ
တော်ဖြစ်ဟို့တွပ် ဘုရားသခင်စီရင်ဟူးဟူပညာ၊ နတ်နဲဟူ
ရာနှိုက် ဝှတ်ဟူးဟူ ဘုရားသခင်ရဲ့ပညာဟို့ နို့လေပြသ
ဂေဟယ်။

^၈ အယ်ပညာဟို့ လောကီမန်းလေ တယော့-က်လည်း
သိဂေဟု။ တကယ်ဟို့ သိမယ် ဆိုဟာ ဖောင်းကီးတော်မူ

ဟူ အယ်သခင်ဟို့ လတ်ဝါးကပ်တိုင်မာ တန်သတ်ဂေဟို့ မူဟူ။

⁹ အယ်ဘေမဲ့လည်း ကျမ်းစာလာဟူတိုင်းဘဲ

“ဖယ်သူလည်းဘဲ မြင်ဖူးဟု၊

ဖယ်သူလည်း ကြားဖူးဟု၊

ဖယ်သူလည်း စိန်လောင်းထဲဟု ကြံစည်သေးဘဲဟူ
ရာလေဟို့ ဘုရားသခင်ဟာ သူဟို့ ရှစ်ဟူ သူလေ
တွပ် ပြင်ဆင်ဟူးလေဟယ်။”

¹⁰ အယ်ဘေမဲ့[†] ဘုရားသခင်ဟာ အယ်ရာလေဟို့ သူ့ရဲ့
ဝိညာဉ်တော်အားဖြင့် နို့လေဟို့ ဖော်ပြပေးတော်မူဟယ်။
ဝိညာဉ်တော်ဟုလည်း ဘုရားသခင်ရဲ့ နတ်နဲဟူ ရာလေထိ
အောက် ရှိမျှလောင်းဟို့ စစ်တော်မူဟယ်။

¹¹ နို့လေရဲ့ ထဲမာရှိဟူ နတ်နဲဟူ ကြောန်းရာလေဟို့ နို့လေ
ရဲ့ စိဝိညာဉ်ဟုလွဲဘီး ဖယ်သူဟု သိဟို့ကြောန်းနူး။ အယ်
မူတိုင်းဘဲ ဘုရားသခင်ရဲ့ နတ်နဲဟူ ကြောန်းရာလေဟို့
ဘုရားသခင်ရဲ့ ဝိညာဉ်တော်ဟုလွဲဘီး ဖယ်သူလည်း သိ
နိုင်ဟူ။

¹² နို့လေဟာ အယ်လောကန ဆိုင်ဟူ ဝိညာဉ်ဟို့ ခံယူဂေ
ဟူဇာ မူဟူ။ ဘုရားသခင် ပေးတော်မူဟူ ရာလေဟို့ သိဟို့
တွပ် ဘုရားသခင်နားဟု ကြွလာဟူ ဝိညာဉ်တော်ဟို့ ခံရ
ဂေဇာဖြစ်ဟယ်။

¹³ ဘုရားသခင် ပေးတော်မူဟူ ရာလေဟို့ နို့လေဟာ လူ့

[†] 2:10 ဂ.၁၀ အယ်ဘေမဲ့၊ တချို့ မူရင်းလတ်ရေးမူလေမာ တွပ်၊ ဆိုဘီး
ပါရှိဟယ်။

ရဲ့ ပညာအားဖြင့် ဟောပြောဟူ၍ မဟုတ်။ အယ်ဘေမဲ့ သန့်ရှင်းဟူ၍ ဝိညာဉ်တော်ဟု ဝိညာဉ်န စပ်ဆိုင်ဟူ ရာ † ဟို့ ဝိညာဉ် စကားအားဖြင့် ဖွဲ့မြဲပြဘီး ပဲ့ပြင်တော်မူဟူ စကားအားဖြင့် နို့လေဟောပြောဟုယ်။

14 ဇာတိလူဟာ ဘုရားသခင်ရဲ့ ဝိညာဉ်ရေးရာန ဆိုင်ဟူ ရာလေဟို့ ခံယူဟူ။ ဖြားဖြစ်ကြောန့်နူးဆိုဟာ အယ်မူရာလေဟာ သူ့တွပ် မိုက်မဲဟူ ဇာလေဖြစ်ဟုယ် ဆိုဘီး ထန်မှတ်တတ်လေဟုယ်။ အယ်မူရာလေဟို့ ဝိညာဉ်တော်အားဖြင့်ဘဲ ပိုင်းခြားဘီး နားလည်နိုင်ဟူကြောန့် ဇာတိလူဟာ နားလည်ဟူ။

15 ဝိညာဉ်လူဟာ အယ်မူဇာလေ ဂူလောင်းဟို့ ပိုင်းခြားဘီး နားလည်တတ်ဟုယ်။ အယ်ဘေမဲ့ အယ်သူဟို့ ဖယ်သူလည်း ပိုင်းခြားဘီး သိနိုင်ဟူ။

16 ဖြားဖြစ်ကြောန့်နူးဆိုဟာ ကျမ်းစာဟု ဘုရားသခင်ရဲ့ စိတော်ဟို့ ဖယ်သူသိနူး။

ဖယ်သူဟာ ကိုယ်တော့်ဟို့ ကြံဉာဏ်ပေးနိုင်နူး ဆိုဘီး ဖော်ပြဟူးလေဟုယ်။ အယ်ဘေမဲ့ နို့လေဟာ ခရစ်တော်ရဲ့စိဟို့ ခံရဂေဟုယ်။

3

ဘုရားသခင်ရဲ့ စေခံလေကြောန့်

† 2:13 ဂ.၁၃ ဝိညာဉ်န စပ်ဆိုင်ဟူ ရာ၊ အယ်မျိုးမူဘဲနေဟာ ဝိညာဉ်တော်ပေးဟူ စကား။

¹ ညီကို မောန့်နှမလေ၊ တကယ်ဒမ်းဆိုဟာ ငါဟာ နန်းနို့လေဟို ဝိညာဉ်လူလေဟို ဟောပြောဟူမျိုး ပြောဟိုမရဘဲ၊ ဇာတိလူဖြစ်ဟူ လောကသားလေမျိုး၊ ခရစ်ယာန်သတ်တာမာ ယေရှုခရစ်တော်နှိုက် သာဂန်းဟားလေမျိုးဘွဲ့ နန်းနို့ဟို ဟောပြောရဟယ်။

² ခုထုတ်ထိ နန်းနို့လေဟာ မာဟူစာဟို မစားနိုင်သေးဘဲကြောန့် ငါဟာ နို့ဟိုဘွဲ့တိုက်ရဟယ်။ ခုလည်းဘွဲ့ နန်းနို့လေဟာ မာဟူစာဟို စားနိုင်သေးဟူ။

³ ခုလည်း နန်းနို့လေဟာ ဇာတိလူဖြစ်ရဲသေးဟယ်။ ရှင်းရှင်း မနာလိုဟူဇာလေ၊ ကွဲပြားဟူဇာလေ၊ ဂေါင်ပြိုင်ဟူဇာလေ၊ ရန်ဖြစ်ဟူဇာလေဟာ ဇာတိလူလေ ဖြစ်ရဲသေးဟယ် မူဟုလော။ လောကီထောင်းစံတိုင်းဘွဲ့ နန်းနို့လေ ကျင့်သောင်းနေရဲဇာ မူဟုလော။

⁴ ဖြားဖြစ်ကြောန့်နူးဆိုဟာ တယော့-က်ဟု “ငါဟာ ပေါလုတမဲ့ ဖြစ်ဟယ်။” နော့-က်တယော့-က်ဟုလည်း “ငါဟာ အာပေါလုတမဲ့ ဖြစ်ဟယ်” ဆိုဘီး နန်းနို့လေ ပြောဆိုနေရဲဇာဟာ လောကသားလေမျိုးဘွဲ့ ပြုမူနေရဲဇာဘွဲ့ မူဟုလော။

⁵ အာပေါလုဟု ဖယ်သူနူး။ ပေါလုဟုလည်း ဖယ်သူနူး။ နို့လေဟာ နန်းနို့ ယောင်ကြည်လာဟို့တွပ် ဟောပြောသတ်သေခံဟူ ဓမ္မမူတော်ဆောက်ဘွဲ့ ဖြစ်ဟယ်။ နို့လေဂူလောင်းဟာ သခင်ဘုရားရဲ့ မူတော်ဟို့ စေခံလောက်ဆောက်ဟူ သူ

လေဘဲဖြစ်ဟယ်။

⁶ ငါဟာ စိုက်ပျိုးဟူ သူဖြစ်ဟယ်။ အာပေါလုဟု ရေ
လောင်းဟူ သူဖြစ်ဟယ်။ ပန်ဟို ပေါ့-က်စေဘီး ကီးထွား
စေသူဟု ဘုရားသခင်ဘဲ ဖြစ်ဟယ်။

⁷ စိုက်ပျိုးဟူ သူနု ရေလောင်းဟူ သူဟု ဖြားဇာလည်း
တတ်နိုင်ဟူ။ ပန်ဟို ကီးထွားစေဟူ ဘုရားသခင်ဟုဘဲ ရှိ
မျှလောင်းဟို တတ်နိုင်တော်မူဟယ်။

⁸ စိုက်ပျိုးဟူ သူနု ရေလောင်းဟူ သူဟာ တလောင်းတ
ဝဒဲ ဖြစ်ဘီး လူတိုင်းဟာ ကိုယ်ကြိုးစား လောက်ဆောန်
တိုင်း ကျိုးဟို ခံရလေ့မယ်။

⁹ နို့လေဟာ ဘုရားသခင်နားမာ လောက်လောက်ဟူ
လောက်ဖော်ဆောန်ဖတ်လေ ဖြစ်ဟယ်။ နန်းနို့လေဟာ
ဘုရားသခင်ရဲ့ ဥယျာဉ်တော် ဖြစ်ဂေဟယ်။

ဘုရားသခင်ရဲ့ ကုလောင်းတော်တိုက်လည်း ဖြစ်ဂေဟ
ယ်။

¹⁰ ငါ့ဟို ဘုရားသခင်ပေးအပ်တော်မူဟူ ကျေးဇူးတော်
တိုင်း ပညာရှိဟူပရံဆရာမျိုး အုပ်စုဟို ခုလဟားဘီ။
တခြားသူလေဟာ ထပ်ဆစ်ဘီး တည်ဆော့-က်လေဟ
ယ်။ အယ်ဘေမဲ့ ဖယ်မျိုးထပ်ဆစ်ဘီး တည်ဆော့-က်ဟူ
ဆိုဇာဟို လူတိုင်းဒိပြုရမယ်။

¹¹ ဖြားဖြစ်ကြောနဲ့ဆိုဟာ ယေရှုခရစ်တော်ဖြစ်ဟူ ခု
လဟားဘီးဟူ အုပ်စုဟုလွဲဘီး၊ တခြားအုပ်စုဟို ဖယ်သူ

လည်းမခံနိုင်ဟူ။

12 အယ်မူအုပြစ်ထတ်မာ ရွှေ၊ ငွေ၊ ကုလော့-က်မြတ် ရတနာ၊ သစ်သား၊ ဖြစ်ပန်၊ ကော့-က်ရိုးလေန ထပ်ဆစ် ဘီး တည်ဆော့-က်ဟူသူရှိဟူမျှ။

13 လူတိုင်းလောက်ဟူ လောက်ဟာ ထန်ရှားလေ့မယ်။ ဖြားဖြစ်ကြောန်နူးဆိုဟာ ဖော်ပြဟူနေရစ်ဟာ မီးအားဖြင့် ထန်ရှားစေလေ့မယ်။ လူတိုင်းလောက်ဟူ လောက်ဟာ ဖယ်မျိုးလောက် ဖြစ်ဟုယ်ဆိုဇာဟို မီးဟာစစ်ဆေးလေ့ မယ်။

14 အယ်မူအုပြစ်ထတ်မာ ထပ်ဆစ်ဘီး တည်ဆော့-က် ဟူ သူရဲ့လောက်ဟာ တည်မြဲဟုယ် ဆိုဟာ၊ အယ်သူဟာ ကျိုးရလေ့မယ်။

15 အယ်ဘေမဲ့ ယော့-က်ယော့-က်လောက်ဟူရာဟာ မီးလောန်ဟုယ် ဆိုဟာ ရှောင်းခံရလေ့မယ်။ အယ်ဘေ မဲ့လည်း သူကိုယ်တိုင် မီးနလွတ်ဟူသူမျိုး ကယ်တန်ရှင်း ဟို ခံရလေ့မယ်။

16 နန်းနို့လေဟာ ဘုရားသခင်ရဲ့ ဗိမာန်တော် ဖြစ်ဟုယ် ဆိုဟူဇာန ဘုရားသခင်ရဲ့ ဝိညာဉ်တော်ဟာ နန်းနို့လေထဲ မာ ကိန်းဝပ်နေဟုယ် ဆိုဇာဟို နန်းနို့လေ သိဂေဟုလော။

17 ဘုရားသခင်ရဲ့ ဗိမာန်တော် ဟို ဖျစ်ဆီးဟူသူ ဟို ဘုရားသခင် ဖျစ်ဆီးလေ့မယ်။ ဘုရားသခင်ရဲ့ ဗိမာန် တော် ဆိုဇာဟာ သန်ရှင်းရဟုယ်။ နန်းနို့လေလည်း အယ်

ဗိမာန်တော် ဖြစ်ပေဟုယ်။

18 ဖယ်သူလည်းဘဲ ကိုယ့်ကိုယ်ကိုယ် လှည့်ဇားစေန။
နန်းနို့လေမာ ယော့-က်ယော့-က်ဟု ငါဟာ အယ်လောက
ရဲ့ ပညာရှိဖြစ်ဟယ် ဆိုဘီး ထန်မှတ်ဟယ် ဆိုဟာ အယ်
လူဟာ ပညာရှိဖြစ်ဟို့တွပ် မိုက်မဲဟူသူ ဖြစ်ပါစေ။

19 ဖြားဖြစ်ကြောန့်နူးဆိုဟာ အယ်လောကရဲ့ ဉာဏ်ပ
ညာဟာ ဘုရားသခင်ရဲ့ မျစ်မှော့-က်တော်မာ မိုက်မဲဟူဇာ
ဘဲ ဖြစ်ဟယ်။ ကျမ်းစာဟု “ဘုရားသခင်ဟာ ပညာရှိလေ
ဟို့ ပရိယာယ်အားဖြင့် ဖမ်းဆီးတော်မူဟယ်” ဆိုဘီး လာ
ဟယ်။

20 နှော့-က်ထပ် ကျမ်းစာဟု “ပညာရှိလေရဲ့ ကြံစည်
ဟာ ချည်းနှီးသတ်သတ် ဖြစ်ဟူကြောန့်နူးဟို့ သခင်ဘုရား
သိတော်မူဟယ်” ဆိုဘီး လာဟယ်။

21 အယ်မျိုးဖြစ်ကြောန့် လူလေရဲ့ စွမ်းစန ပတ်သတ်ဘီး
ဖယ်သူလည်း ဝါကြွားစေန။ ဖြားဖြစ်ကြောန့်နူးဆိုဟာ ရှိ
မျှူလောင်းဟာ နန်းနို့လေတွပ် ဖြစ်ဟယ်။

22 ပေါလုဘဲဖြစ်ဖြစ်၊ အာပေါလုဘဲဖြစ်ဖြစ်၊ ကေဖ
ဘဲဖြစ်ဖြစ်၊ အယ်လောကဘဲဖြစ်ဖြစ်၊ သတ်ရှင်ရှင်းဘဲ
ဖြစ်ဖြစ်၊ သေရှင်းဘဲဖြစ်ဖြစ်၊ မျစ်မှော့-က်ရာဘဲဖြစ်ဖြစ်၊
နှော့-က်ဖြစ်လာတတ်ဟူ ရာဘဲဖြစ်ဖြစ် ရှိမျှူလောင်းဟာ
နန်းနို့လေတွပ် ဖြစ်ဟယ်။

23 နန်းနို့လေလည်း ခရစ်တော်တွပ် ဖြစ်ဟယ်။ ခရစ်
တော်ဟာလည်း ဘုရားသခင်တွပ် ဖြစ်တော်မူဟယ်။

4

ခရစ်တော်ရဲ့ တမန်တော်လေကြောင်း

¹ နို့လေဟာ ခရစ်တော်ရဲ့ မူဆောင် ဖြစ်ဟူ၍ ဇာနည်ဘုရားသခင်ရဲ့ နတ်နဲဟူသမျှတရားဟို့ စောင့်ရှောက်-က်ဟူဘဏ္ဍာထီးဖြစ်ဟူ၍ သူများလေ မှတ်ယူပါစေ။

² အယ်ဘဏ္ဍာထီးဟာ သစ်စာရှိဟူသူ ဖြစ်ဟူကြောင်းဟို့ သိမှတ်ပြုခံရဟူသူဖြစ်ရမယ်။

³ ငါဟာ နန်းနို့လေနားမာဘဲဖြစ်ဖြစ်၊ လူလေရဲ့စဉ်လာနဘဲဖြစ်ဖြစ် စစ်ခံရမယ် ဆိုဟာ ငါမူထားဟဲ့။ ငါဟာ ကိုယ့်ကိုယ်ကိုယ်လည်း စီရင်ဟဲ့။

⁴ ပြားဖြစ်ကြောနဲ့ဆိုဟာ ငါ့ရဲ့ဩတ္တပ္ပစိဟာ ရှင်းရှင်းလန်းလန်းဘဲရှိဟယ်။ အယ်ဘေမဲ့ ငါ့မာပြစ်မေ့ဟု ဆိုဘီးဆိုလိုဟူ၍ မဟဲ့။ ငါ့ဟို့ စစ်ကြောစီရင်သူဟာ သခင်ဘုရားဘဲ ဖြစ်ဟယ်။

⁵ အယ်မျိုးဖြစ်ကြောနဲ့ သခင်ဘုရား ကြွလာခန့် ဖယ်ရာဟို့မှ ခီတန်ဘဲ စီရင်ဂေ့နဲ့။ အယ်သခင်ဟာ မှောန်မိုက်မာကွယ်ဝှပ်ဟားဟူ ရာလေဟို့ လန်းရောန်ထဲဟို့ ယူဆောန်လာဘီး စိန်လောင်းကြံစည်လေဟို့ ထန်ရှားစေတော်မူလေ့မယ်။ အယ်ခီမာ လူလေဟာ ဘုရားသခင်နားဟု ချီးမွမ်းဟူ၍ ခံရလေ့မယ်။

⁶ ညီကို မောန်နှမလေ၊ နန်းနို့လေဟာ ကျမ်းစာဟို့ ကျော်လွန်ဘီး သူများလေဟို့ ရှိသေအပ်ဘဲဇာဟို့ နို့လေဟို့ ထော့-က်ဘီး နားလည်ဂေ့ဟို့တွပ်န မာနထောန်လွှားဟူ

ကြောန့်တယော့-က်ဟို့ မှီဘီး တယော့-က်ဟို့ ထိမဲ့မြင်ပြု
ဘဲနေဟို့တွပ် ငါပြောဟူ ချစ်လေအားဖြင့် နန်းနို့ကျိုးဟို့
ထော့-က်ဘီး ငါန အာပေါလုဟို့ ကြောန်းပြုဘီး ပြောဟူ
ဇာဖြစ်ဟယ်။

7 ဖယ်သူဟု နန်းနို့လေဟို့ သူများထတ် ထူးကဲစေနှိုး။
သူတပါးလတ်ဟုခံယူဘဲန လိုလိုရဟူဇာ တစောင်တခု နန့်
မာရှိလော။ သူတပါးလတ်ဟုခံယူဇာမှန်ဟယ် ဆိုဟာ ခံယူ
ဘဲဟူမျိုး ဖြားဖြစ်ကြောန့် ဝါကြားဟယ်နှိုး။

8 နန်းနို့လေဟာ ရာရာပုလဲဇောင်ဂေဘီ။ နန်းနို့လေ
ကြွယ်ဝဂေဘီ။ နို့လေပါဘဲန မန်းဂီးလေ ဖြစ်ဂေဘီ။ နို့လေ
လည်း နန်းနို့နတူးဒူ စိုးစံနိုင်ဟို့တွပ် နန်းနို့လေ တကယ်မ
န်းဂီးလေ ဖြစ်ဟို့တွပ် လိုရှင်ပါဟယ်။

9 ဘုရားသခင်ဟု တမန်တော်လေဖြစ်ဟူ နို့လေဟို့
နော့-က်ဆောင်းမာထားဘီး သတ်ဟို့ထားဟူးဟူသူလေ
မျိုး ထုပြတော်မူဟယ် ဆိုဘီး ငါထန်ဟယ်။ ဖြားဖြစ်ကြော
န့်နူးဆိုဟာ နို့လေဟာ လောကသားလေန ကောန်းဂန်တမန်
လေရှေ့မာ ပွဲဝမ်ဟူသူလေ ဖြစ်ဂေဟယ်။

10 နို့လေဟာ ခရစ်တော်တွပ်ကြောန့် လူမိုက်ဖြစ်ဂေဟ
ယ်။ အယ်ဘေမဲ့ နန်းနို့လေဟာ ခရစ်တော်နှိုက် ပညာရှိ
လေ ဖြစ်ဂေဟယ်! နို့လေဟာ အားနဲဟူသူလေဖြစ်ဟယ်။
အယ်ဘေမဲ့ နန်းနို့လေဟာ စွမ်းအားရှိသူလေဖြစ်ဟယ်! နို့
လေဟာ အသရေမဲ့ဘဲသူဖြစ်ဟယ်။ အယ်ဘေမဲ့ နန်းနို့
လေဟာ အသရေရှိသူလေဖြစ်ဟယ်!

11 ခုဒိထိ နို့လေဟာ စာရေဇာငတ်ဘီး နေရဟယ်။ ဝတ်စုပဲန နေရဂေဟယ်။ ရိုက်ပုတ်ညှဉ်းဆဲဇာလေဟို ခံရဂေဟယ်။ အီမွေရာမွေန လှည့်လည်သွားဂေရဘီး၊

12 ကိုယ့်လတ်န ပန်ပန်ဗန်းဗန်း လောက်ဆောန်ဂေရဟယ်။ နို့လေဟာ ကီဆဲခံရဟူ ခီမာ ကောန်းဂျီးပေးဂေဟယ်။ ညှဉ်းဆဲခံရခီမာ သီးခံဂေဟယ်။

13 စော်ကားခံရခီမာ တောန်းဗန်ဂေဟယ်။ နို့လေဟာ ခုဒိထိ အယ်လောကရဲ့ပယ်ခံလေ၊ လူတကာလေ စွန်ပစ်ဟားဟူ မှိုက်လေ ဖြစ်ဂေဟယ်!

14 နန်းနို့လေဟို ယှစ်ခွဲရှင်ဟူကြောန့် အယ်မျိုး ငါရေးလိုက်ဟူဇာ မဟူ။ ငါရှစ်ရဟူ သားမီးလေနေန နန်းနို့လေဟို ဒိပေးရှင်ကြောန့် အယ်မျိုး ငါရေးလိုက်ဇာဖြစ်ဟယ်။

15 နန်းနို့လေမာ ခရစ်တော်ကြောန်းဟို သွန်သန်ပေးဟူဆရာလေ ၁၀,၀၀၀ လော့-က်ရှိဟူလည်းဘဲ ဖတယော့-က်ဘဲရှိဟယ်။ ခရစ်တော်ရဲ့ ဒန်းကောန်းအားဖြင့် ငါဟာ ယေရှုခရစ်တော်နှိုက် နန်းနို့လေဟို မိုးဖွားပေးဟူ နန်းနို့လေရဲ့ ဖဖြစ်ဟယ်။

16 အယ်ကြောန့် ငါနေထိုင်ကျင့်သောင်းမျိုး နန်းနို့လေနေဂေဟိုတွပ် ငါတိုက်တွန်းရှင်ပါဟယ်။

17 အယ်ကြောန်းကြောန့် သခင်ဘုရားနှိုက် သစ်စာရှိဟူ ငါရှစ်ရဟူသား တိမောသေဟို နန်းနို့လေနားဟို ငါလွတ်လိုက်ပါဟယ်။ သူဟာ နေရာတိုင်းမာရှိဟူ သင်းတော်

လေမာ ငါသွန်သန်ဟူမျိုး ယေရှုခရစ်တော်နှိုက် ငါလိုက်
ရှော-က်ဟူ လမ်းလေဟို နန်းနို့ဟို ဒီရစေလေ့မယ်။

18 နန်းနို့လေနားဟို ငါလာဟို မူဟု ဆိုဘီး ထန်ဘီးဟာ
နန်းနို့လေထဲဟု တချို့လူလေဟာ မာနထောန်နေဂေဟယ်။

19 အယ်ဘေမဲ့ သခင်ဘုရားလိုတော်ရှိဟယ် ဆိုဟာ နန်း
နို့လေနားဟို မကြာခန်လာမယ်။ ငါလာဟူ ခီမာ မာနထော
န်ဟူသူလေရဲ့ စကားဟိုမူဘဲန သူးနို့လေရဲ့တဂိုးဟို သိရ
လေ့မယ်။

20 ဖြားဖြစ်ကြောနန်းဆိုဟာ ဘုရားသခင်ရဲ့ နိုင်ငံတော်
ဟာ စကားအားဖြင့်တည်ဇာ မူဟု။ တဂိုးအားဖြင့်ဘဲ တ
ည်ဟူဇာဖြစ်ဟယ်။

21 ငါဟာ ကီလောင်းဟိုကိုင်ဘီး နန်းနို့လေနားဟို လာ
ရဟိုလော။ အယ်မျိုးမူဘဲနေဟာ မြစ်တာနဖြစ်ဖြစ်၊ နူးညံ့
သီမွေဟူစိနဖြစ်ဖြစ် လာရဟိုလော။ နန်းနို့ ဖြားဇာဟို လိုရှ
င်ဂေ့နူး။

5

ကိုယ်ကျင့်တရား ဖော့-က် ပုလန်ဟူ သင်းသား လေ
ကြောန်း

1 ခု နန်းနို့လေထဲမာ ကိုယ့်ဖမယားငယ်န မှားယွင်းဟူ
တရားဘဲဟူ မေထုန်ပြုဟူဒန်းဟာ ပုလုံနို့နေဟယ်။ အယ်
မျိုး တရားနညီဘဲဟူ မေထုန်ပြုဟူဇာဟာ လူမျိုးခြားလေ
ထဲမာဟိုဘဲ မွေဟု။

၂ နန်းနို့လေဟာ ဝန်းနဲဘီး အယ်မျိုးလွန်ကျူးဟူသူဟို နန်းနို့လေထဲဟာ ဖယ်ရှားရမယ့်စား မာနထောန်လွှားဘီး နေ နေဂေဟယ်။

၃ ငါဟာ ကိုယ်ခန္ဓာအားဖြင့် နန်းနို့နက္ခာဘီး နေရလည်း ဘဲ စိဝိညာဉ်အားဖြင့် နန်းနို့လေနတူးဒူ ရှိနေဟယ်။ အယ် နေရာမာ တူးဒူရှိနေဘီး အယ်နေရာမာ တူးဒူရှိနေမျိုး အယ် မူဟို လောက်ဟူသူဟို စီရင်ဟားလေဘီ။

၄ နို့လေရဲ့ သခင်ယေရှုခရစ်ရဲ့ နာမတော်အားဖြင့် နန်း နို့စုဝီးဟူ ခီမာ ငါ့ရဲ့ စိဝိညာဉ်ဟာလည်း နို့လေရဲ့ သခင် ယေရှုရဲ့ တဂိုးတော်အားဖြင့် နန်းနို့နတူးဒူရှိဘီး၊

၅ အယ်သူရဲ့ ဝိညာဉ်ဟာ သခင်ယေရှုခရစ်ရဲ့ တရားစီရင် ဟူ နေရစ်မာ ကယ်တန်ရှင်းရအောက် သူရဲ့ ကိုယ်ခန္ဓာ ပျစ် စီးဟို့တွပ် စာတန်လတ်ဟို့ အပ်ဂေဆိုဘီး ငါစီရင်ဟယ်။

၆ နန်းနို့လေ ဝါကြွေးမှုဟာ ကောင်းဟူဇာ မူဟု။ “တဆေး နဲနဲဟာ မုညစ်တမောင်းလောင်းဟို့ ဖောင်းပွစေတတ်ဟယ်” ဆိုဘီး ပြောဟားဟူ ဆိုရိုးစကားဟို့ နန်းနို့လေသိဂေ ဟယ်။

၇ နန်းနို့လေဟာ တဆေးမဲ့ဖြစ်ဟူကြောန့် သစ်ဟူ မုညစ် ဖြစ်ဟို့တွပ် ဟောင်းဟူတဆေးဖြစ်ဟူ ဒုစရိုက်ပြစ်လေ ဟို့ ဖယ်ရှားပစ်ဂေပါ။ ဖြားဖြစ်ကြောန့်နူးဆိုဟာ နို့လေ ရဲ့ သိုးသားဂန်းဟားဖြစ်ဟူ ခရစ်တော်ဟာ ပသခါပွတော် တွပ် ယဇ်ပူဇော်ဟို့ သေသတ်ဟူဇာဟို့ ခံရလေဘီ။

⁸ အယ်ကြောန့် နို့လေဟာ တဆေးဟောင်းဖြစ်ဟူ ဆိုးညစ်ဟူဇာလေ၊ မိုက်မဲဟူဇာလေရဲ့ တဆေးပါဟူမူအားဖြင့်မူဘဲ သန့်ရှင်းစင်ကြယ်မှုနု သမ္မာတရားဖြစ်ဟူ တဆေးပါဘဲဟူမူနု ပသခါပွဲဟို့ ကျင်းပဂေဇို။

⁹ စဒူးဟု နန်းနို့လေနားဟို့ ငါရေးလိုက်ဟူစာမာ ကာမဂေါင်လိုက်စားဟူ သူလေန ပေါန်းဘဲနေဂေဟို့တွပ် ငါမှာဟူးဟယ်။

¹⁰ အယ်မျိုးပြောဇာဟု အယ်လောကမာရှိဟူ ကာမဂေါင်လိုက်စားဟူသူလေ၊ လောဖကီးဟူသူလေ၊ ခိုးတတ်ဟူသူလေန ရောက်ထုကိုးကွယ်သူလေဟို့ ပေါန်းသင်းဟိုရဟု ဆိုဘီး ဆိုလိုဇာ မူဟု။ သူးနို့လေဟို့ ရှောန်မယ် ဆိုဟာ နန်းနို့လေဟာ အယ်လောကထဲဟုနေ ထွပ်ဟူးရလေ့မယ် ဆိုဘီး ထန်မှတ်ဇာရှိဟယ်။

¹¹ ဆိုလိုဟူဇာဟု ကိုယ့်ကိုယ်ကိုယ် ညီကို ဆိုပြောဘီးဟာ ကာမဂေါင်လိုက်စားဟူသူလေ၊ လောဖကီးဟူသူလေ၊ ရောက်ထုကိုးကွယ်ဟူသူလေ၊ သူများအသရေဟို့ ဖျစ်ဟူသူလေ၊ ယစ်မောသော့-က်စားသူလေန ခိုးဟူသူလေဟို့ ပြောရှင်ဇာဖြစ်ဟယ်။ အယ်မျိုးသူလေန ပေါန်းသင်းလောက်ဂေန တူးဒုထိုင်ဘီးလည်း စားသော့-က်ဂေန။

¹² ဖြားဖြစ်ကြောန်နူးဆိုဟာ ပုလန်ဟုလူလေဟို့ စီရင်ဟူဇာဟာ ငါနု ဖြားဇာဆိုင်နူး။ တွမ်းဟုလူလေဟို့ နန်းနို့ စီရင်ရမယ် မူဟုလော။

¹³ ပုလန်ဟုလူလေဟို့ ဘုရားသခင် စီရင်လေ့မယ်။

“အယ်ဆိုးညစ်ဟူ သူဟို နန်းနို့လေထဲဟု နှိပ်ထုဂေ့ပါ” ဆို
ဘီး ကျမ်းစာဟု ပြောဟူးဟယ်။

6

ညီကိုရှင်းရှင်း တရားစွဲဟူကြောင်း

¹ နန်းနို့လေ ရှင်းရှင်းပြဿနာဖြစ်ဟူ ခီမာ ဘုရားသခင်
ရဲ့ သန်ရှင်းသူလေနားဟုနေဘီး စီရင်ဆောင်းဖြတ်ပေးဇာ
ဟို့ ခံယူဘဲန ယောင်ကြည်ဘဲဟူသူလေရှေ့မာ ခံရဲဟူသူ
ယော့-က်ယော့-က်ရှိလော။

² ဘုရားသခင်ရဲ့ သန်ရှင်းသူလေ ဖြစ်ဟူ နို့လေဟာ
အယ်လောကဟို့ တရားစီရင်ရမယ်ဆိုဇာဟို့ နန်းနို့လေသိ
ဂေ့ဟုလော။ အယ်လောကဟို့ တရားစီရင်ရဟို့သူလေဟာ
အယ်မူ မူကိစသေးငယ်ဟူးဟို့မှ စီရင်ဆောင်းဖြတ်နိုင်ဟု
လော။

³ နို့လေဟာ ကောန်းဂန်တမန်လေဟို့ တရားစီရင်ဂေ့ရ
ဟို့ကြောင်းဟို့ နန်းနို့သိဂေ့ဟုလော။ အယ်မျိုးဖြစ်ဟယ်
ဆိုဟာ အယ်လောကီမူရာလေဟို့ ပိုဘီး စီရင်သင့်ဟယ် မူ
ဟုလော။

⁴ အယ်ကြောန့် နန်းနို့လေဟာ လောကီမူပြဿနာလေ
ဟို့ စီရင်ဟို့တွပ် သင်းတော်ဟု အသရေန့်ဟူသူလေဟို့
တရားသူကြီးနေရာမာ ခန့်ဟူးဂေ့ဟို့လော။

⁵ နန်းနို့လေဟို့ ယှစ်ရအေန် အယ်မျိုး ငါပြောဟူဇာဖြ
စ်ဟယ်။ ခရစ်ယာန်ညီကို မောန်နှမလေရှင်းရှင်း ပြဿနာ

ဖြစ်ဟူ ခီမာ သင်းတော်မာ စီရင်ဆောင်းဖြတ်ပေးနိုင်ဟူ ပညာရှိ ယော့-က်လည်းမေ့ဟူလော။

⁶ ခုဟု ညီကိုရှင်းရှင်း တရားစီရင်ဟူဇာနဏဟု အယ် မှုဟို ယောင်ကြည်ဘဲဟူသူလေရှေ့မာ ပြုမူနေဂေပါလား!

⁷ အယ်မျိုး ရှင်းရှင်းတရားစွဲဂေဟူဇာဟာ နန်းနို့လေ တွပ် ရရာတိုင်း ဆောင်းရှောင်းဟူဇာ ဖြစ်ဟယ်။ အယ် မျိုး တရားစွဲဂေမယ့်စား ညဉ်းဆဲဟူဇာဟို ဖြားဖြစ်ကြော နို့ခံဟိုရဲဂေဟူနူး။ လီလည်လုယူဟူဇာဟို ဖြားဖြစ်ကြောနို့ ခံဂေဟူနူး။

⁸ နန်းနို့လေဟာ အယ်မျိုးခံမယ့်စား ညီကိုရှင်းရှင်းဟို တရားဘဲဇာဟို လောက်ဘီး လီလည်လုယစ်ဂေဟယ်!

⁹ တရားဘဲဟူ လူလေဟာ ဘုရားသခင်ရဲ့ နိုင်ငံတော် ဟို မွီခံရဟို မှုဟု ဆိုဇာဟို နန်းနို့သိဂေဟူလော။ တလဲယူ ဂေန။ ကာမဂေါင် လိုက်စားဟူသူလေ၊ ရောက်ထုဟို ကိုး ကွယ်ဟူသူလေ၊ အီထောန်ရေး ဖော့-က်ပုလန်ဟူသူလေ၊ ယော့-က်ကျားရှင်းရှင်း မေထုန်ပြုဟူသူလေ၊ အယ်မျိုးဇာ ဟိုခံဟူသူ၊

¹⁰ ခိုးဟူသူလေ၊ လောဖကီးဟူသူလေ၊ သော့-က်စား မောယစ်ဟူသူလေ၊ သူများ အသရေဖျစ်ဟူသူလေ၊ လီ လည်လုယူသူလေဟာ ဘုရားသခင်ရဲ့ နိုင်ငံတော်ဟို မွီခံရ ဟို မှုဟု။

¹¹ စဒူးဟု နန်းနို့လေထဲဟု တချို့လူလေဟာ အယ်မျိုး သူလေဖြစ်ဂေဟူလည်းဘဲ ခု သခင်ယေရှု ခရစ်တော်ရဲ့

နာမတော်န ဘုရားသခင်ရဲ့ ဝိညာဉ်တော်အားဖြင့် ပြစ်ဟု
နေ ဆေးကြောရှင်း၊ သန့်ရှင်းရှင်းခံရဘီး ပြောနဲ့မတ်ရာဟို့
ရော-က်ဂေဘီ။

ကိုယ်ခနုဓာဟာ ဘုရားသခင်ရဲ့ ဖောင်းသရေတော်
တွပ် ဖြစ်ဟူကြောင်း

¹² နန်းနို့လေဟု “ငါဟာ ဂူလောင်းဟို့ လောက်ခွမ်ရှိဟု
ယ်” ဆိုဘီး ပြောလေ့မယ်။ နန်းနို့ပြောဟူတိုင်း မှန်ဟု
ယ်။ အယ်ဘေမဲ့ ရှိမျှဂူလောင်းဟာ နန်းနို့တွပ် ကျိုးရှိဟူဇာ
မှုဟု။ ငါဟာ ဂူလောင်းဟို့ လောက်ပိုင်ခွမ်ရှိဟယ်။ အယ်
ဘေမဲ့ ဖယ်မှုရာလေရဲ့ စိုးမိုးဟူဇာဟို့မှ ငါခံဟု။

¹³ “စားဇာဟာ ဝန်းတွပ်ဖြစ်ဟယ်။ ဝန်းဟုလည်း စား
ဇာတွပ်ဖြစ်ဟယ်” ဆိုဘီး ပြောလေ့မယ်။ အယ်ဘေ
မဲ့ ဘုရားသခင်ဟာ အယ်နွေပါးလောင်းဟို့ ဖျစ်ဆီး
လေ့မယ်။ ကိုယ်ခနုဓာဟာ ကာမဂေါင်ခံစားဟို့တွပ်မှုဘဲ
န သခင်ဘုရားတွပ်ဖြစ်ဟယ်။ သခင်ဘုရားဟာလည်း
ကိုယ်ခနုဓာတွပ် ဖြစ်တော်မူဟယ်။

¹⁴ ဘုရားသခင်ဟာ တဂိုးတော်အားဖြင့် သခင်ဘုရား
ဟို့ ရှင်ပုလန်ထမြော့-က်စေဟူမျိုး နို့လေဟို့လည်း တဂိုး
တော်အားဖြင့် ထမြော့-က်စေတော်မူလေ့မယ်။

¹⁵ နန်းနို့လေရဲ့ ကိုယ်ခနုဓာဟာ ခရစ်တော်ရဲ့ ကိုယ်အင်္ဂါ
လေဖြစ်ဟယ် ဆိုဇာဟို့ သိဂေဟုလော။ အယ်မျိုးဆိုဟာ

ခရစ်တော်ရဲ့ ကိုယ်အင်္ဂါဟို့ ယူဘီးဟာ ပြည်တန်ဆာမရဲ့ ကိုယ်အင်္ဂါဖြစ်စေရဟို့လော။ လောင်းဝဖြစ်စေဟု!

၁၆ ပြည်တန်ဆာ မန ပေါ်နိုး ဖော် ဟူ လူ ဟာ အယ် ပြည်တန်ဆာမန တသားတကိုယ်ဒဲ ဖြစ်ဟွားဟယ် ဆိုဇာဟို့ နန်းနို့သိဂေဟလော။ ကျမ်းစာဟု “အယ်သူနွေယော-က်ဟာ တသားတကိုယ်ဒဲ ဖြစ်ရဂေလေ့မယ်” ဆိုဘီး လာဟယ်။

၁၇ အယ်ဘေမဲ့ သခင်ဘုရားနှိုက် မှီဝဲသူဟာ အယ်သခင်န တစိတဝိညာဉ်ဒဲ ဖြစ်ဟယ်။

၁၈ တရားဘဲဟူ မေထုန်ပြုဟူဇာဟို့ ရှောန်ဂေပါ။ လူပြုတတ်ဟူ တခြားပြစ်လေဟာ ကိုယ်ခန္ဓာ ပုလန်ဖတ်မာဘဲရှိဟယ်။ တရားဘဲဟူ မေထုန်ပြုဟူသူဟာ ကိုယ့်ရဲ့ ကိုယ်ခန္ဓာဟို့ ပြစ်မှားဟူဇာ ဖြစ်ဟယ်။

၁၉ ဖြားဖြစ်ကြောန်းနူးဆိုဟာ နန်းနို့လေရဲ့ ကိုယ်ခန္ဓာဟာ ဘုရားသခင်ပေးသနားဟူ ဝိညာဉ်တော်ဖြစ်ဟူ နန်းနို့ထဲမာ ကီးဝပ်ဟူ သန်ရှင်းဟူဝိညာဉ်တော်ရဲ့ ဗိမာန်တော်ဖြစ်ဟူကြောန်းနူး နန်းနို့လေဟာ ကိုယ့်ကိုယ်ကိုယ် ပိုင်ဘဲဟူ ကြောန်းဟို့ သိဂေဟလော။

၂၀ ကိုယ်တော်ဟာ နန်းနို့လေဟို့ ဖိုးခပေးဘီး ဝယ်ဟွားကြောန်း နန်းနို့လေရဲ့ ကိုယ်ခန္ဓာအားဖြင့် ဘုရားသခင်ရဲ့ ဖောင်းသရေတော်ဟို့ ထန်ရှားစေဂေပါ။

7

အီထောန်ပြုရှင်း ပြဿနာ

¹ နန်းနို့ ရေးပေးလိုက်ဟူ ကြောန်းရာန ပတ်သတ်ဘီး
ယော့-က်ကျားဟာ အီထောန်ပြုဘဲ နေနိုင်မယ် ဆိုဟာ
ကောန်းဟယ်။*

² အယ်ဘေမဲ့ တရားဘဲဟူ မေထုန်ပြုဟူ ဇာလေ များ
နေဟူကြောန့် ယော့-က်ကျားတိုင်း ကိုယ့်မယားရှိစေပါ။
မီးမတိုင်း ကိုယ့်လန်ရှိစေပါ။

³ လန်ယော့-က်ကျားဟာ ကိုယ့်မယားဟို့ ပြုသင့်ဟူ ဝ
တ်ဟို့ ပြုရမယ်။ မယားဟာလည်း ကိုယ့်လန်ဟို့ ပြုသင့်
ဟူ ဝတ်ဟို့ ပြုရမယ်။

⁴ မယားဟာ ကိုယ့်ကိုယ်ခနုဓာဟို့ ပိုင်ဟူ။ လန်ဟာဘဲ ပို
င်ဟယ်။ အယ်မျိုးဘဲ လန်ဟာလည်း ကိုယ့်ကိုယ်ခနုဓာဟို့
ပိုင်ဟူ။ မယားဟာဘဲ ပိုင်ဟယ်။

⁵ နန်းနို့ဟာ ဆုတောင်းဟို့တွပ် ခီပေးဟို့ ကြိုတန်ဘော
တူချစ်ရ ရှစ်ဟား ဆိုင်းငံ့ဟားဇာဟာလွဲဘီး နန်းနို့ရဲ့ လန်
မယားဝတ်ဟို့ ပျစ်ကွပ်စေဂေ့န။ ဆုတောင်းဘီးဟူ ခီမာ
အီထောန်ရဲ့ ဆစ်ဆဲရေးဟို့ ပေါင်မှန်တိုင်း ပုလန်နေဂေ့ပါ။
အယ်မျိုးမှဘဲ ကိုယ့်စိဟို့ ချောက်ထီးနိုင်ဘီး စာတန်ရဲ့ သွီး
ဆောန်ဇာဟို့ ခံနိုင်လေ့မယ်။

* 7:1 ၇.၁ ယော့-က်ကျားဟာ အီထောန်ပြုဘဲ နေနိုင်မယ် ဆိုဟာ
ကောန်းဟယ်။ အယ်မျိုးမှဘဲနေဟာ ယော့-က်ကျားဟာ အီထောန်ပြုဘဲန
နေနိုင်မယ် ဆိုဟာ ကောန်းဟယ် ဆိုဘီး နန်ပြောဟယ်။

6 အယ်မျိုး ငါပြောဇာဟာ နန်းနီလေဟို မိန်းပေးဇာမူဘဲ န ခွမ်းပေးဇာဘဲ ဖြစ်ဟယ်။

7 တကယ်ဘဲ လူတိုင်းဟို ငါ့ဟူမျိုးဘဲ ဖြစ်စေရှင်ဟယ်။ အယ်ဘေမဲ့ လူယော့-က်ချင်းစီတိုင်းဟာ ဘုရားသခင်ပေး ဟူ ဆုကျေးဇူးတော်ဟို သီးသီးခံရဂေဟယ်။

8 အယ်မျိုးဖြစ်ကြောန့် အီထောန်မေ့ဘဲသူလေန မောက် ဆိုးမလေဟာ ငါ့ဟူမျိုး တယော့-က်ဒဲ ဆစ်ဘီးနေနိုင်ဟာ ကောန်းဟယ်။

9 အယ်ဘေမဲ့ ကိုယ့်ကိုယ်ကိုယ် ချောက်ထီးနိုင်ဘဲနေဟာ အီထောန်ပြုဂေပါ။ ကိလေသာစိဟို ချောက်တီးနိုင်ဘဲနေ ဟာ အီထောန်ပြုဟူဇာဘဲ ပိုကောန်းလေ့မယ်။

10 အီထောန်ရှိဟူသူလေဟို ငါပညတ်ဟူ ဇာလော့-က်မူ ဘဲ သခင်ဘုရား ပညတ်ဇာဟု မယားဟာ ကိုယ့်ရဲ့ လန်န ကွာရှင်းစေန။

11 အယ်ဘေမဲ့ ကွာရှင်းဟယ် ဆိုဟာ နော့-က်အီထော န်ယူဘဲန နေရမယ်။ အယ်မျိုးမူဘဲနေဟာ ကိုယ့်လန်န ပု လန်ပေါင်းဘီး သင့်သင့်မြတ်မြတ် နေရမယ်။ လန်ဟုလ ည်းဘဲ ကိုယ့်မယားန ကွာစေန။

12 ခြားသူလေဟို (သခင်ဘုရား ပညတ်ဇာမူဘဲန) ငါ ပညတ်ဇာဟု ယောင်ကြည်သူ ညီကိုတယော့-က်ဟာ ယောင်ကြည်သူမူဘဲဟူ မယားရှိဟယ် ဆိုဟာ အယ်မီး

မဟု သူနဆစ်ဘီး ပေါင်းရှင်ဟယ် ဆိုဟာ သူ့ဟို အယ်မီး မန ကွာစေန။

13 အယ်မျိုးဘဲ ယောင်ကြည်သူ မီးမတယော့-က်ဟာ မယောင်ကြည်ဘဲဟူ လန်ရှိဟယ် ဆိုဟာ သူ့လန်ဟု သူန ဆစ်ဘီးပေါင်းရှင်ဟယ် ဆိုဟာ သူ့ဟိုကွာစေန။

14 ဖြားဖြစ်ကြောနဲ့နဲ့ဆိုဟာ ယောင်ကြည်သူမှဘဲဟူ လန်ယော့-က်ကျားဟာ သူ့မယားတွပ် သန်ရှင်းဟယ်။ ယောင်ကြည်ဘဲဟူ မယားဟုလည်း သူ့လန်တွပ် သန်ရှင်း ဟယ်။ အယ်မျိုးမှဘဲနေဟာ နန်းနို့ရဲ့ သားမီးလေဟာ ည စ်ညူးဂေလေမယ်။ အယ်ဘေမဲ့ ခု သူးနို့လေဟာ သန်ရှင်း ဂေဟယ်။

15 အယ်ဘေမဲ့လည်း ယောင်ကြည်ဘဲသူဟာ ကွာရှင်း ရှင်ဟယ် ဆိုဟာ ကွာရှင်းစေ။ အယ်မျိုး ကြောန်းရာဟို ယောင်ကြည်သူ ညီကို မောန်နမလေဟာ လွတ်လွတ်လပ် လပ် ဝီးကော့-က်ခွမ့်ရှိဟယ်။ ဘုရားသခင်ဟာ နန်းနို့လေ ဟို သင့်သင့်မြတ်မြတ်န ငြီးငြီးချမ်းချမ်းနေဂေဟိုတွပ် ခေါ်ဟားဇာဖြစ်ဟယ်။

16 ဝေ့မီးမ၊ နန်ဟာ ကိုယ့်လန်ဟို ကယ်တန်မယ် ကယ် တန်ဟု ဆိုဇာဟို ဖယ်မျိုး သိနိုင်နဲ့။† ဝေ့ယော့-က်ကျား၊ နန်ဟာ ကိုယ့်မယားဟို ကယ်တန်မယ်၊ ကယ်တန်ဟု ဆိုဇာ

† 7:16 ၇.၁၆ ဝေ့မီးမ၊ နန်ဟာ ကိုယ့်လန်ဟို ကယ်တန်မယ် ကယ်တန်ဟု ဆိုဇာဟို ဖယ်မျိုး သိနိုင်နဲ့။ အယ်မျိုးမှဘဲနေဟာ နန်ဟာ ကယ်တန်ခံရမယ် ကယ်တန်ခံရဟု ဆိုဇာဟို ဖယ်မျိုး သိနိုင်ဟိုနဲ့။

ဟို ဖယ်မျိုး သိနိုင်ဟို့နူး။‡

ဘုရားသခင်ဝီးကော့-က်ဟူတိုင်း သတ်ရှင်ပါ

17 လူသီးသီးလေဟာ ကိုယ့်ဟို သခင်ဘုရားပေးဟူ ဆု
ကျေးဇူးတော်လေန ယော့-က်တိုင်းဟို ဘုရားသခင်ခေါ်ဟူ
ခြေနေတိုင်းဘဲ သတ်ရှင်ပါစေ။ အယ်ဇာဟာ သင်းတော်
တိုင်းဟို ငါ့ရဲ့မာကြားချစ် ဖြစ်ဟယ်။

18 ရေဖျားလှီးရှင်းဟို ခံဘီးသူဟာ ဝီးကော့-က်ရှင်း
ခံရဟယ် ဆိုဟာ ရေဖျားလှီးရှင်းနဆိုင်ဟူ မှတ်သားဟို
စွန့်ပစ်ဇာလိုဟူ။ ရေဖျားလှီးရှင်းဟို ခံယူဘဲဟူသူဟာ ဝီး
ကော့-က်ရှင်းဟို ခံရဟယ် ဆိုဟာ ရေဖျားလှီးရှင်းဟို ခံယူ
ဇာလိုဟူ။

19 ရေဖျားလှီးရှင်းခံဟူဇာ ခံဘဲဟူဇာဟုမိက မူဟူ။
ဘုရားသခင်ရဲ့ ပညတ်တော်ဟို စောန့်ထီးဟူဇာဟုဘဲ မိ
ကဖြစ်ဟယ်။

20 လူတိုင်း ဘုရားသခင်ရဲ့ ခေါ်ဟားရှင်းခံရဟူ ခြေနေ
မာဘဲ ဆစ်ဘီး ရှိနေပါစေ။

21 ဝီးကော့-က်ခံရဟူ ခီမာ နန်ဟာ ကျွန်ဖြစ်ဟယ် ဆို
ဟာ စိနော့-က်ယှစ်ဖြစ်စေန။ အယ်ဘေမဲ့ လွတ်မြော့-က်

‡ 7:16 ၇.၁၆ ဝှေယော့-က်ကျား၊ နန်ဟာ ကိုယ့်မယားဟို ကယ်တန်မယ်၊
ကယ်တန်ဟု ဆိုဇာဟို ဖယ်မျိုး သိနိုင်ဟို့နူး၊ အယ်မျိုးမုဘဲနေဟာ နန်ဟာ
ကယ်တန်ခံရမယ် ကယ်တန်ခံရဟု ဆိုဇာဟို ဖယ်မျိုး သိနိုင်ဟို့နူး။

ခွမ်ရမယ် ဆိုဟာ အယ်ခွမ်ရေးဟို့ သောင်းပြုပါ။^၆

²² ဖြား ဖြစ်ကြော နဲ့နဲ့ ဆိုဟာ ကျွန် ဖြစ် ဟူ ခီမာ သခင်ဘုရားနှိုက် ဝီးကော့-က်ခံရဟူသူဟာ သခင်ဘုရား အားဖြင့် လွတ်မြော့-က်ဟူ သူဖြစ်ဟယ်။ အယ်မျိုးဘွဲ လူလွတ်ဖြစ်ဟူ သူဟာ သခင်ဘုရားရဲ့ ဝီးကော့-က်ရှင်း ဟို့ ခံရဟူ ခီမာ ခရစ်တော်ရဲ့ ကျွန်ဖြစ်ဟယ်။

²³ နန်းနို့လေဟို့ ဘုရားသခင်ဟာ ဖိုးခပေးဘီး ဝယ်ဟား ကြောနဲ့ လူလေနားမာ ကျွန်ခံဂေ့န။

²⁴ ညီကို မောန်နမလေ၊ နန်းနို့လေ ဝီးကော့-က်ရှင်း ခံရ ဟူခီဟု ခြေနေတိုင်းဘွဲ ဘုရားသခင်န မိတ်သဟာယဖွဲ့ဘီး ဆစ်နေထိုင်ဂေ့ပါ။

အီထောန်ပြုဘဲသူလေန မောက်ဆိုးမ ပြဿနာကြော
နီး

²⁵ အီထောန်ပြုဘဲသူလေန ပတ်သတ်ဘီး ပြောရမယ် ဆိုဟာ သခင်ဘုရား ပညတ်ဟားဟူဇာ မှော့ဘဲဟူလည်းဘွဲ သခင်ဘုရားရဲ့ ကရုဏာတော်ကြောနဲ့ ယောင်ကြည်ထိုက် ဟူ သူတယော့-က်နေန ငါ့ခံယူချစ်ဟို့ ပြောရမယ် ဆိုဟာ။

²⁶ ခု တို့ကြောင်နေရဟူ ခေတ်ဆိုးခါဆိုးဟို့ ကေ့ဟူဇာ အားဖြင့် ယော့-က်ကျားတယော့-က်ဟာ အယ်ခြေနေတိုင်း ဆစ်ဘီးနေဟူဇာဟာ ပိုကောန်းလေ့မယ်။

§ 7:21 ၇.၂၁ အယ်ဘေမဲ့ လွတ်မြော့-က်ခွမ်ရမယ် ဆိုဟာ အယ်ခွမ်ရေးဟို့ သောင်းပြုပါ။ အယ်မျိုးမှတ်နေဟာ အယ်ဘေမဲ့ နန့်ဟာ လွတ်မြော့-က်ဟို့ ခွမ်ရေးရမယ် ဆိုဟာ နန့်ရဲ့ ကောန်းဆောင်း ခြေနေဟို့ ဝီးကော့-က်ပါ။

၂၇ နန်ဟာ အီထောန်ရှိဟယ် ဆိုဟာ ကိုယ့်မယားဟို့ ခွာ
ဟို့ ကြံစည်န။ အီထောန်မော့ဘဲနေဟာလည်း အီထောန်ပြု
ဟို့တွပ် စဉ်းစားန။

၂၈ အယ်ဘေမဲ့ အီထောန်ပြုဟယ် ဆိုဟာလည်း ပြစ်
ကျူးလွန်ဟူဇာ မူဟ။ အီထောန်မော့ဘဲဟူ မီးမပျိုဟာ
အီထောန်ပြုဟယ် ဆိုဟာ ပြစ်ကျူးလွန်ဇာ မူဟ။ အယ်
ဘေမဲ့ အီထောန်သယ်လေ နေ့တိုင်း တို့ကြောင်ရမယ့်
ကိုယ်ကာယ ဆင်းရဲဒေါက်ခလေန နန်းနို့ဟို့ လွတ်ကင်းစေ
ရှင်ကြောန် အယ်မျိုး ငါပြောရဇာဖြစ်ဟယ်။

၂၉ ညီကို မောန်နမလေ၊ ငါဆိုလိုဇာဟု ခီကာလ ကူဆော
န်းဟမယ် ဖြစ်ဟူကြောန် ခုခီဟုနေစဘီး မယားရှိဟူသူဟာ
မယားမော့ဘဲသူမျိုး၊

၃၀ ငိုဟူသူဟလည်း ငိုဘဲဟူမျိုး၊ ဝန်းသာဟူသူဟလည်း
ဝန်းသာဘဲဟူသူမျိုး၊ ပစ်စီးအောက်စာ ဝယ်ဟူသူလည်း
ဖယ်အောက်စာဟို့မှ ပိုင်ဘဲဟူမျိုး ဖြစ်ရမယ်။

၃၁ လောကအောက်စာ ဘဏ္ဍာဟို့ သောင်းပြုဟူ သူ
လေဟာ သောင်းဘဲမျိုး ဖြစ်ရမယ်။ ဖြားဖြစ်ကြောန်နူးဆို
ဟာ ခုလတ်ရှိ ကမ္ဘာဂီးဟာ တာရှယ်ခံဟို့ မှဘဲကြောန်
ဖြစ်ဟယ်။

၃၂ ငါဟာ နန်းနို့လေဟို့ ပူပန်သောကန ကင်းစေရှင်ဟ
ယ်။ အီထောန်မော့ဘဲဟူ ယော့-က်ကျားဟာ သခင်ဘုရား
နှစ်သက်ဟူမှုဟို့ လောက်ရှင်ကြောန် သခင်ဘုရားရဲ့ မူ
တော်ဟို့ဘဲ လေးနတ်ထားတတ်ဟယ်။

33 အယ်ဘေမဲ့ အီထောန်ရှိဟူ ယော့-က်ကျားဟာ သူ့မယားရဲ့ စိလိုဟို့ လိုက်ဘီး လောကီရေးရာဟို့ဘဲ လေးနတ်ထားတတ်ဟယ်။

34 အယ်ကြောန် သူဟာ စိနွေ့ခွ ဖြစ်ရဟယ်။ မီးမပျိုဟာ သခင်ဘုရားဟို့ သူ့ရဲ့ ကိုယ်ခန္ဓာနု စိဝိညာဉ်နွေ့ခွလောင်းဟို့ သန်ရှင်းမှုနု ဆစ်ကပ်ရှင်ကြောန် သခင်ဘုရားရဲ့ မှုတော်ဟို့ လေးနတ်ထားတတ်ဟယ်။ အယ်ဘေမဲ့ အီထောန်ရှင်မီးမဟာ သူ့လန်နှစ်သက်အောန် စိဆန္ဒရှိကြောန် လောကီမှုရာဟို့ဘဲ လေးနတ်ထားတတ်ဟယ်။

35 အယ်မျိုး ငါပြောဇာဟု နန်းနို့လေရဲ့ကျိုးဟို့ လိုရှင်ကြောန် ပြောဇာဖြစ်ဟယ်။ နန်းနို့လေဟို့ ချောက်ချယ်ရှင်ကြောန် မူဟု။ နန်းနို့ဟို့ မှန်းမှန်ကန်းကန် ပြုသင့်တိုင်း ပြုကျင့်ဟို့တွပ်နု သခင်ဘုရားရဲ့ မှုတော်ဟို့ စိပါလတ်ပါ စေခံနိုင်ဂေဟို့တွပ် လိုလားကြောန်ဖြစ်ဟယ်။

36 စေ့စပ်ဟားဘီးနု အီထောန်ပြုဘဲနု နေဟို့တွပ် ဘောတူဘီး တိုင်တယ်ဟားဟူသူ နွေ့ယော့-က်နု ပတ်သတ်ဘီး ပြောရမယ် ဆိုဟာ ယော့က်ကျားဟာ မီးမပျိုဟို့ သူ့ရဲ့ ပြုမှုပေါင်စံ သင့်တော်ဟု ဆိုဘီး သံဟူ ခီမာဘဲဖြစ်ဖြစ်၊ ကိုယ့်စိဟို့ ထီးချောက်နိုင်ဘဲဟူ ခီမာဘဲဖြစ်ဖြစ် အီထောန်ပြုရဟယ်။ အယ်မျိုးပြုမယ် ဆိုဟာ ပြစ် မှုဟု။*

* 7:36 ၇.၃၆ စေ့စပ်ဟားဘီးနု ... အယ်မျိုးပြုမယ် ဆိုဟာ ပြစ်မှုဟု။ အယ်မျိုးမှဘဲနေဟာ ယော့-က်ကျားနု လတ်ထပ်ရသေးဘဲဟူ မီးမပျိုဟို့ သူဟာ ပေါန်းဟို့ သင့်တော်ဟု ဆိုဘီး စိပိုင်းဖြတ်ဟယ်။ အယ်ဘေမဲ့ အယ်မီးမပျိုဟာ လတ်ထပ်ဟို့ ရွယ်ရော့-က်ဟားဘီ ဆိုဟာ လတ်ထပ်ပေါန်းသင်းနိုင်ဟယ်။

37 အယ်ဘေမဲ့ ကိုယ့်စိန္တလောင်း တည်ကြည်မှုရှိဘီး ပြုရှင်တိုင်း ပြုပိုင်ဟူခွင့်ကို ကိုယ်စီလိုဟို့ ချောက်တီးနိုင်ဟူ ခွင့်ရှိဟူကြောင့် အီထောန်ပြုဘဲန နေဟို့တွပ်[†] စိန္တလောင်းထဲ မာ စီရင်ဆောင်းဖြတ်ဟူသူဟာ ပိုဘီး ကောင်းလေဟယ်။ သူဟာ အယ်မီးမပျိုဟို့ လတ်ထပ်ဟို့[‡] လောင်းဝ ဆောင်းဖြတ်ဟန်း။

38 အယ်ကြောန် ကိုယ့်န စေ့စပ်ဟူးဟူ မီးမပျိုဟို့ လတ်ထပ်ဟူသူဟာ ကောင်းလေဟယ်။ လတ်ထပ်ဘဲနနေဟူ သူဟာလည်း ပိုဘီး ကောင်းလေဟယ်။

39 မီးမဟာ သူ့ရဲ့လန် သတ်ရှင်နေဟူ ဒီကာလပတ်လောင်း တရားအားဖြင့် ချည်နှောင်မှုရှိနေဟယ်။ လန်သေဟူးဟယ် ဆိုဟာ ကိုယ်လိုရှင်ဟူတိုင်း သခင်ဘုရားအား ဖြင့်ဘဲ တခြားသူရဲ့ မယားဖြစ်ဟို့ ခွင့်ရှိလေဟယ်။

40 အယ်ဘေမဲ့ သူဟာ အီထောန်ပြုဘဲနေဇာဟု ပိုဘီး မင်္ဂလာရှိဟယ်ဆိုဘီး ငါခံယူဟယ်။ ငါနှိုက်လည်း ဘုရားသခင်ရဲ့ ဝိညာဉ်တော်ရှိဟယ် ဆိုဘီး ငါမှတ်ယူဟယ်။

8

ရောက်ထုဟို့ပူဇော်ဟူ စားဇာပြဿနာကြောန်း

1 ရောက်ထုဟို့ ပူဇော်ဟူးဟူရာလေနပတ်သတ်ဘီး၊

[†] 7:37 ၇-၃၇ အီထောန်ပြုဘဲန နေဟို့တွပ်၊ အယ်မျိုးမှုဘဲနေဟာ သူ့ရဲ့ သမီးဟို့ လတ်ထပ်ခွင့်ပေးဟူ။ [‡] 7:37 ၇-၃၇ အယ်မီးမပျိုဟို့ လတ်ထပ်ဟို့၊ အယ်မျိုးမှုဘဲနေဟာ သူ့ဟို့ လတ်ထပ်ခွင့် ပြုလိုက်ဟယ်။ § 7:38 ၇-၃၈ လတ်ထပ်ဟူသူ၊ အယ်မျိုးမှုဘဲနေဟာ သူ့ရဲ့ သမီးဟို့ လတ်ထပ်ဘဲန နေဟူသူ။

နန်းနို့လေ ပြောဟူတိုင်း “နို့လေဂူလောင်းဟာ သိပညာရှိဟယ်” ဆိုဇာဟို နို့လေသိဟယ်။ အယ်ဘေမဲ့ သိပညာဟာ လူဟိုမာနထောန်လွှားစေတတ်ဟယ်။ ရှစ်ရှင်းမြစ်တာဟာဘဲ တည်ဆော့-က်တတ်ဟယ်။

^၂ ကိုယ့်ကိုယ်ကိုယ် ပညာရှိဆိုဘီး ထန်မှတ်ဟူသူဟာ တကယ်ဘဲ အယ်သူဟာ သိသင့်ဟူတိုင်း သိသေးဟ။

^၃ အယ်ဘေမဲ့ ဘုရားသခင်ဟိုရှစ်ဟူသူဟာ ဘုရားသခင်သိမှတ်တော်မူဟူဇာဟို ခံရဟယ်။

^၄ အယ်ကြောန့် ရောက်ထုဟို ပူဇော်ဟူးဟူ ယဇ်ကောန်ဟို စားဟူဇာဟာ ရောက်ထုဟာ အယ်လောကမာ ချည်းနှီးသတ်သတ် ဖြစ်ဟယ် ဆိုဟူဇာန တပါးဒဲရှိဟူ ဘုရားသခင်ဟုလွဲဘီး ဖယ်ဘုရားသခင်လည်း မေ့ဟု ဆိုဇာဟို နို့လေ သိဂေ့ဟယ်။

^၅ ပြားဖြစ်ကြောန့်နူးဆိုဟာ ကောန်းဂန်န မှလေဂီးထတ်မာ “ဘုရားလေ” “သခင်လေ” ဆိုဘီး နာမယ်မှတ်ခေါ်ဟူဇာလေ ဘောင်ဂီးရှိဟူလည်းဘဲ

^၆ အယ်မူ ဘုရားသခင်ထဲဟာဘဲ ရာအားလောင်းဖြစ်လာဘီး၊ အယ်မူ ဘုရားသခင်တွပ်ဘဲ နို့လေဖြစ်ဂေ့ဟယ်။ အယ်မူ ဖဘုရားသခင်တပါးဒဲဟာဘဲ နို့လေမာရှိဟယ်။ အယ်မူသခင်အားဖြင့် နို့လေဟုနေစဘီး ရာအားလောင်းဖြစ်လာဂေ့ဟယ်။ အယ်သခင် ယေရှုခရစ်တော်တပါးဒဲဟာဘဲ နို့လေမာ ရှိတော်မူဟယ်။

^၇ အယ်ဘေမဲ့လည်း လူတိုင်း အယ်မူသိပညာရှိဂေ့ဟူ

ဇာမူဟ။ တချို့လူလေဟာ ခုခီထိ ရောက်ထူရှေ့မာ ပူဇော်
ဟားဟူစားဇာဟို့ စားဟူ ခီမာ ရောက်ထူဟို့ ထော့-က်ဟူ
စိန်စားဂေဘီး ကိုယ့်ကိုယ်ကိုယ် သိဟူ စိအားနဲဟူကြောန်
ညစ်ညူးစေဟယ် ဆိုဘီး ထန်ဂေလေဟယ်။

⁸ စားဇာဟာ ဘုရားသခင်ရဲ့ ရှေ့တော်မာ နို့လေဟို့ မျစ်
နှာရစေဟူဇာ မူဟ။ စားဘဲနနေဟူလည်း ရှောင်းမော့ဘဲဟူ
မျိုး စားဟယ် ဆိုဟူလည်း မလတ်မရဟ။

⁹ အယ်ဘေမဲ့ နန်းနို့လေ အယ်မျိုး လွတ်လွတ်လပ်လပ်
စားပိုင်ခွမ်ရှိဟူလည်းဘဲ ယောင်ကြည်မှုအားနဲဟူသူလေ
တွပ် ထိမ်ဘီးလဲဇာ ဖြစ်ဘဲနေအောန် ဒိပြုဂေပါ။

¹⁰ ဖြားဖြစ်ကြောန်နူးဆိုဟာ သိပညာရှိဟူနန်ဟာ ရောက်
ထူကုလောန်းထဲမာ ထိုင်ဘီး စားသော့-က်နေဟူဇာဟို့
ယော့-က်ယော့-က်ဟု တို့ဟယ် ဆိုဟာ အယ်သူရဲ့ အားနဲ
ဟူ သိစိဟာ ရောက်ထူဟို့ ပူဇော်ဟားဟူ ဇာလေဟို့ စား
ဟို့ရဲတန်းလာမယ် မူဟလော။

¹¹ အယ်မျိုးဖြစ်ဟယ် ဆိုဟာ အားနဲဟူ ညီကိုတွပ် ခရစ်
တော်ဟာ သေခံပေးဟူလည်းဘဲ နန်ရဲ့ “သိပညာ” ကြော
န့် အယ်သူဟာ ပျစ်စီးမှုဟို့ ရော့-က်ရဟယ်။

¹² အယ်မျိုးဆိုဟာ နန်းနို့လေဟာ ညီကို မောန်နှမ
လေဟို့ ပြစ်မှားဘီး သူးနို့လေရဲ့ သိစိဟို့ ထိခိုက်စေရှင်း
အားဖြင့် ခရစ်တော်ဟို့ ပြစ်မှားရာ ရော့-က်ဟယ်။

¹³ အယ်ကြောန် ငါ့ရဲ့ စားသော့-က်ဟူမူဟာ ညီကို မော
န်နှမလေဟို့ မှားယွင်းစေဟယ် ဆိုဟာ ညီကို မောန်နှမ

လေဟို့ မှားယွင်းစေဘဲနေအောင် မဲသားဟို့ စားဘဲန မြဲဒ
မီးရှောင်မယ်။

9

တမန်တော်ရဲ့ ရပိုင်ခွင့်န တာဝန်လေကြောင်း

¹ ငါဟာ လွတ်လပ်ဟူလူဖြစ်ဟယ် မှုဟုလော။ တမန်
တော်တယော့-က်ဖြစ်ဟယ် မှုဟုလော။ နို့လေရဲ့ ယေရှုခ
ရစ်ဟို့ မြင်ရဘိ မှုဟုလော။ နန်းနို့လေဟာ သခင်ဘုရား
ရဲ့ မှုတော်ဟို့ ငါစေခံလောက်ဆောန်ဇာဟုနေဘီး ရလာဟူ
သီးပွမ့်လေ မှုဟုလော။

² ငါဟာ တခြားသူလေထတ်မာ တမန်တော်ဖြစ်ဘဲနေဟူ
လည်းဘဲ နန်းနို့လေတွပ် တမန်တော်ဖြစ်ဟယ်။ ဖြားဖြစ်
ကြောန်နူးဆိုဟာ ငါဟာ သခင်ဘုရားရဲ့ တမန်တော်ဖြစ်ဟ
ယ် ဆိုဇာဟို့ နန်းနို့လေဟာ ဒမဲ့တော်ဖြစ်ဟူဇာအားဖြင့် ငါ
ဟို့ တံဆိခတ်ဂေဟယ်။

³ ငါဟို့ စစ်ဆေးဝေဖန်ဟူသူလေဟို့ အယ်မျိုး ငါဖြေ
ရှင်းပြောဆိုဟယ်။

⁴ နို့လေရဲ့ လောက်ဆောန်မှုအားဖြင့် နို့လေမာ စား
သော့-က်ပိုင်ခွင့် မှုဟုလော။

⁵ နို့လေဟာ ကေဖန သခင်ဘုရားရဲ့ ညီတော်လေ
တခြားတမန်တော်လေဟူမျိုး နို့လေခရီးထွပ်ဟူ ခီမာ
ယောင်ကြည်သူညီမဖြစ်ဟူ မယားဟို့ ခေါ်ဆောန်ပိုင်ခွင့်
မှုဟုလော။

6 ငါန ဗာနဗဟာဘုံ လောက်မလောက်ဘဲ နေရဟူခွင့်မဲ့ဟု ဆိုဘီး ပြောရလော။

7 ဖယ်စစ်သားလေဟု ကိုယ်စရိန်ကိုယ် စစ်မှုထမ်းရကြောနဲ့နဲ့။ ဖယ်သူဟု ကိုယ်စိုက်ဟူးဟူ စပျစ်ခြံဟုစပျစ်သီးဟို့ မစားဘဲနေနဲ့။ ဖယ်သိုးထီးမားလေဟာ ကိုယ်ထီးဟူ သိုးလေဟု သိုးနို့ဟို့ မသောင်းဆောက်ဘဲနေဂေ့နဲ့။

8 ငါဟာ အယ်ကြောန်းရာဟို့ လူ့သဘောန ပြောနေဟူ ဇာလော။ ပညတ်တရားဟုလည်း အယ်မျိုးပြောဟူးဟုယ် မူဟုလော။

9 မောရှေရဲ့ ပညတုတိကျမ်းဟု “ဗားနန်းဟူ နွားရဲ့ဇပ်ပေါ့-က်ဟို့ ချောက်တီးန” ဆိုဘီး လာဟယ်။ အယ်မျိုး မိန့်တော်မူဟူဇာဟု ဘုရားသခင်ဟာ နွားဟို့ဘုံ ပြောရှင်ဇာလော။

10 အယ်မျိုးမူဘဲနေဟာ နို့လေတွပ်ဘုံ မိန့်တော်မူဟူးဇာလော။ တကယ်ဘုံ နို့လေတွပ် ရေးဟူးဇာ ဖြစ်ဟယ်။ ဖြားဖြစ်ကြောနဲ့ဆို့ဟာ လယ်ထွန်မားန ရိုသီးမားလေဟာ ကိုယ့်ရဲ့ ရထိုက်ဟူ လောက်ခဟို့ မျှော်လင့်ဘီးဟာ လောက်ဆောက်ဂေ့ဇာ ဖြစ်ဟယ်။

11 နို့လေဟာ ဝိညာဉ်ပိုင်းဆိုင်ရာ မျိုးစေ့အားဖြင့် နန်းနို့ဟို့ စိုက်ပျိုးဘီးဟာ နန်းနို့နားဟု ရောက်ပိုင်းဆိုင်ရာလေဟို့ ရိုသီးဟူဇာဟာ လွန်ရာကုလလော။

12 နန်းနို့လေနားမာ တခြားသူလေ ခံယူပိုင်ခွင့်ရှိဟယ် ဆို့ဟာ နို့လေဟာ ပိုဘီး ခံယူခွင့်ရှိဟယ် မူဟုလော။

အယ်ဘေမဲ့လည်း နို့လေဟာ အယ်မူခွမ်ရေးဟို့ ယူဂေဟူ။ ခရစ်တော်ရဲ့ ဒန်းကောန်းဟို့ ဆီးတားဖြစ်ဘဲအောန် တို့ကြောင်ရဟူ ခတ်ခဲလေဟို့ ရာရာတိုင်းမာ သီးခံဘီး လောက်ဆောန်ဂေဟယ်။

13 ဗိမာန်တော်ရဲ့ မူကိစလေဟို့ လောက်ဆောန်ဟူ သူလေဟာ ဗိမာန်တော်န ဆိုင်ဟူဇာလေဟို့ စားရဂေဘီး၊ ယဇ်ပလ္လင်နှိုက် ထမ်းဆောန်ဟူ သူလေဟုလည်း ယဇ်ပလ္လင်န ဆိုင်ဟူဇာလေဟို့ မျှဝီခံစားခွမ် ရှိဟယ် ဆိုဇာနန်းနို့လေ သိဂေဟုလော။

14 အယ်မျိုးဘဲ ဒန်းကောန်းဟို့ ဟောပြောသူလေလည်း ဒန်းကောန်းအားဖြင့် သတ်မွီးရမယ် ဆိုဘီး သခင်ဘုရား မိန့်မှာတော်မူဟယ်။

15 အယ်ဘေမဲ့ နို့လေဟာ အယ်ခွမ်ရေးလေဟို့ သောင်းဂေဟူ။ အယ်မျိုးခွမ်ဟို့ တောန်းဆိုရှင်ကြောန့် အယ်စာဟို့ ရေးဟူဇာ မူဟူ။ ဖြားဖြစ်ကြောန့်နူးဆိုဟာ ငါ့ရဲ့ ဝါကြားဇာကြောန်းဟို့ သူများလေဟု ချည်းနှီးဖြစ်စေရှင်းထတ်သေဟူးဇာဘဲ ပိုကောန်းဟယ်။

16 ငါဟာ ဒန်းကောန်းဟို့ ဟောပြောရောင်မျှန ဝါကြားဇာကြောန်း မွေသေးဟူ။ ဖြားဖြစ်ကြောန့်နူးဆိုဟာ ဟောပြောဘဲန နေနိုင်ဟူ။ အယ်ဒန်းကောန်းဟို့ ဟောပြောဘဲန နေမယ် ဆိုဟာ အမင်္ဂလာရှိဟယ်။

17 တကယ်ကြောန့် ငါဟာ အယ်မူတော်ဟို့ ငါ့ရဲ့ ဆန္ဒ

တိုင်း ဆောန်ရှပ်မယ် ဆိုဟာ ငါ့တွပ် ဆုလာဘ် ရှိဟယ်။
အယ်ဘေမဲ့ ငါ့ရဲ့ ဆန္ဒတိုင်းမှုဘဲ ဆိုဟာလည်း အယ်စီမံ
ခန့်ခွဲမှုဟို့ ငါ့နှိုက် ယောင်ကြည် အပ်ဟားဘီး ဖြစ်ဟယ်။

18 အယ်မျိုးဆိုဟာ ငါ့တွပ် ဖြားကျိုးရှိနူး။ ငါခံစားရဟူ
ကျိုးဟု ဒန်းကောန်းဟို့ ခယုဘဲ ဟောပြောဟူ ခွမ်န အယ်
မျိုး ဟောပြောဟို့တွပ် ရပိုင်ခွမ်လေဟို့ သောင်းပြုဘဲန နေ
နိုင်ခွမ်လေဘဲ ဖြစ်ဟယ်။

19 ငါဟာ ဖယ်သူ့ကျွန်လည်းမှုဘဲ လွတ်လပ်ဟူသူ တ
ယော့-က် ဖြစ်ဟူလည်းဘဲ ယောင်ကြည်လာဟူ သူလေ
ဘောင်ဂီးရဟို့တွပ် လူတိုင်းရဲ့ ကျွန်ဖြစ်ဟယ်။

20 ငါဟာ ယုဒလူမျိုးလေဟို့ ရဟို့တွပ် ယုဒလူမျိုး
လေနားမာ ယုဒလူမျိုးလေမျိုး ဖြစ်ဟယ်။ ငါကိုယ်တိုင်
ပညတ်တရားအော့-က်မာ မွေ့ဘေမဲ့လည်း ပညတ်တရား
အော့-က်မာ ရှိဟူသူလေဟို့ ရဟို့တွပ် ပညတ်တရား
အော့-က်မာ ရှိဟူသူလေတွပ် ပညတ်တရားအော့-က်မာ
ရှိဟူသူမျိုးဘဲ ဖြစ်ဟယ်။

21 ငါဟာ ဘုရားသခင်ရဲ့ ပညတ်တရားန ကင်းဝေးဟူ
သူမှုဘဲ ခရစ်တော်ရဲ့ ပညတ်တရားအော့-က်မာ ရှိဟူလ
ည်းဘဲ ပညတ်တရားန ကင်းဝေးဟူ လူမျိုးခြားလေဟို့ ရ
ဟို့တွပ် ပညတ်တရားန ကင်းဝေးဟူ သူလေထဲမာ ပညတ်
တရားန ကင်းဝေးဟူ သူလေမျိုး ဖြစ်ဟယ်။

22 ငါဟာ အားနဲဟူသူဟို့ ရဟို့တွပ် အားနဲဟူ သူလေ
ထဲမာ အားနဲဟူသူ ဖြစ်ဟယ်။ လူတချို့ဟို့ တနည်းနည်း

န ကယ်တန်နိုင်ဟို့တွပ် လူဘောင်းဇောင်ထဲမာ လူဘောင်းဇောင်မျိုးဘဲ ဖြစ်ဟယ်။

²³ ဒန်းကောင်းရဲ့ ကောင်းဂျီးမင်္ဂလာဟို့ ဝီမျှနိုင်ဟို့တွပ် ငါဟာ ဒန်းကောင်းရဲ့ ကျိုးတွပ် အယ်မူဇာ ဂူလောင်းဟို့ ပြုဟူဇာ ဖြစ်ဟယ်။

²⁴ ပုလေးပြိုင်ပွဲမာ လူလေ ဘောင်ဂီး ဝမ်ပြိုင် ဘေမဲ့ လည်း တယော့-က်ဟားဘဲ ဆုဟို့ ရဟယ် ဆိုဇာဟို့ နန်းနို့လေ သိဂေဟုလော။ အယ်မျိုးဖြစ်ကြောန့် နန်းနို့လေ ဆုဟို့ ရဟို့တွပ် ပုလေးဂေပါ။

²⁵ ပြိုင်ပွဲဝမ်ဟို့တွပ် လေ့ကျင့်ဟူ အားကစားသမားလေ ဟာ ရာရာတိုင်းဟို့ ချောက်တီးတတ်ဟယ်။ အယ်သူလေ ဟာ ညှိုးဘီး ပျစ်စီးတတ်ဟူ ပန်းဦးရစ် သရဖူဟို့ ရဟို့တွပ် အယ်မျိုး ပြုနေဂေဟယ်။ နို့လေဟာ ညှိုးဘီး ပျစ်စီးတတ်ဘဲဟူ ပန်းဦးရစ် သရဖူဟို့ ရဟို့တွပ် အယ်မျိုး ပြုနေဂေဇာ ဖြစ်ဟယ်။

²⁶ အယ်ကြောန့် ငါပုလေးဟူ ခီမာ ခေဦးတည့်ရာဟို့ ပုလေးဟူဇာ မူဟု။ ငါဟာ လတ်ဂေထိုးဟူ ခီမာ ထိုးချစ်ဟို့ ချည်းနှီးထိုးဘဲဟူ လတ်ဂေထိုးမားမျိုး ဖြစ်ဟယ်။

²⁷ သူများလေဟို့ သွန်သန်ဘီးမှ ငါကိုယ်တိုင် ကုလရှောင်ဟူသူ ဖြစ်ဘဲနေအောင် ငါဟာ ကိုယ့်ရဲ့ ကိုယ်ခန့ဇာဟို့ နှိစစ်ဘီး ပြင်ဆင်လေဟယ်။

10

ဒိပေးဟူကြောင်း

¹ ညီကို မောန်နှမလေ အယ်မူကြောင်းရာဟို့ နန်းနို့လေ သိဘဲန နေစေရှင်ဟူ။ နို့ဘိုးဘေးလေဟာ မိုးတိအော့-က် မာရှိဘီး ပန်လယ်လယ်မာ ရှော့-က်သွားရဂေဘီးဟာ၊

² မိုးတိနပန်လယ်ထဲမာ မောရှေ့နှိုက် ဗတုတိဇ်ဟို့ ခံယူ ဂေဟယ်။

³ သူးနို့လေ ဂူလောင်းဟာ ဝိညာဉ်ရေးရာန ဆိုင်ဟူ စာ တမျိုးဒဲဟို့ဘဲ စားဂေဘီး၊

⁴ ဝိညာဉ်ရေးရာနဆိုင်ဟူ ရေဟို့ သော့-က်ရဂေဟယ်။ သူးနို့လေ ဂူလောင်းဘဲ ကိုယ့်န လိုက်ပါလာဟူ ဓမ္မမ ကုလော့-က်ဟု ရေဟို့ သော့-က်ရဂေဟယ်။ အယ်ကု လော့-က်ဟာ ခရစ်တော်ဘဲဖြစ်ဟယ်။

⁵ အယ်ဘေမဲ့လည်း ဘုရားသခင်ဟာ သူးနို့လေထဲဟု လူများစုဟို့ နှစ်သက်တော်မူဟူ။ အယ်ကြောန် သူးနို့လေ ဟာ တောကန္တာရထဲမာ သေကျေပျစ်စီးဂေဟယ်။

⁶ အယ်သူလေဟာ ကောန်းဘဲဇာလေဟို့ တတ်မတ်ဂေ ဟူမျိုး နို့လေ တတ်မတ်ဘဲနနေအောန် အယ်ကြောင်းရာ လေဟာ နို့လေတွပ် ပေါင်သတ်သေဖြစ်ဟယ်။

⁷ “လူလေဟာ စားသော့-က်ဘီး ထိုင်နေဂေဟယ်။ နှော့-က်တခါ ထဘီး ကခွဲမြူးတူးဂေဟယ်” ဆိုဘီး ကျမ်းစာလာဟူတိုင်း တချို့လူလေဟာ ရောက်ထုဟို့ ပူဇော်ပသဟူမျိုး နို့လေ ပူဇော်ပသဘဲနေဟို့တွပ် ဒိပေး ဟူဇာ ဖြစ်ဟယ်။

⁸ သူးနို့ထဲဟု တချို့လေဟာ တရားဘဲဟူ မေထုန်ဟို့ ပြု

ဟူမျိုး နို့လေပြုဘဲနေရဦး။ သူ့နို့လေထဲဟု လူတချို့ဟာ တရားဘဲဟူ မေထုန်ဟို ပြုဟူကြောန့် တရစ်ဒဲမာဘဲ လူ ၂၃,၀၀၀ လဲဘီးသေဟားဂေဟယ်။

⁹ အယ်လူလေထဲဟု တချို့လေဟာ စောင်ဇမ်းရှင်းဟို လောက်ဂေဟူကြောန့် ဗီအားဖြင့် ပျစ်စီးဟားဂေဟူမျိုး နို့ လေပြုဘဲန ခရစ်တော်*ဟို စောင်ဇမ်းဘဲနေရဦး။

¹⁰ နန်းနို့လေဟာ အယ်သုလေထဲဟု တချို့ ညည်းညူ ဟူမျိုး ညည်းညူဂေန။ အယ်မျိုး ညည်းညူဟူ သုလေ ဟာ ဖျစ်ဆီးရှင်း တမန်အားဖြင့် ဖျစ်ဆီးခံရဂေဟယ်။

¹¹ အယ်သုလေ အယ်မျိုး ဖြစ်ရဟူဇာဟာ တခြားလူ လေ သင်ဂန်းစာရဂေဟိုတွပ် ဖြစ်ဟယ်။ နို့လေဟာ ကပ် ကာလ ကူဆောန်းခါနီးမာ သတ်ရှင်ရဟူ သုလေဖြစ်ကြော န့်နို့လေဟို ဒီပေးဟူနေန အယ်ကြောန်းရာလေဟို ကျမ်းစာ မာ ရေးဟားဇာ ဖြစ်ဟယ်။

¹² အယ် ကြော န့် ကိုယ့် ကိုယ် ကိုယ် ခိုင်း ခိုင်ခန့် ခန့် ရပ်တည်နေဟယ် ဆိုဘီး ထန်ဟူသုဟာ ယိုင်လဲဘဲနေအော န် ဒီပြုပါစေ။

¹³ လူမာ ဖြစ်တတ်ဟူ စောင်ဇမ်း နှော့-က်ယှစ်မှုလေဟို ဘဲ နန်းနို့လေ ခံစားရဂေဟယ်။ ဘုရားသခင်ဟာ သစ်စာန ပုလဲဇောင်ဟူကြောန့် နန်းနို့ခိုင်ဘဲဟူ စောင်ဇမ်း နှော့-က် ယှစ်မှုလေဟို နန်းနို့နားဟို ရော့-က်ဟိုတွပ် ခွမ့်ပေးဟို မူ ဟူ။ နန်းနို့လေ ခိုင်ခိုင်ဟိုတွပ် စောင်ဇမ်း နှော့-က်ယှစ်ခံရ

* 10:9 ၁၀.၉ ခရစ်တော်၊ တချို့ မူရင်းလတ်ရေးမူလေမာ ဘုရားသခင်၊ ဆိုဘီး ပါရှိဟယ်။

ဟူ ကြောန်းရာန ထပ်တူ လွတ်မြော-က်ဟူ လမ်းဟို့လည်း
စီရင်ပြုပြင်တော်မူလေ့မယ်။

14 အယ်မျိုးဖြစ်ကြောန့် ငါရှစ်ရဟူ သူလေ၊ ရောက်ထု
ကိုးကွယ်ဇာဟို့ ရှောန်ဂေပါ။

15 နန်းနို့လေဟို့ ပညာရိဟူ သူလေနေန ငါပြောရှင်း ဖြစ်
ဟယ်။ ငါ့စကားဟို့ ဆင်ခြင်စီရင်ဂေပါ။

16 နို့လေဟာ ကျေးဇူးတော် ချီးမွမ်းဟူ မင်္ဂလာခွပ်ဖလား
ဟာ၊ ခရစ်တော်ရဲ့ သွိုးဟို့ ဆစ်ဆံဟူဇာ ဖြစ်ဟယ် မူဟု
လော။ နို့လေဖဲဟူ မူဟာ။ ခရစ်တော်ရဲ့ ကိုယ်ခန္ဓာတော်ဟို့
ဆစ်ဆံဘီး ဝီမျှသောင်းဆောန်ဂေဟူဇာ မူဟုလော။

17 မူဟာ တလောင်းဒဲ ဖြစ်ဟူမျိုး ဘောင်ဂီးဖြစ်ဟူ နို့
လေဟာလည်း ကိုယ်ခန္ဓာတခုဒဲ ဖြစ်ဟယ်။ ဖြားဖြစ်ကြော
န့်နူးဆိုဟာ နို့လေ ဂူလောင်းဟာ တလောင်းဒဲ ဖြစ်ဟူမူဟို့
ဆစ်ဆံဘီး သောင်းဆောန်ဂေဟူကြောန့် တလောင်းတကို
ယ်ဒဲ ဖြစ်ဂေဟယ်။

18 ဇာတိအားဖြင့် က္လသရေလ လူမျိုးလေဖြစ်ဟူ သူလေ
ဟို့ ကေ့ဘီး ဆင်ခြင်ဂေပါ။ ယဇ်ပူဇော်ဟားဟူ ယဇ်ကော
န်လေဟို့ စားဟူ သူးနို့လေဟာ ယဇ်ပလ္လင်န ဆစ်ဆံဟူ သူ
လေ ဖြစ်ဂေဟယ် မူဟုလော။

19 အယ်မျိုးဆိုဟာ ရောက်ထုဟို့ ပူဇော်ဟူရာဟာ ရေး
ပါဟူဇာ ဖြစ်ဟယ်။ အယ်မျိုးမူဘဲနေဟာ ရောက်ထုဟာ
ရေးပါဟူဇာ ဖြစ်ဟယ် ဆိုဘီး ငါဆိုလိုဟူဇာလော။

၂၀ အယ်မျိုးငါဆိုလိုဇာ မဟုတ်။ သူးနို့ပူဇော်ဟူ ယဇ်ကောန်
ဟာ ဘုရားသခင်ဟို့ ပူဇော်ဇာမဟုတ်န နတ်ဆိုးလေဟို့ ပူဇော်
ဇာဖြစ်ဟယ်။ နန်းနို့လေဟို့ နတ်ဆိုးလေန ဆစ်ဆံဟူဇာဟို့
ငါမလိုရှင်ဟု။

၂၁ နန်းနို့လေဟာ သခင်ဘုရားရဲ့ ခွပ်ဟို့ သော့-က်
မယ် ဆိုဟာ နတ်ဆိုးလေရဲ့ ခွပ်ဟို့ သော့-က်နိုင် ဟု။
သခင်ဘုရားရဲ့ စားမွဲမာ စားမယ် ဆိုဟာ နတ်ဆိုးလေရဲ့
စားမွဲမာ စားနိုင်ဂေဟု။

၂၂ နို့လေဟာ သခင်ဘုရားဟို့ မျစ်ထွပ်အောန် ဆန်ကျင်
ဖတ် လောက်ရှင်ဂေကြောန့်လော။ နို့လေဟာ သခင်ဘုရား
ထတ် ပိုဘီး တဂိုးကီးဟူကြောန့်လော။

၂၃ “နို့လေဟာ ဖယ်မဟို့မဆို ပြုလောက်ခွမ်ရှိဟယ်” ဆို
ဘီး ပြောဟူတိုင်းမှန်ဟူလည်းဘဲ ရာအားလောင်းကျိုးရှိ
ဟူဇာ မဟုတ်။ “နို့လေဟာ ဖယ်မဟို့မဆို ပြုခွမ်ရှိဟယ်” ဆို
ဘီး ပြောဟူလည်းဘဲ ရှိမျှဂူလောင်းဟာ နို့လေဟို့ ကျိုးပြု
ပေးဇာ မဟုတ်။

၂၄ ဖယ်သူလည်း ကိုယ့်ကျိုးဟို့မရှာစေန။ သူများကျိုး
ဟို့ဘဲ လူတိုင်းရှာပါစေ။

၂၅ နန်ရဲ့ ကိုယ့်ကိုယ်ကိုယ် သိဟူစိဟို့ ထော့-က်ရဟူ
ကြောန့် ဆေးမာ ရောန်းဇာလေ ဂူလောင်းဟို့ စစ်ဆေး
မေးမြန်းဘဲန စားဂေပါ။

၂၆ ပြားဖြစ်ကြောန့်နူးဆိုဟာ “မုလေဂီးနတူးဒု မုလေဂီး
ထတ်မာရှိဟူ ရှိမျှဂူလောင်းဟို့ ဘုရားသခင် ပိုင်တော်မဟု

ယ်” ဆိုဘီး ကျမ်းစာဟုပြောဟယ်။

27 တကယ်ဟို ယောင်ကြည်ဘဲသူ တယော့-က်ဟာ နန်း
နို့လေဟို ညဉ့်ခံဘီး ကျွေးမွေးဟို့ခေါ်ဟူ ခီမာ နန်းနို့သွား
ဂေ့ဘီး သိစိဟို ထော့-က်ရဟူကြောန့် ထဲ့ကျွေးဇာလေ ဂူ
လောင်းဟို စစ်ဆေးမေးမြန်းဘဲန စားဂေ့ပါ။

28 အယ်ဘေမဲ့ လူယော့-က်ယော့-က်ဟ “အယ်ဇာဟာ
ရောက်ထုဟို ပူဇော်ဟားဟူ သားဖြစ်ဟယ်” ဆိုဘီး ပြော
ဟာ အယ်မျိုးပြောဟူ သူန သိစိဟို ထော့-က်ဘီးဟာ
အယ်ဇာဟို စားဂေ့န —

29 သိစိ ဆိုဘီး ပြောဟူဇာဟာ နန်းနို့ရဲ့သိစိဟို ပြောဟူ
ဇာ မူဟူ။ တခြားသူရဲ့ သိစိဟို ပြောဟူဇာဖြစ်ဟယ်။

နန်းနို့လေထဲဟ ယော့-က်ယော့-က်ဟ “ငါ့ရဲ့လွတ်လပ်
မှုဟို ဖြားဖြစ်ကြောန့် သူများရဲ့သိစိဟ လာဘီးစစ်ကြော
စီရင်ရနူး။

30 ငါဟာ ကိုယ်စားဟူစားသော့-က်တွပ် ဘုရားသခင်ရဲ့
ကျေးဇူးတော်ဟို ချီးမွမ်းဟယ် ဆိုဟာ အယ်မျိုး ကျေးဇူး
တော်ဟို ချီးမွမ်းဘီး စားဟူစားဇာန ပတ်သတ်ဘီးဟာ ငါ
ဟို ဖြားဖြစ်ကြောန့် ကဲ့ရဲ့ပြစ်တန်ရနူး” ဆိုဘီး မေးလေ့
မယ်။

31 နန်းနို့လေဟာ စားဟူဇာဘဲဖြစ်ဖြစ်၊ သော့-က်ဟူဇာ
ဘဲဖြစ်ဖြစ်၊ ဖယ်မျိုးမှုဟိုဘဲပြုပြု ဘုရားသခင်ရဲ့ ဖောင်း
သရေတော်ဟို ထော့-က်ဘီး မှုရှိမျှဂူလောင်းဟို ပြုဂေ့ပါ။

32 ယုဒလူမျိုးဘဲဖြစ်ဖြစ်၊ လူမျိုးခြားလေဘဲဖြစ်ဖြစ်၊

ဘုရားသခင်ရဲ့ သင်းတော်ဝမ်ဟူ သူလေဟိုဘဲဖြစ်ဖြစ်
ကဲ့ရဲ့ဇာကြောန်း မွေ့ဘဲနေအောင် နေထိုင်ဂေပါ။

³³ အယ်မျိုးဘဲ ငါလည်း လူလေ ကယ်တန်ရှင်းရဟိုတွပ်
ကိုယ့်ကျိုးဟို ငဲ့ဘဲန သူများလေရဲ့ကျိုးဟို ငဲ့ကွပ်ဘီးဟာ
မှုရှိမျှဂလောင်းဟို လူလေနှစ်သက်အောင် ကြိုးစားနေဟ
ယ်။

11

¹ အယ်မျိုးဖြစ်ကြောန့် ငါဟာ ခရစ်တော်ဟို တုယူဟူ
မျိုး နန်းနို့လေလည်း ငါ့ဟို တုယူဂေပါ။

ခေါင်းဟို ဖောင်းအောက်ဟူကြောန်း

² နန်းနို့လေဟာ ငါ့ဟို မြဲဒမ်း ဒီရဘီး ငါပေးဟူ
နည်းဥပဒေသလေဟို လိုက်နာ ကျင့်သောင်းဂေဟူကြော
န့် နန်းနို့လေဟို ငါချီးကျူးပါဟယ်။

³ အယ်ဘေမဲ့ နန်းနို့လေဟို သိစေရှင်ဟူဇာဟု ခရစ်တော်
ဟာ ယော့-က်ကျားတိုင်းရဲ့ ခေါင်းဖြစ်ဟယ်။ မီးမရဲ့ခေါ
င်းဟာ ယော့-က်ကျားဖြစ်ဟယ်။ ခရစ်တော်ရဲ့ ခေါင်းဟာ
ဘုရားသခင် ဖြစ်ဟယ်။

⁴ အယ်မျိုးဖြစ်ကြောန့် ယော့-က်ကျားဟာ ကိုယ့်ခေါင်း
ဟို ဖောင်းဘီး ဆုတောင်းဇာဘဲဖြစ်ဖြစ်၊ ပရောဖက်ပြုဇာ
ဘဲဖြစ်ဖြစ် ကိုယ့်ခေါင်းရဲ့ အသရေဟို ရှောက်ခလသူ ဖြစ်
ဟယ်။

5 မီးမဟာ ကိုယ့်ရဲ့ခေါင်းကို ဖောင်းဘဲန ဆုတောင်းလာဘဲဖြစ်ဖြစ်၊ ပရောဖက်ပြုလာဘဲဖြစ်ဖြစ် ကိုယ့်ခေါင်းရဲ့ အသရေကို ရှောက်ခွဲလဟူလာ ဖြစ်ဟယ်။ အယ်မျိုးပြုမယ်ဆိုဟာ ခေါင်းရိဟူးဟူသန တူးဒုဘဲဖြစ်ဟယ်။

6 အယ်ကြောန့် မီးမဟာ ကိုယ့်ရဲ့ခေါင်းကို ဖောင်းဘဲန နေမယ် ဆိုဟာ ဆားဗန်ကို ဖြတ်ပါစေ။ အယ်ဘေမဲ့ ဆားဗန်ဖြတ်ဟူလာ၊ ခေါင်းရိဟူလာဟာ မီးမလေတွပ် ယှစ်လာ ဖြစ်မယ် ဆိုဟာ ခေါင်းကို ဖောင်းဟူးပါစေ။

7 ယော့-က်ကျားဟာ ဘုရားသခင်ရဲ့ ပေါင်သဏ္ဌာန်တော်န ဖောင်းသရေတော်ဖြစ်ဟူကြောန့် ကိုယ့်ရဲ့ခေါင်းကို ဖောင်းသင့်ဟု။ အယ်ဘေမဲ့ မီးမဟာ ယော့-က်ကျားရဲ့ ဖောင်းသရေတော်ဖြစ်ဟယ်။

8 ဖြားဖြစ်ကြောန့်ဆိုဟာ ယော့-က်ကျားဟာ မီးမအားဖြင့် ဖြစ်လာဟူလာ မူဟု။ မီးမဟာဘဲ ယော့-က်ကျားအားဖြင့် ဖြစ်လာဟူလာဖြစ်ဟယ်။

9 ယော့-က်ကျားကို မီးမတွပ် ဖန်ဆင်းဟူလာ မူဟု။ မီးမဟာဘဲ ယော့-က်ကျားတွပ် ဖန်ဆင်းဟူးလာဖြစ်ဟယ်။

10 အယ်မျိုး ဖြစ်ကြောန့် ကောန်းဂန်တမန်လေ ကိုထော့-က်ဘီးဟာ မီးမဟာ ကိုယ့်ကို ယော့-က်ကျားအောက်စိုးဟူလာကို ဖော်ပြဟူနေန ကိုယ့်ရဲ့ခေါင်းကို ဖောင်းသင့်ဟယ်။

11 အယ်ဘေမဲ့ သခင်ဘုရားနှိုက် ယော့-က်ကျားပါဘဲန မီးမဖြစ်ဟူလာ မူဟု။ မီးမပါဘဲန ယော့-က်ကျားဖြစ်ဟူလာ

မူဟူ။

12 ဖြားဖြစ်ကြောန့်နူးဆိုဟာ မီးမဟာ ယော့-က်ကျား
ကြောန့်ဖြစ်လာဟူမျိုး ယော့-က်ကျားဟုလည်း မီးမအား
ဖြင့် မိုးလာဟူဇာဖြစ်ဟယ်။ အယ်ဘေမဲ့ မှီရှိမျှဂူလောင်း
ဟို့ ဖန်ဆင်းဟူသူဟာ ဘုရားသခင် ဖြစ်ဟယ်။

13 မီးမဟာ ခေါင်းဟို့ ဖောင်းဘဲန ဘုရားသခင်ဟို့ ဆု
တောင်းဟို့ သင့်လား သင့်ဟုလား ဆိုဇာဟို့ နန်းနို့ကိုယ်တိုင်
ဆင်ခြင်စီရင်ဂေပါ။

14 ယော့-က်ကျားဟာ ဆားဗန်ရှယ်ထားဟယ် ဆိုဟာ
သူ့တွပ် ယှစ်ဇာဖြစ်ဟူကြောန့်ဟို့ သဘာဝတရားကိုယ်
နှိုက်ဟု နန်းနို့ဟို့ သွန်သန်ဟယ် မူဟုလော။

15 မီးမဟာ ရှယ်ဟူဆားဗန်ရှိဟယ် ဆိုဟာ သူ့တွပ်
ဖောင်းသရေတော်ဖြစ်ဟယ်။ ဖြားဖြစ်ကြောန့်နူးဆိုဟာ
ဆားဗန်ဟို့ သူ့တွပ်ခြောင်ထယ်ဖြစ် ပေးဟွားဇာဖြစ်ဟ
ယ်။

16 အယ်ဘေမဲ့လည်း အယ်ကိစန ပတ်သတ်ဘီး
ယော့-က်ယော့-က်ဟု ငြင်းခူလောက်ရှင်ဟယ် ဆိုဟာ နို့
လေနဘဲဖြစ်ဖြစ် ဘုရားသခင်ရဲ့ သင်းတော်နဘဲဖြစ်ဖြစ်
အယ်မျိုး ထောင်းဇ် မေ့ဟူ။

သခင်ဘုရားရဲ့ ပွဲတော်မင်္ဂလာကြောန့်
(မဿဲ ၂၆.၂၆-၂၉; မာကု ၁၄.၂၂-၂၅; လုကာ
၂၂.၁၄-၂၀)

17 အယ်ဘေမဲ့ အယ်ညွန်ကြားချစ်လေပေးရာမာ နန်းနို့ဟို့ ငါချီးကျူးဟု။ ဖြားဖြစ်ကြောန့်နူးဆိုဟာ နန်းနို့လေရဲ့ ဝတ်ပြုဟူဇဟာ ကောန်းကျိုးထတ် ဆိုးကျိုးဟု ပိုဘီးများဟူကြောန့် ဖြစ်ဟယ်။

18 ပထမဆောင်းနေန နန်းနို့လေရဲ့ သင်းတော်စည်းဝေးလေမာ စိဝန်းကွဲဇလေရှိနေကြောင်းဟို့ ငါကြားသိရဟယ်။ ကြားရဟူတိုင်းဘဲ တချို့မှန်မယ်ဆိုဇ ငါယောင်ကြည်ဟယ်။

19 (နန်းနို့လေ စိဝန်းကွဲဟူဇလေ ရှိရမယ်မှန်ဟယ်။ အယ်မျိုးမှဘဲ မှန်တရားဖတ်မာ ရပ်တည်သူလေဟို့ သိရမယ်။)

20 နန်းနို့ တူးဒုစုဝေးဂေဟူ ခီမာ သခင်ဘုရားရဲ့ ပွဲတော်မင်္ဂလာဝမ်ဟို့တွပ် စုဝေးဇ မှဟု။

21 ဖြားဖြစ်ကြောန့်နူးဆိုဟာ နန်းနို့လေ စားသော-က်ဂေခီမာ လူတိုင်းဟု သူများလေဟို့ စောန့်ဘဲန ကိုယ့်ညဉ့်ခန်းဇဟို့ စားဟူကြောန့် မောဟူသူဟု မောဂေဘီး ဆာဟူသူဟု ဆာနေဂေဟယ်။

22 နန်းနို့လေမာ စားသော-က်ဟို့ အီမေ့ဂေဟုလော။ အယ်မျိုးမှဘဲနေဟာ ဘုရားသခင်ရဲ့ သင်းတော်ဟို့ ထိမဲ့မြင်ပြုဘီး ဆင်းရဲသားလေဟို့ ယှစ်ခွဲရှင်ကြောန့်လော။ နန်းနို့လေဟို့ ငါဖယ်မျိုးပြောရဟို့နူး။ နန်းနို့လေဟို့ ငါချီးကျူးရဟို့လော။ အယ်မှုရာဟို့ ဖယ်မျိုးလည်း ချီးကျူးဟို့ရဟု!

23 ဖြားဖြစ်ကြောန့်နဲ့ဆိုဟာ သခင်ဘုရားနားဟု ငါခံယူရရှိဟူးဟူ ဇာတိ နန်းနီလေဟို ငါအပ်ပေးဟယ်။ အယ်မူဇာဟု သခင်ယေရှုဟာ ရန်သူလေ လတ်ဟို အပ်ရှင်းဟို ခံတော်မူဟူညဉ်မာ မဟိုယူဘီး၊

24 ကျေးဇူးတော်ဟို ချီးမွမ်းဘီးမှ မဟိုဖဲဘီးဟာ “အယ်မဟာ နန်းနီတွပ် ခုလိုးဖဲဟူ ငါ့ရဲ့ ကိုယ်ခန္ဓာ ဖြစ်ဟယ်။ ငါ့ဟို အော့-က်မေဟိုတွပ် အယ်မျိုးပြုဂေပါ” ဆိုဘီး မိန့်တော်မူဟယ်။

25 အယ်တိုင်းဘဲ ညဉ်ဇာစားဘီးန ခွပ်ဟိုလည်း ယူဘီးဟာ “အယ်ခွပ်ဟာ ငါ့သွီးနတည်ဟူ ပဋိညာဉ် တရားသစ် ဖြစ်ဟယ်။ အယ်ခွပ်ဟို သော့-က်ဟူ ခီတိုင်း ငါ့ဟို အော့-က်မေဟိုတွပ် အယ်မျိုးပြုဂေပါ” ဆိုဘီး မိန့်တော်မူဟယ်။

26 အယ်ကြောန့် နန်းနီလေဟာ အယ်မဟို စားဘီး အယ်ခွပ်ဟိုသော့-က်ဟူခီတိုင်းမာ သခင်ဘုရားရဲ့ သေခံတော်မူဟူကြောန့်ဟို ကြွလာဟူခီထိ ကြေညာဟူဇာဖြစ်ဟယ်။

27 အယ်မျိုး ဖြစ်ကြောန့် သခင်ဘုရားရဲ့ မုနခွပ်ဟို ထိုက်တန်ဘဲန စားသော့-က်ဟူသူဟာ သခင်ဘုရားရဲ့ ကိုယ်ခန္ဓာတော်န သွီးတော်ဟို ပြစ်မှားရာရော့-က်ဟယ်။

28 အယ်ကြောန့် လူတိုင်း ကိုယ့်ကိုယ်ကိုယ် စစ်ဆေးဘီးမှ မဟို စားပါစေ။ အယ်တိုင်းဘဲ ခွပ်ဟိုလည်း သော့-က်ပါစေ။

29 ဖြားဖြစ်ကြောန့်နဲ့ဆိုဟာ သခင်ဘုရားရဲ့ ကိုယ်ခန့

ဓာတို့ ပိုင်းခြားဘီး နားလည်ဘဲန စားသော-က်ဟူ သူဟာ ကိုယ့်ထတ်ဟို့ ပြစ်ဒန်ရော-က်အောန် စားသော-က်ဟူသူ ဖြစ်ဟယ်။

³⁰ အယ်ကြောန့် နန်းနို့လေထဲဟ တချို့ဟာ အားနဲသူ လေန ကျန်းမာရေးကောင်းဘဲသူ ဘောင်ဂီးရှိဂေဟယ်။ သေဟားဂေဟူ သူလည်းရှိဟယ်။

³¹ နို့လေဟာ ကိုယ့်ကိုယ်ကိုယ် ရင်ဦးဆောင်း စစ်ဆေး မယ် ဆိုဟာ အယ်မျိုး စီရင်ရှင်းဟို့ ခံရဂေဟို့ မှဟု။

³² စီရင်ရှင်းခံရဟယ် ဆိုဟာလည်း လောကသားလေန တူးဒ ပြစ်ဒန်စီရင်ဟူဇာဟို့ ခံရဘဲနေဟို့တွပ် သခင်ဘုရား ရဲ့ ဆောင်းမတော်မူဟူဇာဟို့ ခံရဂေဟယ်။

³³ အယ်ကြောန့် ညီကို မောန်နှမလေ၊ သခင်ဘုရားရဲ့ ပွဲတော်မင်္ဂလာဟို့ ဝမ်ဟို့တွပ် စုဝေးဂေခီမာ ယော့-က်ဟို့ ယော့-က် စောန့်နေဂေပါ။

³⁴ ယော့-က်ယော့-က်ဟ ရရာတိုင်း မိုက်ဆာနေဟယ် ဆိုဟာ ပြစ်ဒန်စီရင်ခံရမယ် စုဝေးရှင်းမျိုးဖြစ်ဘဲနေအော န် အယ်သူဟို့ သူ့အီမာ စားစေပါ။ ကျန်ဟူကံစလေဟို့ ငါ လာဟူခီမှ စီရင်မယ်။

12

ဝိညာဉ်ဆုကျေးဇူးလေကြောန်း

¹ ညီကို မောန်နှမလေ ဝိညာဉ်ဆုကျေးဇူးလေရဲ့ ကြော န်းရာလေဟို့ နန်းနို့သိဘဲနေဟို့တွပ် ငါလိုမှေဟု။

² နန်းနို့လေဟာ စဒူးဟု လူမျိုးခြားလေဖြစ်ဟူကြောင့် သူများသို့ဆောက်ဟူနော-က်ဟို့ လိုက်ပါဘီး သတ်မှေ့ဘဲ ဟူ ရောက်ထုလေဟို့ ကိုးကွယ်ဂေဟူကြောင်းဟို့ နန်းနို့လေ သိဘဲဖြစ်ဟယ်။

³ အယ်ကြောန့် နန်းနို့လေဟို့ သိစေရှင်ဇာဟု ဖယ်သူ လေမှလည်း ဘုရားသခင်ရဲ့ ဝိညာဉ်တော်အားဖြင့် “ယေရှု ဟာ ကိရှင်းခံရပါစေ!” ဆိုဘီး ပြောဟို့မူဟု။ အယ်မျိုးဘဲ သန်ရှင်းဟူဝိညာဉ်တော်အားဖြင့် မူဟုဆိုဟာ “ယေရှုဟာ သခင်ဖြစ်တော်မူဟယ်” ဆိုဘီး ဖယ်သူလည်းဘဲ ဝန်ခံနိုင် ဘဲကြောင်းဟို့ နန်းနို့ဟို့ သိစေရှင်ဟယ်။

⁴ ဝိညာဉ်တော်ရဲ့ ဆုကျေးဇူးတော်ဟာ မျိုးမျိုးရှိဟူလည်းဘဲ ဝိညာဉ်တော်ဟာ တပါးဒဲဘဲရှိဟယ်။

⁵ မူတော်လောက်ငန်း မျိုးမျိုးရှိဟူလည်းဘဲ သခင်ဘုရားဟာ တပါးဒဲဘဲရှိဟယ်။

⁶ လောက်ဆောက်ချစ် ဘောန်းဇောင်ရှိလည်းဘဲ လူလေ ထတ်မာ ရှိမျှဂူလောင်းဟို့ ပြုတော်မူဟူ ဘုရားသခင်ဟာ တပါးဒဲဘဲ ရှိဟယ်။

⁷ ကောန်းဟူကျိုးတွပ် ဝိညာဉ်တော်ဟို့ လူသီးသီးဟို့ ထန်ရှားအောန် ပေးတော်မူဟယ်။

⁸ ဖြားဖြစ်ကြောန့်နူးဆိုဟာ ဝိညာဉ်တော်အားဖြင့် တယော့-က်ဟို့ ပညာတရားဟို့ ပေးတော်မူဟယ်။ အယ် ဝိညာဉ်တော်အားဖြင့် တခြားတယော့-က်ဟို့ ထိုးထွင်းရှင်း

ပညာဟို့ ပေးတော်မူဟယ်။

⁹ အယ်ဝိညာဉ်တော်ဟု တယော့-က်ဟို့ ယောင်ကြည်ရှင်း ဆုကျေးဇူးဟို့ဘဲ ဖြစ်ဖြစ်၊ တခြားတယော့-က်ဟို့ ရောဂါပျော့-က်ကင်းစေနိုင်ဟူ တဂိုးဟို့ဘဲဖြစ်ဖြစ်၊

¹⁰ တယော့-က်ဟို့ နိမိတ်လတ်ခဏာပြနိုင်ဟူ တဂိုးဟို့ဘဲဖြစ်ဖြစ်၊ တခြားတယော့-က်ဟို့ ပရောဖက်ပြုခွမ်ဟို့ဘဲဖြစ်ဖြစ်၊ နှော့-က်တယော့-က်ဟို့ စိဝိညာဉ်ဟို့ ပိုင်းခြားဘီးသိနိုင်ဟူ ခွမ်ဟို့ဘဲဖြစ်ဖြစ်၊ နှော့-က်တယော့-က်ဟို့လည်း ထူးဆန်းဟူ ဘာသာစကားမျိုးမျိုးဟို့ ပြောနိုင်ဟူခွမ်ဟို့ဘဲဖြစ်ဖြစ်၊ နှော့-က်တယော့-က်ဟို့ အယ်ဘာသာစကားရဲ့ နတ်ဓိပါယ်ဟို့ ဖော်ပြပေးနိုင်ဟူခွမ်ဟို့ဘဲဖြစ်ဖြစ် ပေးတော်မူဟယ်။

¹¹ အယ်ဝိညာဉ်တော် တပါးဒဲဟုဘဲ အယ်မှုရှိမျှဂူလောင်းဟို့ လောက်ဆောန်တော်မူဘီး လိုတော်ရှိဟူတိုင်း အယ်ဆုကျေးဇူးလေဟို့ ယော့-က်စီတိုင်းဟို့ သီးသီးခွဲဝီပေးတော်မူဟယ်။

အင်္ဂါစိပိုင်းလေရှိဟူ ကိုယ်ခန္ဓာကြောန်း

¹² ခရစ်တော် ဟာ အင်္ဂါစိပိုင်းလေဘော င် ဂီး ရှိဟူ ကိုယ်ခန္ဓာနတူဟယ်။ ကိုယ်ခန္ဓာမှာ အင်္ဂါစိပိုင်းလေဘော င် ဂီးရှိဟူလည်းဘဲ ကိုယ်တကိုယ်ဒဲဘဲ ဖြစ်ဟယ်။

¹³ ဖြားဖြစ်ကြောန်းနဲ့ဆိုဟာ ယုဒလူမျိုးဘဲဖြစ်ဖြစ်၊ လူမျိုးခြားဘဲဖြစ်ဖြစ်၊ ကျွန်ဘဲဖြစ်ဖြစ်၊ လူလွတ်ဘဲ

ဖြစ်ဖြစ်၊ နို့လေ ဂူလောင်းဟာ ဝိညာဉ်တော် တပါးဒဲ အားဖြင့် ကိုယ်ခန္ဓာ တခုဒဲဟို့ ဗတုတံဇံခံယူဂေဟယ်။ နို့ လေရှိဟူ ဂူလောင်းဟာ ဝိညာဉ်တော် တပါးဒဲဟို့ သော့-က် ဂေရဟယ်။

14 ကိုယ်ခန္ဓာမာ အင်္ဂါစိပိုင်းဟာ တခုဒဲဘဲရှိဟူဇာ မူဟု။
ဘောင်ဂီးဘဲ ရှိဟယ်။

15 ခေဟ “ငါဟာ လတ်မှုဘဲကြောန့် ကိုယ်ခန္ဓာန စပ် ဆိုင်ဟု” ဆိုဘီး ပြောဟူကြောန့် တကယ်ဘဲ ကိုယ်ခန္ဓာန စပ်ဆိုင်ဟန်းဘဲဇာ မူဟု။

16 နားဟုလည်း “ငါဟာ မျစ်စိမှုဘဲကြောန့် ကိုယ်ခန္ဓာန စပ်ဆိုင်ဟု” ဆိုဘီး ပြောဟယ် ဆိုဟုလည်း တကယ်ဘဲ ကိုယ်ခန္ဓာန စပ်ဆိုင်ဟန်းဘဲဇာ မူဟု။

17 ကိုယ်ခန္ဓာ တခုလောင်းဟာ မျစ်စိဘဲဖြစ်နေဟယ် ဆို ဟာ ဖယ်မျိုး ကြားနိုင်မယ်နူး။ ကိုယ်ခန္ဓာ တခုလောင်းဟာ နားဘဲဖြစ်နေဟယ် ဆိုဟုလည်း ဖယ်မျိုး နံခံနိုင်ဟို့နူး။

18 အယ်ဘေမဲ့ ဘုရားသခင်ဟာ ကိုယ်ခန္ဓာမာရှိဟူ အင်္ဂါ စိပိုင်းလေဟို့ သူ့လိုတော်ရှိဟူတိုင်း သူ့နေရာနသူ ရှိစေ တော်မူဟယ်။

19 ဂူလောင်းဟာ အင်္ဂါတခုဒဲဘဲ ဖြစ်ဟယ် ဆိုဟာ ကိုယ် ခန္ဓာဟာ ဖယ်မာရှိဦးမယ်နူး။

20 ခုဟု အင်္ဂါစိပိုင်းလေ ဘောင်ဂီးရှိဟူလည်း ဘဲ ကိုယ်ခန္ဓာတခုဒဲဟုဘဲရှိဟယ်။

21 အယ်ကြောန့် မျစ်စိဟု “နန့်ဟို့ ငါမလိုဟု” ဆိုဘီး လ

တ်ဟို့ပြောမရဟု! ခေါ်နိုးဟုလည်း “နန့်ဟို့ ငါမလိုဟု” ဆို
ဘီးလည်း ခေဟို့ပြောမရဟု!

22 အယ်လော့-က်နကဟု ကိုယ်ခန္ဓာမာ ပိုဘီး အားနဲဟု
ယ် ဆိုဘီး ထန်ရဟူ အင်္ဂါစိပိုင်းလေဟု ပိုဘီး လိုအပ်ဟူ
အင်္ဂါလေဖြစ်ဟယ်။

23 အသရေမဲ့ဟယ် ဆိုဘီး ထန်ရဟူ အင်္ဂါစိပိုင်းလေ
ဟို့ ပိုဘီး ကီးဟူ အသရေအားဖြင့် ဆင်ယင်တတ်ဂေဟု
ယ်။ တင့်တယ်မှုမဲ့ဘဲဟူ ကိုယ်အင်္ဂါစိပိုင်းလေဟို့ ပိုဘီး
တင့်တယ်အေနံ ဆင်ယင်တတ်ဂေဟယ်။

24 တင့်တယ်ဟူ ကိုယ်အင်္ဂါစိပိုင်းလေဟို့ မွန်းမံဇာလိုအ
ပ်ဟု။ အယ်ဘေမဲ့ ဘုရားသခင်ဟာ ဂေါင်ငယ်ဟူ အင်္ဂါစိ
ပိုင်းလေဟို့ ပိုဘီး ကီးဟူ ဂေါင်သရေဟို့ ပေးဘီး ကိုယ်ခ
နာဟို့ ပေါင်းစပ်ဖွဲ့စည်းဟားတော်မူဟယ်။

25 အယ်ကြောန့် ကိုယ်ခန္ဓာမာ ကွဲပြားမှုမဲ့ဘဲ အင်္ဂါစိ
ပိုင်းလေ ရှင်းရှင်း ဂရုစိုက်ဂေဟို့တွပ် ဖြစ်ဟယ်။

26 တကယ်ကြောန့် ကိုယ်အင်္ဂါစိပိုင်းတခုဟု ဝေဒနာ
ခံစားနေရဟယ် ဆိုဟာ တခြားအင်္ဂါစိပိုင်းလေဟုလည်း
ဒန်းတူခံစားရဂေဟယ်။ အင်္ဂါစိပိုင်းတခုဟု ချီးမြှောက်-က်
ရှင်းခံရဟယ် ဆိုဟာ တခြားအင်္ဂါစိပိုင်းလေဟုလည်း တူး
ဒုဘဲဝန်းသာဂေဟယ်။

27 နန်းနို့ဂူလောင်းဟာ ခရစ်တော်ရဲ့ ကိုယ်ခန္ဓာတော် ဖြ
စ်ဂေဟယ်။ နန်းနို့သီးသီးဟာ ကိုယ်ခန္ဓာရဲ့ အင်္ဂါစိပိုင်းလေ
ဖြစ်ဂေဟယ်။

28 ဘုရားသခင်ဟာ ပထမအနေနဲ့ တမန်တော်လေ၊ ဒုတိယအနေနဲ့ ပရောဖက်လေ၊ တတိယအနေနဲ့ ဆရာလေ၊ အယ်ဘီးနဲ့ နိမိတ်လတ်ခဏာ တဂိုးပြဟူသူလေ၊ ရောဂါပျော့-က်စေနိုင်ဟူ ဆုကျေးဇူးတို့ ရဟူသူလေ၊ ကူညီမ ဇဟူသူလေ၊ စီမံအောက်ချောက်ဟူ သူလေ၊ ထူးဆန်းဟူ ဘာသာစကား ဘောင်းဇောင်တို့ ပြောနိုင်သူလေတို့ဘဲ ဖြစ်ဖြစ် သင်းတော်မာ ခန့်ဟားတော်မူဟယ်။

29 ဂူလောင်းဟာ တမန်တော်လေ ဖြစ်ဂွေကြောနဲ့လော။ ဂူလောင်းဟာ ပရောဖက်လေ ဖြစ်ဂွေကြောနဲ့လော။ ဂူလောင်းဟာ ဆရာလေ ဖြစ်ဂွေကြောနဲ့လော။ ဂူလောင်းဟာ တဂိုးနိမိတ်လတ်ခဏာ ပြုနိုင်ကြောနဲ့လော။

30 ဂူလောင်းဟာ ရောဂါပျော့-က်စေနိုင်ဟူ ဆုကျေးဇူးတို့ ရဟူသူလေ ဖြစ်ကြောနဲ့လော။ ဂူလောင်းဘဲ ထူးဆန်းဟူ ဘာသာစကားတို့ ပြောနိုင်ဟူ သူလေ ဖြစ်ကြောနဲ့လော။ ဂူလောင်းဟာ အယ်မူနတ်ဓိပါယ်တို့ ဖော်ပြပေးနိုင်တို့ကြောနဲ့လော။

31 အယ်မျိုးဖြစ်ကြောနဲ့ နန်းနို့လေဟာ ပိုဘီး မြတ်ဟူ ဆုကျေးဇူးလေတို့ ရရာတိုင်း လိုရှင်ဟူ စိရှိဂေပါ။

ငါဟာ နန်းနို့တို့ ပိုဘီး ထူးမြတ်ဟူလမ်းတို့ ပြအူးမယ်။

13

မြစ်တာကြောန်း

၁ ငါဟာ လူ့ဘာသာစကားနဲ့ ကောင်းဝန်တမန်ဘာသာစကားဟို့ ပြောနိုင်ဟူလည်းဘဲ မြစ်တာမေ့ဘဲနေဟာ သံကုလယ်ကုလယ်မြယ်ဘီး ဆူညံနေဟူ ဗွိုးမှုဟူသံနဲ့ ချမ်းချမ်းဟူမျိုးဘဲ ဖြစ်လေ့မယ်။

၂ ငါဟာ ဗျာဒိတ်တော်အားဖြင့် ဟောပြောနိုင်ဟူဇာဘဲ ဖြစ်ဖြစ်၊ နတ်နဲရာလေရှိဟူမျှနဲ့ တတ်ပညာမျိုးမျိုးလေဟို့ နားလည်တတ်ကျွမ်းဇာဘဲဖြစ်ဖြစ်၊ တောန်ဟို့ရွှေနိုင်ဟူ ယောင်ကြည်ရှင်းရှိဟူဇာဘဲဖြစ်ဖြစ် မြစ်တာမေ့ဘဲနေဟာ ချည်းနှီးသတ်သတ်ဘဲ ဖြစ်ဟယ်။

၃ သူတပါးဟို့ ငါကျွေးမွေးဘီး ငါ့မာရှိဟူ ပစ်စီးအောက်စာလေ ဂူလောင်းဟို့ စွန့်လွှတ်ရုံမျှမက ကိုယ်ခနုဓာဟို့ မီးရှို့ခံဟို့တွပ်* ပေးအပ်ဟူလည်းဘဲ မြစ်တာမေ့ဘဲနေဟာ ငါ့မာ ဖြာကျိုးလည်း မေ့ဟူ။

၄ မြစ်တာဟာ စိရှယ်တတ်ဟယ်။ သနားကြင်နာတတ်ဟယ်။ မြစ်တာဟာ နာလိုဘဲဟူဇာ မေ့ဟူ။ ဝါကြွေးဟူဇာ မေ့ဟူ။ မာန်မာန မေ့ဟူ။

၅ ယဉ်ကျေးဘဲမှုဟို့ ပြုတတ်ဟူ။ ကိုယ့်ရဲ့ကျိုးဟို့ ရှာတတ်ဟူ။ ဒေါသမျစ်ထွပ်တတ်ဟူ။ သူများရဲ့ ပြစ်ဟို့ မှတ်တတ်ဟူ။

၆ တရားဘဲဟူမှုမာ ဝန်းသာရှင်း မေ့တတ်ဟူ။ သမ္မာတရားအားဖြင့်ဘဲ ဝန်းသာတတ်ဟယ်။

13:2 ၁၃.၂ မ ၁၇.၂၀; ၂၁.၂၁; မာ ၁၁.၂၃ * 13:3 ၁၃.၃ မီးရှို့ခံဟို့တွပ်၊ တချို့ မူရင်းလတ်ရေးမူလေမာ ဝါကြွေးနိုင်ဟို့တွပ်၊ ဆိုဘီး ပါရှိဟယ်။

၇ ရှိမျှဂူလောင်းဟို့ ဖောင်းအောက်ပေးတတ်ဟယ်။ ရှိမျှ
ဂူလောင်းဟို့ ယောင်ကြည်တတ်ဟယ်။ ရှိမျှဂူလောင်းဟို့
မျှော်လင့်တတ်ဟယ်။ ရှိမျှဂူလောင်းဟို့ သီးခံတတ်ဟယ်။

၈ မြစ်တာဟာ ဖော့-က်ပုလန်တတ်ဟူ သဘောန မြဲ
ကင်းစင်ဟယ်။ ပရောဖက်ဉာဏ်ဘွဲ့ဖြစ်ဖြစ်၊ ထူးဆန်း
ဟူ ဘာသာစကားလေဟို့ ပြောနိုင်ဇာဘွဲ့ဖြစ်ဖြစ်၊ တီထွေ
မိမိတီးနိုင်ဟူ သိပ္ပံတတ်ဘွဲ့ဖြစ်ဖြစ် ကွယ်ပျော့-က်လေ့
မယ်။

၉ ခု နို့လေဟာ စောင်လင်ဘဲနု သိဂေဟယ်။ ပရောဖက်
ဉာဏ်နု စောင်လင်ဘဲနု ဟောတတ်ဟယ်။

၁၀ အယ်ဘေမဲ့ စောင်လင်မှုရော့-က်လာဟူ ခီမာ စောင်
လင်ဘဲဇာလေ ဂူလောင်းဟာ ပျော့-က်ကွယ်ဟူးလေ့
မယ်။

၁၁ ငါဟာ သားဂန်းဟူးဖြစ်ဟူ ခီမာ သားဂန်းဟူးမျိုး
ဘွဲ့ စကားပြောဟယ်။ သားဂန်းဟူးမျိုးဘွဲ့ စဉ်းစားဟယ်။
သားဂန်းဟူးမျိုးဘွဲ့ တွေးတောဆင်ခြင်ဟယ်။ ကီးလာဟူ
ခီမာ သားဂန်းဟူးရဲ့ ကျင့်စလေ့လေဟို့ ငါဖယ်ရှားဟယ်။

၁၂ ခုခီမာ နို့လေဟာ မှန်ရှေ့မာ မှီဝါးဝါးပေါ်လာဟူ ပေါင်
သဏ္ဌာန်မျိုးဘွဲ့ ထန်ရှားဘဲနု တို့မြင်ရဂေဟယ်။ အယ်မူခီ
မာ ဆိုဟာ မျစ်ဝါးထန်ထန် တို့မြင်ရလေ့မယ်။ ခုခီမာ ငါ
ဟာ စောင်းစောင်လင်းလင် သိမြင်ရသေးဟု။ အယ်ခီမာ
ဆိုဟာ ဘုရားသခင်ဟု ငါ့ဟို့ စောင်းစောင်လင်းလင် သိ
မြင်တော်မူဟူမျိုး ငါဟာ စောင်းစောင်လင်းလင် သိမြင်ရ
လေ့မယ်။

13 ခုမာ ပါရမီသောင်းပါးဖြစ်ဟူ ယောင်ကြည်ရှင်း၊
မျှော်လင့်ရှင်း၊ ရှစ်ရှင်း အယ်သောင်းပါးတည်ဘီး ရှိနေဟု
ယ်။ အယ်သောင်းပါးမာ ရှစ်ရှင်းမြစ်တာဟာ မြတ်ဆောင်း
ဖြစ်ဟယ်။

14

ဝိညာဉ်ဆုကျေးဇူးလေကြောင်း

1 အယ်ကြောန့် ရှစ်ရှင်းမြစ်တာဟို မှီအောန်လိုက်ဂေပါ။
ဝိညာဉ်ဆုကျေးဇူးလေဟို လိုရှင်တောန်းတရာမာ ပရော
ဖက်ပြုနိုင်ဟူ ဆုကျေးဇူးဟို ရရာတိုင်း လိုရှင်ဟူစီရှိဂေ
ပါ။

2 ဖြားဖြစ်ကြောန့်နူးဆိုဟာ ထူးဆန်းဟူ ဘာသာစ
ကားဟို ပြောဆိုဟူသူဟာ လူလေနပြောဟူဇာမူဘဲ
ဘုရားသခင်န ပြောဟူဇာဖြစ်ဟယ်။ သူ့ရဲ့စကားဟို
ဖယ်သူလည်းနားလည်နိုင်ဟူ။ သူဟာ ဝိညာဉ်တော်တဂိုး
အားဖြင့် လျှို့ဝှက်နတ်နဲဟူကြောင်းရာလေဟို ပြောဆိုဇာဖြစ်
ဟယ်။

3 ပရောဖက်ပြုသူဟာ လူလေဟို တည်ဆော့-က်ပေးဟူ
စကား၊ ခွန်အားပေးဟူစကားန နှစ်သိမ့်ပေးဟူစကားလေ
ဟိုဘဲ ပြောဟယ်။

4 ထူးဆန်းဟူ ဘာသာစကားဟို ပြောဟူသူဟာ ကိုယ့်
ကိုယ်ကိုယ်ဘဲ တည်ဆော့-က်ဇာဖြစ်ဟယ်။ ပရောဖက်ပြု
သူဟာ သင်းတော်ဟို ပြုစုပေးဇာဖြစ်ဟယ်။

5 နန်းနို့ဂူလောင်းဟာ ထူးဆန်းဟူသာစကားဟို့ ပြော
 ဟို့တွပ် ငါလိုရှိဟယ်။ အယ်ဘေမဲ့ ပရောဖက်ပြုဘီး ဟော
 ပြောဟို့တွပ် ပိုဘီး လိုရှိဟယ်။ ဖြားဖြစ်ကြောနန်းဆိုဟာ၊
 ထူးဆန်းဟူ ဘာသာစကားဟို့ ပြောဟူသူဟာ သင်းတော်
 ဟို့ တည်ဆော့-က်ပေးဟို့တွပ် နတ်ဟို့ဖော်ပြဘဲနေဟာ၊
 သူထတ် ပရောဖက်ပြုဘီး ဟောပြောဟူသူဟာ ပိုဘီး မြ
 တ်ဟယ်။

6 အယ်မျိုးဖြစ်ကြောန့် ညီကို မောန့်နှမလေ၊ ငါဟာ နန်း
 နို့နားဟို့ လာဘီး ထူးဆန်းဟူ ဘာသာစကားမျိုးမျိုးလေ
 န ဟောပြောဟူလည်းဘဲ ငါဟောပြောဟူ စကားလေဟာ
 ဗျာဒိတ်တော်ဟို့ ပုလန်ဟူဇာလေ၊ ပညာအတတ်ဟို့ သင်
 ဟူဇာလေ၊ ပရောဖက်ပြုဟူဇာလေ၊ ဆောင်းမသွန်သန်ဟူ
 ဇာလေဟို့ တခုလည်း ပြုဘဲန နန်းနို့ဟို့ ဟောပြောဟယ်
 ဆိုဟာ ဖြားကျိုးရှိမယ်နူး။

7 အယ်မျိုးဘဲ သတ်မဲ့ဖြစ်ဟူ နံနစောန်းဟူမျိုးဘဲ အယ်
 မူတီးမူဟူဇာလေဟာ သံဟို့ပီးပီသသ ထွပ်လာဘဲနေဟာ
 စောန်းသံမှန်း နှံသံမှန်း ဖယ်မျိုးသိနိုင်မယ်နူး။

8 ဗိုးမူသံလည်းဘဲ ပီးပီသသန မြယ်ဟု ဆိုဟာ စစ်ပွဲဝ
 မ်ဟို့တွပ် ဖယ်မျိုးပြင်ဆင်မယ်နူး။

9 အယ်မျိုးဘဲ ထူးဆန်းဟူ ဘာသာစကားမျိုးမျိုးလေ
 န နန်းနို့ပြောဟူစကားဟာ ဓိပါယ်သိဘဲနေဟာ ဖယ်သူ
 နားလည်နိုင်မယ်နူး။ နန်းနို့လေဟာ လေထဲမာ စကားပြော
 နေဟူမျိုးဘဲ ဖြစ်လေ့မယ်!

10 ကမ္ဘာမှာ ဘာသာစကားလေ ဘောင်ဂီးရှိဟူလည်းဘဲ ဖယ်စကားလည်းဘဲ ခိပါယ်မေ့ဘဲဟူ စကားဆိုဇာ မေ့ဟူ။

11 အယ်ကြောန့် ဘာသာစကားရဲ့ နတ်ခိပါယ်ဟို့ ငါ နားလည်ဘဲနေဟာ အယ်ဘာသာစကားဟို့ ပြောဟူသူဟာ ငါ့တွပ်လူမျိုးခြား ဖြစ်ဟယ်။ ငါလည်း သူ့တွပ် လူမျိုးခြား ဖြစ်ဟယ်။

12 အယ် မျိုး ဖြစ်ကြောန့် နန်းနို့လေဟာ ဝိညာဉ် ဆု ကျေးဇူးလေဟို့ လိုရှင်တောင်းတဂေဟူတိုင်း သင်းတော် တည်ဆော့-က်ရာမှာ တိုးပွားလာဟို့တွပ် အယ်ဆုကျေးဇူး အားဖြင့် ကြွယ်ဝပုလဲဇောင်ဟို့တွပ် ကြိုးစားအားထုဂေ ပါ။

13 အယ်ကြောန့် ထူးဆန်းဟူ ဘာသာစကားပြောဟူသူ ဟာ နတ်ခိပါယ်ဟို့ ဖော်ပြပေးနိုင်ဟို့တွပ် ဆုတောင်းရ မယ်။

14 ဖြားဖြစ်ကြောန့်နူးဆိုဟာ ငါဟာ ထူးဆန်းဟူ ဘာသာစကားမျိုးမျိုးနု ဆုတောင်းဟူ ခီမာ ငါ့ရဲ့စိန်လော င်းဟာ ဆုတောင်းနေဟူလည်းဘဲ ငါ့သိဉာဏ်ဟု ဖြားကျိုး လည်းပေးဟူ။

15 အယ်မျိုးဆိုဟာ ဖယ်မျိုး ငါပြုရမယ်နူး။ ငါဟာ စိ နှလောင်းအားဖြင့်မူဘဲနု ဉာဏ်အားဖြင့်လည်း ဆုတော န်းမယ်။ စိနှလောင်းအားဖြင့်ဘဲ ချင်းဆိုဇာမူဘဲနု ဉာဏ် အားဖြင့်လည်း ချင်းဆိုမယ်။

16 အယ်မျိုးမူဘဲ နန်းနို့လေဟာ စိနှလောင်းအားဖြင့် ဘဲ ဘုရားသခင်ဟို့ ချီးမွမ်းဘီး ဆုတောင်းဟယ် ဆိုဟာ

ပရိသတ်ထဲမှာ ဝတ်ပြုနေဟူ သာမန်လူတယော့-က်ဟာ နန်းနို့ပြောဟူစကားလေဟို့ နားလည်ဘဲကြောန့် နန်းနို့လေ ဆုတောင်းဟူဇာဟို့ ဖယ်မျိုး “အာမင်” ဆိုဘီး ဝန်ခံနိုင် မယ်နူး။

17 ကျေးဇူးတော် ချီးမွမ်းဟူ နန်းနို့ရဲ့ ဆုတောင်းရှင်းဟာ ကောင်းနေဟူလည်းဘဲ သူများလေတွပ် ပြားကျိုးလည်း မေ့ဟူ။

18 ငါဟာ ထူးဆန်းဟူ ဘာသာစကားဟို့ နန်းနို့လေထတ် ပိုဘီး ပြောဆိုနိုင်ကြောန့် ဘုရားသခင်ရဲ့ ကျေးဇူးတော်ဟို့ ချီးမွမ်းပါဟယ်။

19 အယ်ဘေမဲ့ သင်းတော်ဝတ်ပြုရှင်းမှာ ထူးဆန်းဟူ ဘာသာစကား ခွန်းပေါန်းထောန်သောင်းထတ်မက ဟော ပြောဟူဇာထတ် နားလည်နိုင်ဟူစကားငါးခွန်းဟို့ဘဲ ပိုဘီး ပြောရှင်ပါဟယ်။

20 ညီကို မောန်နှမလေ၊ နန်းနို့လေရဲ့ စဉ်းစားတွေးခေါ် ဟူဇာဟာ သားဂန်းဟားလေမျိုး ဖြစ်ဂေ့န။ ကောင်းဘဲဟူ ဇာလေမှာ သားဂန်းဟားလေမျိုး ဖြစ်ဂေ့ဘီး စဉ်းစားတွေး ခေါ်ဟူဇာမှာ စောင်လင်ရင့်ကျတ်ဟူသူ ဖြစ်ဂေ့ပါ။

21 ပညတုတိကျမ်းစာမှာ လာဟူဇာဟု
“ငါ့ရဲ့လူစုဟို့ ထူးဆန်းဟူ ဘာသာစကားအားဖြင့်
လူမျိုးခြားလေရဲ့နှောက်န ငါပြောမယ်။

အယ်ဘေမဲ့ ငါ့ရဲ့လူစုတော်ဟာ

ငါ့စကားဟို့ နားထောန်ဟို့ မူဟု ဆိုဘီး ဘုရားသခင်
မိန့်တော်မူဟယ်” ဆိုဘီး ဖော်ပြဟူးဟယ်။

22 အယ်ကြောန့် ထူးဆန်းဟူ ဘာသာစကားဟို့ ဟောပြော
ရှင်းဟာ ယောင်ကြည်သူလေတွပ် နိမိတ်လတ်ခဏာမှတ်န
ယောင်ကြည်သူလေတွပ် နိမိတ်လတ်ခဏာသတ်သေ ဖြ
စ်ဟယ်။ ပရောဖက်ပြုဘီး ဟောပြောဟူ ဆုကျေးဇူးဟာ
ယောင်ကြည်ဘဲသူလေတွပ် နိမိတ်လတ်ခဏာမှတ် ယောင်
ကြည်သူလေတွပ် နိမိတ်လတ်ခဏာ ဖြစ်ဟယ်။

23 အယ်ကြောန့် သင်းတော်တခုလောင်း စုဝေးဘီး ထူး
ဆန်းဟူ ဘာသာစကား ပြောဆိုနေဟူ ခီမာ သာမန်လူလေ
ဘဲဖြစ်ဖြစ် ယောင်ကြည်ဘဲသူလေဘဲဖြစ်ဖြစ် ဝမ်လာဟု
ယ် ဆိုဟာ နန်းနို့ဟို့ ရူးလေ ဆိုဘီး ပြောဂေလေ့မယ် မူဟု
လော။

24 အယ်မျိုးမှတ်နေဟာ သင်းဝမ်သူဂူလောင်းဟာ ပရော
ဖက်ပြုနေဟူ ခီမာ ယောင်ကြည်ဘဲဟူသူ၊ နားလည်ဘဲသူ
လေ ဝမ်လာဟယ် ဆိုဟာ သင်းဝမ်ဟူသူ ဂူလောင်းဟာ
သူပြစ်ဟို့ ဖော်ပြဘီး စစ်ဆေးစီရင်ခံရဟူ ခီမာ

25 အယ်သူရဲ စိန်လောင်းထဲမာ ထန်ရှားဘဲဇာလေဟာ
ထန်ရှားလာဟူကြောန့် “ဘုရားသခင်ဟာ နန်းနို့လေနတူးဒု
တကယ်ရှိတော်မူဟယ်!” ဆိုဘီး ဝန်ခံဘီးဟာ ဘုရားသခ
င်ဟို့ ပျပ်ဝပ်ကိုးကွယ်လေ့မယ်။

ဝတ်ပြုကိုးကွယ်မှုကြောန်း

26 ညီကို မောန်နှမလေ ဖယ်မျိုးပြောရဟိန္န။ နန်းနို့စု
ဝေးဂေဟူ ခီမာ ဆာလံချင်းဆိုဟူသူ၊ သွန်သန်ပေးဟူသူ၊
ဗျာဒိတ်တော်ဟို ဟောပြောဟူသူ၊ ထူးဆန်းဟူ ဘာသာစ
ကားဟို ပြောဟူသူ၊ နတ်ဓိပါယ်ဟို ဖော်ပြပေးဟူသူ သီး
သီးရှိဂေဟူကြော့န့် အယ်မူဇာ ဂူလောင်းဟာ သင်းတော်
တည်ဆော့-က်ဟိုတွပ်ဘဲ လောက်ဂေပါ။

27 ထူးဆန်းဟူ ဘာသာစကားဟို ပြောမယ် ဆိုဟာ
နွေယော့-က်ဘဲ ဖြစ်ဖြစ်၊ များဆောင်းသောင်းယော့-က်
ဘဲဖြစ်ဖြစ် ယော့-က်လှည့်ဇီ ပြောဘီး တယော့-က်ဟု န
တ်ဓိပါယ်ဟို ရှင်းပြပေးရမယ်။

28 တကယ်ဟိုကြော့န့် နတ်ဟိုဖော်ပြပေးဟူသူ မေ့ဟု ဆို
ဟာ ထူးဆန်းဟူ ဘာသာစကားပြောဟူသူဟာ သင်းတော်
မာ တိတိဆိဆိနေဘီး ကိုယ့်ကိုယ်ကိုယ်ဘဲဖြစ်ဖြစ် ဘုရား
သခင်ဟိုဘဲဖြစ်ဖြစ် ပြောပါစေ။

29 ပ ရော ဖက် နွေ ယော့-က် ဘဲ ဖြစ်ဖြစ် သောင်း
ယော့-က်ဘဲဖြစ်ဖြစ် ဟောပြောဘီး ကျန်ဟူသူလေဟု သူး
နို့ဟောဟူကြော့န့်ရလေဟို စီရင်သောင်းသပ်ရမယ်။

30 အယ်ဘေမဲ့ ထိုင်နေဟူတခြားတယော့-က်ဟို တခု
ခုဖွဲ့ပြရှင်းခံရဟယ် ဆိုဟာ ပထမလူဟာ တိတိဆိဆိ
နေပါစေ။

31 ဖြားဖြစ်နူးဆိုဟာ ရှိဟူလူတိုင်း သွန်သန်ရှင်းခံရဘီး
ရှိဟူလူတိုင်း တိုက်တွန်းအားပေးခံရဟိုတွပ်၊ နန်းနို့ဂူလော
င်းဟာ လှည့်ကုလ ပရောဖက်ပြုရဟူခွမ်ရှိဟယ်။

32 ပ ရော ဖက် လေ လည်း ကိုယ့် စိ ဝိ ညာ ဥ် ဟို ကိုယ်
ချောက်တီးနိုင်ဂေဟယ်။

33 ဖြားဖြစ်ကြောန့်နူးဆိုဟာ ဘုရားသခင်ဟာ ရောန်း
ရင်းဆန်ခတ်ဖြစ်ဟူဇာနဆိုင်ဟူ ဘုရားမှုဘဲ ငြိသတ်ရှင်းန
ဆိုင်ဟူ ဘုရားဖြစ်တော်မူဟယ်။

သန်ရှင်းသူလေရဲ့ သင်းတော်တိုင်းမာ ကျင့်သောင်းဟူ
တိုင်း၊

34 မီးမလေဟာ သင်းတော်စည်းဝေးမာ တိတိဆိဆိနေ
ရမယ်။ သူးနို့လေဟာ ဟောပြောရဟူခွမ် မှေဟာ။ ပညတ်
တရားမာ ဖော်ပြဟားတိုင်း သူးနို့ဟာ ယော-က်ကျားရဲ့
အောက်စိုးမှုဟို ဝန်ခံရဂေမယ်။

35 သူးနို့ဟာ တခုခုဟို သန်ယူရှင်ဟာ အီမာ သူးနို့လန်
ယော-က်ကျားဟို မေးရမယ်။ ဖြားဖြစ်ကြောန့်နူးဆိုဟာ
သင်းတော်မာ မီးမလေ ဟောပြောဟူဇာဟာ ယှစ်ဇာကော
န့်ဟယ်။

36 ဘုရားသခင်ရဲ့ စကားတော်ဟာ နန်းနို့လေနားဟာ ထွပ်
လာဟိုကြောန့်လော။ အယ်မျိုးမှုဘဲနေဟာ နန်းနို့လေနား
ဟိုဘဲ ရော-က်လာဟူကြောန့်လော။

37 ငါဟာ နန်းနို့လေဟို ရေးဘီးပေးလိုက်ဟူ စကားလေ
ဟာ သခင်ဘုရားရဲ့ ပညတ်တော်ဖြစ်ဟူ ကြောင်းဟို ပ
ရောဖက်ဖြစ်ဟူသူန ဝိညာဉ်ဆုကျေးဇူးဟို ခံရဟူ သူမှန်
ဟာ သိမှတ်ပါစေ။

38 ဖယ်သူဘဲဖြစ်ဖြစ် အယ်ဇာဟို သိမှတ်ပြုဘဲနေဟာ
အယ်သူဟိုလည်း သိမှတ်ပြုဂေ့န။

39 အယ်မျိုးဖြစ်ကြောန့် ညီကို မောန်နှမလေ၊ ပရော
ဖက်ပြုဟောပြောဇာဟို လိုရှင်တောန်းတဂေ့ပါ။ ထူးဆန်း
ဟူ ဘာသာစကားပြောဆိုမှုဟို တားမြစ်ဂေ့န။

40 ဂူလောင်းဟို တင့်တယ်လျောက်ပတ်အောန် လောက်
ဆောန်ဂေ့ပါ။

15

ခရစ်တော်သေရှင်းဟုနေ ထမြော့-က်ဟူကြောန်း

1 ညီကို မောန်နှမလေ၊ နန်းနို့လေဟို ငါဟောပြောဟူ
ဒန်းကောန်းဟို နန်းနို့လတ်ခံဟူမျှနဟူဘဲ အယ်ထတ်မာ နန်း
နို့ရပ်တည်ဂေ့ဟယ်။ နော့-က်ထပ် အယ်ကောန်းမြတ်ဟူ
ဒန်းကောန်းဟို နန်းနို့ဟို သိစေရှင်ပါဟယ်။

2 ငါဟောပြောဟူးဟူ အယ်ဒန်းကောန်းဟို စွဲစွဲမြဲမြဲ
ယောင်ကြည်မယ် ဆိုဟာ အယ်ဒန်းကောန်းအားဖြင့် နန်း
နို့ဟာ ကယ်တန်ရှင်းဟို ခံရမယ်။ အယ်မျိုး ယောင်ကြည်
ဘဲဟု ဆိုဟာ နန်းနို့ ယောင်ကြည်ဟူးဇာဟာ ဖြားကျိုးလ
ည်းမေ့ဟု။

3 ငါဟာ ကိုယ်တိုင်ခံယူဘီး နန်းနို့လေဟို ဦးဆောင်းပေး
အပ်ဟူ၊ ရေးကီးဆောင်းဖြစ်ဟူ ကြောန်းရာဟု ခရစ်တော်
ဟာ ကျမ်းစာလာဟူတိုင်း နို့လေပြစ်တွပ် သေခံတော်မူဟူ
ကြောန်း၊

4 သင်္ဂြိုဟ်ခံဘီး ကျမ်းစာလာဟူတိုင်း သောင်းရစ်
မြေ့-က်ဟူနေမာ ရှင်ပုလန်ထမြေ့-က် တော်မူဟူကြာ
န်း၊

5 ကေဖဟော ကိုယ်တော့်ဟို့ မြင်ရဟူကြောင်းန ဆယ့်
နှေ့ပါးဖြစ်ဟူ တမဲ့တော်လေ မြင်ရဟူကြောင်းလေဘဲ ဖြ
စ်ဟယ်။

6 အယ်ဘီးန ခရစ်ယာန်ညီကို မောန်နှမ ငါးရာကျော်ဟု
တပြိုင်ဒဲ မြင်ရဂေ့ဟယ်။ အယ်သူလေထဲဟု တချို့လူ
လေဟာ သေဟားဂေ့ဘီ တော်တော်များများဟု ခုထိရှိနေ
သေးဟယ်။

7 အယ်ဘီးန ယာကုပ်မြင်ရဟယ်။ နှော့-က်မှ တမန်
တော်လေ အားလောင်းမြင်ရဟယ်။

8 နှော့-က်ဆောင်းမာ ခီတန်ဘဲန မွီးဟူသူ* မျိုးဖြစ်ဟူ ငါ
လည်း မြင်ရဟယ်။

9 ငါဟာ တမန်တော်လေထဲမာ ညံ့ဆောင်းဖြစ်ဟယ်။
ဖြားဖြစ်ကြောန့်နဲ့ဆိုဟာ ဘုရားသခင်ရဲ့ သင်းတော်ဟို့
ညှဉ်းဆဲဟူသူဖြစ်ဘီး တမန်တော် ဆိုဘီး ခေါ်ဟူဇာဟို့မှ
ခံထိုက်ဟု။

10 အယ်ဘေမဲ့ ဘုရားသခင်ရဲ့ ကျေးဇူးတော်ကြော
န့် ငါဟာ ခုခြေနေဟို့ ရှော့-က်ရဇာဖြစ်ဟယ်။ ငါခံရ

15:4 ၁၅.၄ မ ၁၂.၄၀: တ ၂.၂၄-၃၂ 15:5 ၁၅.၅ က လု ၂၄.၃၄: ခ
မ ၂၈.၁၆,၁၇: မာ ၁၆.၁၄: လု ၂၄.၃၆: ယော ၂၀.၁၉ 15:8 ၁၅.၈ တ
၉.၃-၆ * 15:8 ၁၅.၈ ခီတန်ဘဲန မွီးဟူသူ၊ အယ်မျိုးမှတော့နဟာ ခီမှားဘီး
မွီးဖွားလာသူ။ 15:9 ၁၅.၉ တ ၈.၃

ဟူ ကျေးဇူးတော်ဟို့လည်း ကျိုးမွေ့ဘဲန ခံရဟူဇာ မှ
ဟူ။ ငါဟာ တခြားတမန်တော်လေထတ် ပိုဘီး ကြိုးစား
လောက်ဆောန်ဟယ်။ အယ်မျိုးလောက်ဆောန်နိုင်ဇာ
လည်း ငါ့ရဲ့စွမ်းစကြောန်မှုဘဲန ငါ့နတူးဒုလောက်ဆော
န်ဟူ ဘုရားသခင်ရဲ့ ကျေးဇူးတော်ကြောန် ဖြစ်ဟယ်။

11 အယ်ကြောန် ငါဘုံဖြစ်ဖြစ်၊ သူးနို့လေဘုံဖြစ်ဖြစ်
အယ်တိုင်းဟောပြောဂေဟယ်။ နန်းနို့လေလည်း အယ်တို
င်းဘုံ ယောင်ကြည်ဂေဟယ်။

သေဟူးသူလေ ထမြေ့-က်ဟူကြောန်း

12 ခရစ်တော်ဟာ သေရှင်းဟုနေဘီး ရှင်ပုလန်ထ
မြေ့-က်ဟူကြောန်းဟို့ နို့လေဟောပြောနေရစ်န ဖြားဖြစ်
ကြောန် နန်းနို့လေထဲဟု လူတချို့ဟာ သေဘီးလူလေ ထ
မြေ့-က်ရှင်းမွေ့ဟုဆိုဘီး ပြောဆိုနေဂေနှူး။

13 သေဟူးသူလေ ထမြေ့-က်ရှင်းမွေ့ဘဲနေဟာ
ခရစ်တော်လည်း ထမြေ့-က်ဟူးဟို့ မှဟူ။

14 ခရစ်တော်ဟာ ထမြေ့-က်တော်မူဘဲနေဟာ နို့
လေဟောပြောဇလည်း ဖြားကျိုးလည်း မှဟူ။ နန်းနို့
လေ ယောင်ကြည်ဇလည်း ဖြားကျိုးလည်း မှဟူ။

15 အယ်လော့-က်နမကဟု နို့လေဟာ ဘုရားသခင်န
ပတ်သတ်ဘီး မမှန်ဘဲဟူသတ်သေခံလေ ဖြစ်ဟူးဂေလေ
မယ်။ ဖြားဖြစ်ကြောန်နူးဆိုဟာ သေဟူးသူလေဟို့ ထ
မြေ့-က်စေတော်မူဘဲနေဟာ ဘုရားသခင်ထမြေ့-က်စေ
တော်မူဘဲဟူ ခရစ်တော်ဟို့ ဘုရားသခင် ထမြေ့-က်စေ

တော်မူဘိ ဆိုဘိး နို့လေ သတ်သေခံနေဟူကြောန့် ဖြစ်ဟု
ယ်။

16 ဖြားဖြစ်ကြောန့်နူးဆိုဟာ သေဟားသူလေ ထ
မြော့-က်ရှင်းမွေ့ဘဲနေဟာ ခရစ်တော်လည်း ထမြော့-က်
တော်မူဟားမယ် မူဟု။

17 ခရစ်တော်ဟာ ထမြော့-က်ဘဲနေဟာ နန်းနို့ယောင်
ကြည်ရှင်းဟာ ချည်းနှီးသတ်သတ်ဖြစ်ဘိး နန်းနို့လေဟာ
ပြစ်ဒုစရိုက်အော့-က်မာဘဲ ရှိနေသေးဂေဟယ်။

18 အယ်မျိုးဖြစ်ဟယ် ဆိုဟာ ခရစ်တော်နှိုက် အိမ့်ဟား
သူလေလည်း ဆောင်းရှောင်းမှုဟို့ ရော့-က်ဂေရမယ်။

19 ခရစ်တော်နှိုက် နို့လေရဲ့ မျှော်လင့်ရှင်းဟာ ဒုဘဝ
ကျိုးတွပ်ဘဲ ဖြစ်ဟယ် ဆိုဟာ ဖြားလည်းကျိုးထူးဟု ဆို
ဟာ အယ်လောကမာ နို့လေလော့-က် သနားဇာကောန်းဟူ
လူ ရှိဟို့မူဟု။†

20 မှန်ဆိုဟာ ခရစ်တော်ဟာ သေဟားသူလေထဲမာ ထ
မြော့-က်တော်မူဘိး အိမ့်ဟူ သူလေထဲမာ ဦးဆောင်းသီး
ဖြစ်တော်မူဟယ်။

21 ဖြားဖြစ်ကြောန့်နူးဆိုဟာ လူတယော့-က်အားဖြင့်
အယ်လောကထဲမာ သေရှင်းတရားဖြစ်ပေါ်လာဟူမျိုး လူ
တယော့-က်အားဖြင့်ဘဲ သေရှင်းဟု ရှင်ပုလန်ထမြော့-က်

† 15:19 ၁၅.၁၉ ခရစ်တော်နှိုက် နို့လေရဲ့ မျှော်လင့်ရှင်းဟာ ဒုဘဝ
ကျိုးတွပ်ဘဲ ဖြစ်ဟယ် ဆိုဟာ ဖြားလည်းကျိုးထူးဟု ဆိုဟာ အယ်လောကမာ
နို့လေလော့-က် သနားဇာကောန်းဟူလူ ရှိဟို့မူဟု၊ အယ်မျိုးမွေ့ဘဲနေဟာ
နို့လေလောင်းဟာ ဒုဘဝမာဘဲ ခရစ်တော်အားဖြင့် မျှော်လင့်ရှင်းရှိဟယ်။

ရှင်းတရားဟာလည်း ဖြစ်ပေါ်လာဟယ်။

22 လူလေ ဂူလောင်းဟာ အာဒိအားဖြင့် သေဂေရဟူမျိုး လူလေ ဂူလောင်းဟာ ခရစ်တော်အားဖြင့် သတ်ရှင်ရှင်းဟို့ ရှေး-က်ရလေ့မယ်။

23 အယ်ဘေမဲ့ လူသီးသီးဟာ လှည့်ကုလ ထမြှေး-က် ဂေလေ့မယ်။ ခရစ်တော်ဟာ ရင်ဦးဆောင်း ထမြှေး-က် ဟူ ဦးဆောင်းသီး ဖြစ်ဟယ်။ ခရစ်တော် ကြွလာဟူ ခီမာ တမဲ့တော်ဖြစ်ဟူ သူလေဟာ ထမြှေး-က်ဂေလေ့မယ်။

24 အယ်ဘီးမှ ကပ်ကမ္ဘာ ကူဆောင်းဟူခီ ရှေး-က်လေ့ မယ်။ အယ်ခီမာ ခရစ်တော်ဟာ အောက်ချောက်မှုရှိဟူမျှ၊ တဂိုးန အာဏာစစ်ရှိဟူမျှ ဂူလောင်းဟို့ ဖျစ်ဆီးဘီးဟာ နိုင်ငံတော်ဟို့ ဖဘုရားသခင် လတ်ထဲဟို့ အပ်တော်မူလေ့ မယ်။

25 ဖြားဖြစ်ကြောန့်နူးဆိုဟာ ရန်သူလေ ဂူလောင်းဟို့ ခရစ်တော်ရဲ့ ခေဖွားအော့-က်မာ ခုလဟားခန်ခီထိ ခရစ် တော်ဟာ အောက်စိုးရမယ်။

26 ဖျစ်ဆီးခံရမယ့် နော့-က်ဆောင်းဟူ ရန်သူဟာ သေ မန်းဘဲ ဖြစ်ဟယ်။

27 ကျမ်း စာ ဟု “ဘုရား သ ခ င် ဟာ ဂူ လော င်း ဟို့ ကိုယ်တော်ရဲ့ ခေဖွားအော့-က်မာ ခုလဟားတော်မူဟယ်” ဆိုဘီး ဖော်ပြဟားဟယ်။ “ဂူလောင်း” ထဲမာ ဘုရားသခင် ပါဟု။ ဖြားဖြစ်ကြောန့်နူးဆိုဟာ ဂူလောင်းဟို့ ခရစ်တော် ရဲ့ ခေဖွားအော့-က်ဟို့ ရှေး-က်စေဟူသူဟု ဘုရားသခင်

ဘဲ ဖြစ်ဟုယ်။

²⁸ ဂူလောင်းဟို့ သားတော်ဟာ အောက်စိုးတော်မူဟူ ခီမာ သူ့ရဲ့ ခေဖွားအော့-က်ဟို့ ဂူလောင်းဟို့ ခုလဟား တော်မူဟူ ဘုရားသခင်ရဲ့ အောက်စိုးရှင်းဟို့ သားတော် ကိုယ်တိုင် ဝန်ခံလေ့မယ်။ ဖြားဖြစ်ကြောန့်နူးဆိုဟာ ဘုရား သခင်ဟာ လောင်းဇောင် ဖြစ်တော်မူဟုယ်။

²⁹ သေဟားဘီးသူလေ ကိုယ်စား ဗတုတိဇံခံဟူ သူလေ ဟာ ဖြားကျိုးရှိဟူကြောန့် အယ်မျိုးလောက်ဂေ့နူး။ သေ ဟားဘီး သူလေဟာ ရှင်ပုလန်ထမြော့-က်ရှင်းမွေဟု ဆို ဟာ ဖြားဖြစ်ကြောန့် သူးနို့ကိုယ်စား ဗတုတိဇံခံနေဂေ့နူး။

³⁰ ဖြားဖြစ်ကြောန့် နို့လေဟာ ဘေးအန္တရာယ်န မြဲဒမ်း တွံကြောင်ရဂေ့နူး။

³¹ ညီကို မောန်နှမလေ၊ နို့လေဟာ သခင် ယေရှု ခရစ်တော်နှိုက် နန်းနို့အားဖြင့် ငါရရှိဟူ ဝါကြွားဝန်းသာရှင်းဟို့ တိုင်တည်ဘီး ငါဟာ နေ့တိုင်းသေရဟုယ် ဆိုဘီး ငါ ပြောဟုယ်။

³² တကယ်ဟို့ ငါဟာ လူ့သဘောအားဖြင့် ဖေက်မြို့မာ သားရဲလိဆန်လေန တိုက်ခိုက်ရဟုယ် ဆိုဟာ ငါ့တွပ် ဖြား ကျိုးရှိမယ်နူး။ သေဟားဘီးသူလေ ရှင်ပုလန်ထမြော့-က် ရှင်း မှော့ဘဲနေဟာ “နန်ကီးမိုးလန်းဟာ သေရဂေ့မယ်ဖြစ် ကြောန့် နို့လေဟာ စားရင်း၊ သော့-က်ရင်း၊ ပျော်ပါးရင်း နေဂေ့ဇို့” ဆိုဘီး ဆိုဟူတိုင်းဘဲ နေဂေ့ရအောန်။

³³ တလွဲယူဂေ့နူး။ “ကောန်းဘဲဟူ သူလေန ပေါန်းသ

င်းဟူ ဇာအားဖြင့် ကောင်းဟူ ကျင့်စလေ့ ပျစ်စီးတတ်ဟူ
ယ်။”

34 မြင်မှန်ရဂေပါ။ ပြစ်လောက်ဂေန။ ဖြားဖြစ်ကြောန်နွဲ့
ဆိုဟာ တချို့လူလေဟာ ဘုရားသခင်ဟို့ သိဂေဟ။ နန်း
နို့လေ ယှစ်ကြော့-က်အောန် အယ်မျိုးငါပြောဇာ ဖြစ်ဟူ
ယ်။

ရှင်ပုလန်ထမြော့-က်ဟူ ကိုယ်ခန္ဓာကြောန်း

35 အယ်ဘေမဲ့ လူတချို့ဟ “သေဟားသူလေဟာ ဖယ်
မျိုး ရှင်ပုလန်ထမြော့-က်မယ်နွဲ့။ ဖယ်မျိုး ကိုယ်ခန္ဓာန
ပေါ်လာမယ်နွဲ့” ဆိုဘီး မေးဂေလေ့မယ်။

36 ဝှေ့ လူမိုက်! နန်စိုက်ဟူ မျိုးစေ့ ရင်ဦးဆောင်း ပျစ်
ဟားဘဲနေဟယ် ဆိုဟာ ရှင်လာဟို့ မူဟ။

37 မျိုးစေ့ဟို့ မလေမာ စိုက်ဟူ ခီမာ နော့-က်မှ ဖြစ်လာ
ဟူ ကိုယ်ထည်ဟို့ စိုက်ဟူဇာ မူဟ။ ဂျောင်စေ့ဘဲဖြစ်ဖြစ်၊
တခြား မျိုးစေ့ဘဲဖြစ်ဖြစ် စေ့ဟို့ဘဲ စိုက်ဟူဇာ ဖြစ်ဟယ်။

38 အယ်ဘေမဲ့ ဘုရားသခင်ဟာ သူလိုတော်ရှိဟူတိုင်း
မျိုးစေ့ ကိုယ်ထည်ဟို့ ပေးတော်မူဟယ်။ မျိုးစေ့ သီးသီး
ဟို့လည်း သူးနို့ရဲ့ မျိုးစားလိုက် ကိုယ်ထည်ဟို့ ပေးတော်
မူဟယ်။

39 သတ်ရှိသတ္တဝါလေရဲ့ သားဟုလည်း တမျိုးဒဲရှိဇာ
မူဟ။ လူလေရဲ့ သားဟု တမျိုး၊ မဲသားဟု တမျိုး၊ ငှက်
သားဟု တမျိုး၊ ငါးသားဟု တမျိုး ဖြစ်ဟယ်။

40 ကောန်းဂန်ရဲ့ ကိုယ်ထည်လည်း တမျိုး၊ မုလေဂီးရဲ့ ကိုယ်ထည်လည်း တမျိုး ရှိဟယ်။ ကောန်းဂန်ကိုယ်ထည်ရဲ့ ဂေါင်သရေဟု တမျိုး၊ မုလေဂီးကိုယ်ထည်ရဲ့ ဂေါင်သရေဟု တမျိုး ဖြစ်ဟယ်။

41 နေရဲ့ ဂေါင်သရေ၊ လရဲ့ ဂေါင်သရေ၊ ကြယ်ရဲ့ ဂေါင်သရေဟု တမျိုးစီ ဖြစ်ဟယ်။ ကြယ်ဟာ လောင်းနလောင်းဟို့ဘဲ ဂေါင်သရေရှင်း တူဟု။

42 သေဟူးသူလေရဲ့ ထမြော့-က်ရှင်းဟုလည်း အယ်တိုင်းဘဲ ဖြစ်ဟယ်။ ကိုယ်ခနုဓာဟို့ သံဂြိုဟ်ဟူ ခီမာပေါက်ပျစ်တတ်ဟူ သဘောရှိဟယ်။ ထမြော့-က်ဟူ ခီမာဆိုဟာ ပေါက်ပျစ်နိုင်ဘဲဟူ ဖြစ်နတည်ဟယ်။

43 စိုက်ဟူ ခီမာ ဂေါင်သရေပျစ်ဘီး ခွန်အားမေ့ဟု။ ထမြော့-က်ဟူ ခီမာ ဖောင်းသရေတော်ရှိဘီး တဂိုးန ပုလဲဇောင်လေမယ်။

44 စိုက်ဟူ ခီမာ ကိုယ်ကာယခန္ဓာ ဖြစ်ဟယ်။ ထမြော့-က်ဟူ ခီမာ ဝိညာဏကိုယ် ဖြစ်ဟယ်။ ရောက်ပိုင်းဆိုင်ရာ ခန္ဓာရှိဟူမျိုး ဝိညာဉ်ပိုင်းဆိုင်ရာ ကိုယ်ခန္ဓာလည်း ရှိရဟယ်။

45 အယ်ကြောန့် ကျမ်းစာလာဟူဇာဟု “ပထမ လူအာဒံဟာ သတ်ရှင်ဟူ သတ္တဝါ ဖြစ်ဟယ်” ဆိုဘီး ရေးဟူးဟယ်။ နေ့-က်ဆောင်းဖြစ်ဟူ အာဒံဟာ သတ်ရှင်စေတတ်ဟူ ဝိညာဉ် ဖြစ်ဟယ်။

46 ဝိညာဏကိုယ်ဟာ ရင်ဦးဆောင်း ဖြစ်လာဇာ မူဟု။

ရောက်ခန္ဓာ ဖြစ်ဘီးမှ ဝိညာဏကိုယ် ဖြစ်လာဟူ၍ ဖြစ်ဟူယ်။

47 ပထမအာဒံဟာ မှလေဂီးဟု ဖန်ဆင်းဟူကြောင့် မှလေဂီးသား ဖြစ်ဟူယ်။ ဒုတိယ အာဒံဟာ ကောင်းဂန်ဘောင်ဟုနေ လာဟူသူ ဖြစ်ဟူယ်။

48 မှလေဂီးသားလေဟာ အယ်မှလေဂီးသားမျိုးဘဲ ဖြစ်ဂေဟူယ်။ ကောင်းဂန်ဘောင်န ဆိုင်ဟူ သူလေဟာ ကောင်းဂန်ဘောင်န ဆိုင်ဟူသူန တူလေ့မယ်။

49 နို့လေဟာ မှလေဂီးသားရဲ့ ပေါင်သဏ္ဍာန်ဟို့ ဆောန်ဟူမျိုးဘဲ ကောင်းဂန်ဘောင်ဟု ကြွလာဟူသူရဲ့ ပေါင်သဏ္ဍာန်ဟို့လည်း ဆောန်ဂေလေ့မယ်။‡

50 ညီကို မောန်နှမလေ၊ လူ့ရဲ့သွီးသားဟာ ဘုရားသခင်ရဲ့ နိုင်ငံတော်ဟို့ ခံယူနိုင်ဟူ။ ပေါက်ပျစ်တတ်ဟူ၍ဟာ ပေါက်ပျစ်တတ်ဘဲဟူ၍ဟို့ ခံယူနိုင်ဟူ။

51 နားထောန်ဂေပါ။ လျှို့ဝှပ်နတ်နဲဟူ ဇာတခုဟို့ ငါပြောအူးမယ်။ နို့လေဂူလောင်းဟာ သေဂေရဟို့ မှဟူ။

52 အယ်ဘေမဲ့ နှော-က်ဆောင်းဗွိုးမှဟူ ခီမာ မျစ်စိတမို့ ရှစ်ဟားဒဲန ပုလောန်းလဲဂေလေ့မယ်။ နှော-က်ဆောင်းဗွိုးမှဟူ ခီမာ သေဟားဘီးသူလေဟာ ရှင်ပုလန်ထမြော့-က်ဘီး သေရှင်းန ထာဝရ ကင်းလွတ်လေ့မယ်။ နို့လေ အားလောင်းလည်း ပုလောန်းလဲမှဟို့ ရှော့-က်ဂေလေ့မယ်။

‡ 15:49 ၁၅-၄၉ ဆောန်ဂေလေ့မယ်၊ တချို့ မူရင်းလတ်ရေးမူလေမာဝတ်ခွမ့်ပေးလေ့မယ်၊ ဆိုဘီး ပါရှိဟူယ်။ 15:51 ၁၅-၅၁-၅၂ ၁ သက် ၄-၁၅-၁၇

53 ဖြားဖြစ်ကြောနဲ့ဆိုဟာ ခုပေါက်ပျစ်တတ်ဟူ ဇာ
ဟာ ပေါက်ပျစ်တတ်ဘဲဟူ ဇာဖြစ်ဟို့ ပုလောန်းလဲရမယ်။
သေတတ်ဟူ ဇာဟာ သေနိုင်ဘဲဟူ ဇာဖြစ်ဟို့ ပုလောန်းလဲ
ရမယ်။

54 အယ်ကြောနဲ့ အယ်ပေါက်ပျစ်တတ်ဟူ ဇာဟာ ပေါက်
ပျစ်နိုင်ဘဲဟူ ဇာဖြစ်န သေတတ်ဟူ ဇာဟာ သေနိုင်ဘဲဟူ
ဇာဖြစ်ဟို့ ပုလောန်းလဲဟူ ခီမာ “သေရှင်းဟာ အောန်မြင်
ရှင်းနှိုက် နှစ်မှလောက်ဘိ!” ဆိုဘီး ပြောဟားဟူ ကျမ်းစ
ကားဟာ ပုလဲဇောင်လေ့မယ်။

55 “အို၊ မရဏနိုင်ငံ၊ နန့်ရဲ့ အောန်မြင်ရှင်းဟု ဖယ်မာရှိနဲ့။

အို၊ သေမန်း၊ နန့်ရဲ့ လတ်နတ်ဟု ဖယ်မာရှိနဲ့။”

56 သေမန်းရဲ့ လတ်နတ်တဂိုးဟာ ပြစ်ဒုစရိုက် ဖြစ်ဟယ်။
ဒုစရိုက်ပြစ်ရဲ့ တဂိုးဟာ ပညတ်တရား ဖြစ်ဟယ်။

57 အယ်ဘေမဲ့ နို့လေရဲ့ သခင် ယေရှုခရစ်တော်အားဖြင့်
အောန်မြင်မှုဟို့ ပေးတော်မူဟူ ဘုရားသခင်ရဲ့ ကျေးဇူး
တော်ဟာ ကိမ်းမားလှပါဟယ်!

58 အယ်မျိုးဖြစ်ကြောနဲ့ ငါ့ရှစ်ရဟူ ညီကို မောန်နှမလေ၊
နန်းနို့လေဟာ သခင်ဘုရားရဲ့ မှုတော်ဟို့ ကြိုးစား လောက်
ဆောန်ဟူဇာဟာ ချည်းနှီး ဖြစ်ဘဲဟူကြောင်းဟို့ သိမှတ်
ဘီးဟာ တည်ကြည်ဟူစိန် ပုလဲဇောင်ဘီး ဖော့-က်ပုလန်
ရှင်း မှော့ဘန် သခင်ဘုရားရဲ့ မှုတော်ဟို့ မြဲဒမ်း ကြိုးစား
ဆောန်ရုပ်ဂေ့ပါ။

16

လိုအပ်နေဟူ ယောင်ကြည်သူလေတွပ် လှူငွေကြောန်း

¹ သန့်ရှင်းဟူသူလေဟို့ ထော့-က်ပုံဟို့တွပ် လှူငွေပတ် သတ်ဘီးဟာ ဂလာတိပြည်မာရှိဟူ သင်းတော်လေဟို့ ငါ ညွှန်ကြားဟားတိုင်း နန်းနို့လေ လောက်ဂေပါ။

² ငါရော့-က်လာဟူ ခီမာ လှူငွေကော့-က်ခံရဘဲနေအော န် နန်းနေတိုင်း နန်းနို့ယော့-က်ချင်းစီတိုင်းရဲ့ ဝမ်ငွေနဲ များလိုက် လှူဒန်းဟို့တွပ် စုဆောင်းဟားဂေပါ။

³ ငါရော့-က်လာဟူ ခီမာ စာရေးဘီး နန်းနို့လေ ဝီး ကော့-က်ဟူသူလေဟို့ အပ်ပေးဘီး အယ်လတ်ဆောန်ဟို့ ယေရုရှလင်မြို့ဟို့ ပို့ဆောန်ဟို့တွပ် ငါလွတ်မယ်။

⁴ တကယ်ဟို့ ငါကိုယ်တိုင်သွားဟို့ လိုအပ်ဟယ် ဆိုဟာ သူးနို့လေနငါ တူးဒုသွားမယ်။

ပေါလုရဲ့ကြံစည်ကြောန်း

⁵ မာကေဒေါနိပြည်လမ်းဟုနေ ငါသွားမယ်ဖြစ်ဟူကြော န် မာကေဒေါနိပြည်ဟို့ လှည့်လည်ဘီးမှ နန်းနို့နားဟို့လာ မယ်။

⁶ ငါဟာ နန်းနို့လေနတူးဒု ဆောင်းကာလပတ်လောင်း နေရှင်ဟာနေမယ်။ နော့-က်မှ ငါသွားရှင်ဟူနေရာဟို့ သွား ဟို့တွပ် နန်းနို့ကူညီလေ့မယ် ဆိုဇာဟို့ ငါမျှော်လင့်ပါဟ ယ်။

7 ငါဟာ နန်းနီလေနားဟို ရှစ်ဟူးတည်းခိုမျှဒဲမှုဘဲန သခင်ဘုရားခွဲမပြုမယ် ဆိုဟာ နန်းနီလေနားမာ ကြားကြာ နေဟို့ မျှော်လင့်ဟူးပါဟယ်။

8 ပင်တေကုတုတေပွဲနေထိ ဖေက်မြို့မာ ငါနေအူးပါ မယ်။

9 ဖြားဖြစ်ကြောနန်းဆိုဟာ မှုတော်တွပ် ရရာတိုင်း ကီး ဟူခွဗော-က်ဟာ ငါတွပ် ဆင်သင့်ဖွမ့်ဘီး ရှိနေပါဟယ်။ တားဆီးဟူသူလည်း ဘောင်ဂီးရှိပါဟယ်။

10 နန်းနီလေနားဟို တိမောသေဟာ ရော့-က်လာဟယ် ဆိုဟာ သူဟာ စိုးရိမ်မှုမေ့ဘဲ နန်းနီနတူးဒုနေထိုင်ဟို့တွပ် ဂရုစိုက်ဂေပါ။ ဖြားဖြစ်ကြောနန်းဆိုဟာ သူဟာ ငါ့ဟူမျိုး ဘဲ သခင်ဘုရားရဲမှုတော်ဟို့ လောက်ဆောန်ဟူသူ ဖြစ်ဟယ်။

11 အယ်ကြောန့် သူဟို့ ဖယ်သူလည်းဘဲ ထိမဲ့မြင်ပြုစေ န။ ငါဟာ ယောင်ကြည်သူ ညီကို မောန်နှမလေနတူးဒု သူ ရော့-က်လာဟို့ဇာဟို့ စောန်မျှော်နေဟူကြောန့် သူဟာ ငါ နားဟို့ဘေးကင်းဘီး ရော့-က်လာနိုင်ဟို့တွပ် ကူညီဂေပါ။

12 ငါ့ညီအာပေါလုန ပတ်သတ်ဘီး ပြောရမယ် ဆိုဟာ သူဟာ တခြားခရစ်ယာန် ညီကို မောန်နှမလေနတူးဒု နန်းနီ လေနားဟို့ လာလည်ဟို့တွပ် သူဟို့ ငါအားပေးတိုက်တွန်း ဟယ်။ အယ်ဘေမဲ့ သူဟာ အယ်ခီဒူးဟု လာဟို့ လောင်းဝ

ဆန္ဒမေ့ဟူ။ * အယ်ဘေမဲလည်း ခွဲမံသာဟူ ခီမာ သူလာ
လေ့မယ်။

နော-က်ဆောင်းမှာဟူ စကား

13 နန်းနီလေ နိုးနိုးကြားကြားနေဂေပါ။ ယောင်ကြည်
ရှင်းန ခိုင်းခိုင်းမားမာရပ်တည်ဂေပါ။ ရဲစွမ်းသတ္တိရှိဂေပါ။
သန်မာဂေပါ။

14 ဂူလောင်းဟို့ မြစ်တာစိန်ပြုဂေပါ။

15 ညီကို မောန်နှမလေ၊ သတေဖန်ရဲ့ အီသူအီသား
လေဟာ အခါယပြည်မာ ဦးဆောင်းခရစ်ယာန်လေဖြစ်ဘီး
သန်ရှင်းသူလေရဲ့မူဟို့ ကူညီဆောန်ရုပ်ဟို့တွပ် သူးနီလေ
ဟာ ကိုယ့်ကိုယ်ကိုယ် ဆစ်ကပ်ဟားဟူကြောင်းဟို့ နန်းနီ
လေသိဂေဟို့တွပ် ငါတိုက်တွန်းဟယ်။

16 အယ်မျိုးသူလေဟနေစဘီး သူးနီနတူးဒု မူတော်ဟို့
လောက်ဆောန်ဂေဟူ သူလေရဲ့ ဦးဆောန်မူဟို့ နာခံဂေဟို့
တွပ် နန်းနီလေဟို့ မြစ်တာရပ်ခံဟယ်။

17 သတေဖန်၊ ဖော်တုနက်န အခါယ ကုဟားလေ
ရော-က်လာဟူကြောန် ငါဝန်းသာဟယ်။ သူးနီလေဟာ
နန်းနီကိုယ်စား ငါဟို့ပြုစုဂေဟယ်။

18 သူးနီလေဟာ နန်းနီစိဟို့ သတ်သာစေဟူမျိုး ငါရဲ့
စိဟို့လည်း သတ်သာစေဂေဟယ်။ အယ်မျိုးသူလေဟို့
သိမှတ်ပြုဂေပါ။

* 16:12 ၁၆.၁၂ သူဟာ အယ်ခီဒူးဟ လာဟို့ လောင်းဝ ဆန္ဒမေ့ဟူ၊
အယ်မျိုးမူဘဲနေဟာ ဘုရားသခင်လိုတော် လောင်းဝ မေ့ဟူ။ 16:15
၁၆.၁၅ ၁ ကော ၁.၁၆

19 အာရှပြည်မရှိဟူ သင်းတော်လေဟာ နန်းနို့လေဟို
 နှောက်ဆစ်ဂေဟယ်။ အာကုလန ပြစ်ကံလဟုနေစဘီး
 သူးနို့အီမာ ဝတ်ပြုကိုးကွယ်ဂေဟူ သင်းဝမ်သူလေဟု
 လည်း သခင်ဘုရားရဲ့ နာမတော်အားဖြင့် နှောက်ဆစ်ဂေ
 ဟယ်။

20 ညီကိုအားလောင်းဟုလည်း နန်းနို့ဟို နှောက်ဆစ်ဂေ
 ဟယ်။

နန်းနို့ဟု ယော့-က်နယော့-က် သန်ရှင်းဟူနမ်းန နှောက်
 ဆစ်ဂေပါ။

21 အယ်နှောက်ဆစ်စကားဟို ငါပေါလုကိုယ်တိုင် ငါ့
 လတ်န ရေးလိုက်ပါဟယ်။

22 သခင်ဘုရားဟို ရှစ်ဘဲဟူ ဖယ်သူဘဲဖြစ်ဖြစ် ကီရှင်း
 ဟို ခံရပါစေ!

မာရာနာ သာ သခင်ဘုရား ကြွလာတော်မူပါ!

23 သခင်ယေရှုခရစ်ရဲ့ ကျေးဇူးတော်ဟာ နန်းနို့လေမာ
 ရှိပါစေ။

24 ယေရှုခရစ်တော်နှိုက် တမဲ့တော်ဖြစ်ဟူ နန်းနို့လေမာ
 ငါရဲ့ရှစ်ရှင်းမြစ်တာရှိဟယ်။ အာမင်။

lxxx

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1